

欽定宋史

卷一百五十七

一百六十三



宋史卷一百五十七

元 中 書 右 丞 相 總 裁 脫 脫 等 修

選舉志第一百十

選舉三 學校試 律學等試附

凡學皆隸國子監國子生以京朝七品以上子孫爲之初無定員後以二百人爲額太學生以八品以下子弟若庶人之俊異者爲之及三舍法行則太學始定置外舍生二千人內舍生三百人上舍生百人始入學驗所隸州公據試補外舍齋長諭月書其行藝于籍行謂率教不戾規矩藝謂治經程文季終考于學諭次學錄次正次博士後考于長貳歲終會其高下書於籍以俟覆試參驗而序進之凡私試孟月經義仲月論季月策凡公試初場經義次場論策試上舍如省試法凡內舍行藝與所試之業俱優爲上舍上等取旨授官一優一平爲中等以俟殿試俱平若一優一否爲下等以俟省試元祐間置廣文館生二千四百人以待四方游士試京師者律學生無定員他雜學廢置無常崇寧建辟雍於郊以處貢生而三舍考選法乃遍天下於是由州郡貢之辟雍由辟雍升之太學而學校之制益詳凡國子以奏蔭恩廣故學校不預考選其得入官賜出身者多由銓試初國子監因周舊制頗增學舍以應蔭子孫隸學受業開

寶八年國子監上言生徒舊數七十人奉詔分習五經然繫籍者或久不至而在京進士諸科常赴講席肄業請以補監生之闕詔從之景德間許文武升朝官嫡親附國學取解而遠鄉久寓京師其文藝可稱有本鄉命官保任監官驗之亦聽附學充貢仁宗時士之服儒術者不可勝數卽位初賜兗州學田已而命藩輔皆得立學慶厯四年詔曰儒者通天地人之理明古今治亂之原可謂博矣然學者不得騁其說而有司務先聲病章句以拘牽之則吾豪雋奇偉之士何以奮焉士以純明樸茂之美而無敦學養成之法使與不肖並進則夫懿德敏行何以見焉此取士之甚敝而學者自以爲患夫遇人以薄者不可責其厚也今朕建學興善以尊子大夫之行更制革敝以盡學者之才有司其務嚴訓導精察舉以稱朕意學者其進德修業無失其時其令州若縣皆立學本道使者選部屬官爲教授員不足取於鄉里宿學有道業者由是州郡奉詔興學而士有所勸矣天章閣侍講王洙言國子監每科場詔下許品官子役然試藝給牒充廣文太學律學三館學生多致千餘就試試已則生徒散歸講官倚席但爲游寓之所殊無肄習之法居常聽講者一二十人爾迺限在學滿五百日舊已嘗充貢者止百日本授官會其實京朝官保任始預秋試每十人與解凡入學授業月旦卽親書到厯如遇私故或疾告歸寧皆給假違程及期月不來學者去其籍後諫官余靖極言非便遂罷聽讀日限初立四門學自入品至庶人子弟充學生歲一試補

差學官鎖宿彌封校其藝疏名上聞而後給牒不中式者仍聽讀若三試不中則出之未幾學廢時太學之法寬簡而上之人必求天下賢士使專教導規矩之事安定胡瑗設教蘇湖間二十餘年世方尚詞賦胡學獨立經義治事齋以敦實學皇祐末召瑗爲國子監直講數年進天章閣侍講猶兼學正其初人未信服謗議蜂起瑗強力不倦卒以有立每公私試罷掌儀率諸生會于首善雅樂歌詠乙夜乃散士或不遠數千里來就師之皆中心悅服有司請下胡學取其法以教太學神宗尤垂意儒學自京師至郡縣旣皆有學歲時月各有試程其藝能以差次升舍其最優者爲上舍免發解及禮部試而待賜之第遂躡以此取士太學生員慶厯嘗置內舍生二百人熙寧初又增百人尋詔通額爲九百人四年盡以錫慶院及朝集院西廡建講書堂四諸生齋舍掌事者直廡始僅足用自主判官外增置直講爲十員率二員共講一經令中書遴選或主判官奏舉生員釐爲三等始入學爲外舍初不限員後定額七百人外舍升內舍員二百內舍升上舍員百各執一經從所講官受學月考試其業優等上之中書其正錄學諭以上舍生爲之經各二員學行卓異者主判官直講復薦之中書奏除官始命諸州置學官率給田十頃贍士初置小學教授帝嘗謂王安石曰今談經者人人殊何以一道德卿所著經其以頒行使學者歸一八年頒王安石書詁周禮義于學官是名三經新義元豐二年頒學令太學置八十齋齋各五楹容三十人外舍生一

千人內舍生三百人上舍生百人月一私試歲一公試補內舍生間歲一舍試補上舍生彌封磨錄如貢舉法而上舍試則學官不預考校公試外舍生入第一第二等升內舍試入優平二等升上舍皆參攷所書行藝迺升上舍分三等學正增爲五人學錄增爲十人學錄參以學生爲之歲賜緡錢至二萬五千又取州縣田租屋課息錢之類增爲學費初以國子名監而實未嘗教養國子詔許清要官親戚入監聽讀額二百人仍盡以開封府解額歸太學其國子生解額以太學分數取之毋過四十人哲宗時初置在京小學曰就傅初筮凡兩齋復取太學額百人還開封府先是開封解額稍優四方士子多冒畿縣戶又隸太學不及一年不該解試者亦往往冒戶禮部按舊制凡試國子監先補中廣文館生乃投牒求試元祐七年遂依倣其法立廣文館生惟開封府元解百人許自試其嘗取諸科二百國子額四十者皆以爲本館解額遇貢舉年試補館生中者執牒詣國子監驗試凡試者十人取一開封考取亦如之紹聖元年罷廣文館其額悉復還之開封府國子監元祐新令罷推恩之制紹聖初監察御史郭知章言先帝立三舍法以歲月稽其行實故入上舍而中上等者得不經禮部試特命以官責備而持久故其得也難誘掖激勸莫善於此宜復元豐法以廣樂育之德又請三學補外舍生依元豐令一歲四試於是詔太學生悉用元豐制推恩上等卽注官者歲毋過二人免禮部試者每舉五人而止免解試者二十人而止仍計數對

除省試發解額其元祐法勿用諸三舍升補等法悉推行舊制三年三省言元祐試補太學生不嚴苟務多取後試者無闕可撥宜遵元豐初制雖在籍生亦重試乃詔在籍生再試許取三分初求補者半之惟上舍生及是年充貢員內舍外舍先自元豐補入者免再試餘非再試而中者皆降舍蔡京上所修內外學制始頒諸天下元符元年詔許命官補國子生毋過四十人凡太學試令優取二禮評占全額之半而以其半及他經復置春秋博士二年初令諸州行三舍法考選升補悉如太學州許補上舍一人內舍二人歲貢之其上舍附太學外舍試中補內舍生三試不升舍遣還其州其內舍免試至則補外舍爲生諸路選監司一員提舉學校守貳董幹其事遇補試上內舍生選有出身官一人同教授考選須彌封謄錄三年太學試補外舍改用四季學官自考不謄錄仍添試論一場崇寧元年宰臣請天下州縣並置學州置教授二員縣亦置小學縣學生選考升諸州學州學生每三年貢太學至則附試別立號考分三等入上等補上舍入中等補下等上舍入下等補內舍餘居外舍諸州軍解額各以三分之一充貢士開封府留五十五額解士人之不入學者餘盡均給諸州以爲貢額外官子弟親戚許入學一年給牒至太學用國子生額解試州給常平或係省田宅充養士費縣用地利所出及非係省錢三年始定諸路增養縣學弟子員大縣五十人中縣四十人小縣二十人凡州縣學生曾經公私試者復其身內舍免戶役上舍仍

免借借如官戶法命將作少監李誠卽城南門外相地營建外學是爲辟雍蔡京又奏古者國內外皆有學周成均蓋在邦中而黨庠遂序則在國外臣親承聖詔天下皆興學貢士卽國南郊建外學以受之俟其行藝中率然後升諸太學凡此聖意悉與古合今上所當行者太學專處上舍內舍生而外學則處外舍生今貢士盛集欲增太學上舍至三百人內舍六百人外舍三千人外學爲四講堂百齋齋列五楹一齋可容三十人土初貢至皆入外學經試補入上舍內舍始得進處太學太學外舍亦令出居外學其敕令格式悉用太學見制國子祭酒總治學事外學官屬司業丞各一人稍減太學博士正錄員歸外學仍增博士爲十員正錄爲五員學生充學諭者十人直學二人三舍生皆繇升貢遂罷國子監補試又置諸王宮大小學教授立考選法凡奉祠及仕而解官或需次者悉許入內外學任子不係州土隨所寓入學仍別齋居處別號試考會升補三舍生後從獻助得官其入學視任子法凡任子不問文武須隸學滿一年始得求試迺詔取士悉由學校升貢其州郡發解及試禮部並罷自是歲試上舍悉差知舉如禮部試五年著令凡縣學生隸學已及三月不犯上二等罰聽次年試補州學外舍是名歲升開封祥符生員卽辟雍別爲齋教養升進如縣學法願入鄰縣學者聽惟赤縣校試主以博士每歲正月州以公試上舍及歲升員一院鎖宿分爲三試其公試上舍率十取其六爲中格中格已以其名第自上而下參考察之

籍既在籍又中選卽六人之中取其四以差升舍其歲升中選者得補外舍生開封屬縣附辟雍別試中者入辟雍充外舍隸學三年經兩試不預升貢卽除其籍法涉太嚴今令三年內三經公試不預選兩經補內舍貢上舍不極格且曾犯三等以上罰若外舍卽除籍罷歸縣內舍降外舍已嘗降而私試不入等若會犯罰亦除籍再赴歲升試凡州學上舍生升舍以其秋卽貢入辟雍長吏集閭郡官及提學官具宴設以禮敦遣限歲終悉集闕下自川廣福建入貢者給借職券過二千里給大將券續其路食皆以學錢給之如有孝弟睦姻任恤忠和若行能尤異爲鄉里所推縣上之州免試入學州守貳若教授詢審無謬卽保任入貢其實以聞不實者坐罪有差太學試上舍生本慮與科舉相并試以間歲今旣罷科舉又諸州歲貢士其改用歲試每春季太學辟雍生悉公試同院混取總五百七十四人以四十七人爲上等卽推恩釋褐一百四十人爲中等遇親策士許入試一百八十七人爲下等補內舍生凡上等上舍暨特舉孝弟行能之士不待廷試推恩者許卽引見釋褐上舍仍先以試文卷進入得可乃引賜若上舍已該釋褐恩而貢入在廷試前一年者須在學又及半年不犯上二等罰乃得注官凡貢士入辟雍外舍三經試不與升補兩經試不入等仍犯上三等罰者削籍再赴本州歲升試是名退送卽內舍已降舍而又一試不與或兩犯上四等罰者亦如外舍法退送太學外舍生已預考察者許再經一試以中否爲留遺餘

升降退送悉如辟雍法凡有官人不入學而願試貢士者不以文武雜出身悉許之惟贓私罪廢人則否
應試者隨內外附貢士公試皆別考率以七人取一人卽預貢者與辟雍春試貢士通考中選入上等者
升差遣兩等賜上舍出身文行優者奏聞而殊擢之中等俟殿試下等補內舍不隸學需再試已仕在官
而願試者悉準此制凡在外官同居小功以上親及其親姊妹女之夫皆得爲隨行親免試入所任鄰州
郡學其有官人願學於本州者亦免試升補悉如諸生法混試同考惟升舍不侵諸生額自用七人取一
若中者多卽以溢額名次理爲考察若所親移願改籍他州學者聽太學上內舍旣由辟雍升入又已
罷科舉則國子監解額無所用盡均撥諸府諸州解額三分之一以爲三歲貢額並令有司均定以聞太學
舊制止分立優平二等自今欲令辟雍太學試上舍中程者皆參用考察以差升補其考察試格悉分上
中下三等貢士則以本州升貢等第太學內舍則以校定等第每上舍試者已定知舉及學官以中試之
等參驗于籍通定升絀高下兩上爲上一上一中及兩中爲中一上一下及一中下兩下爲下若兩格名
次等第適皆齊同卽以試等壓考察之格餘率以是爲差仍推其法達之諸州凡內外私試始改用仲月
併試三場試論日仍添律義凡考察悉準在學人數每內舍十人取五外舍十人取六自上而下分爲三
等籍以俟上舍考定而參用之是歲貢士至辟雍不如令者凡三十有八人皆罷歸而提學官皆罰金建

州浦城縣學生隸籍者至千餘人爲一路最縣丞徐秉哲特遷一官初立八行科詔曰學以善風俗明人倫而人材所自出也今法制未立殆無以厲天下成周以六行賓興萬民否則威之以不孝不弟之刑近因稽周法立八行八刑頒之學校兼行懲勸庶幾於古士有善父母爲孝善兄弟爲悌善內親爲睦善外親爲姻信於朋友爲任仁於州里爲恤知君臣之義爲忠達義利之分爲和凡有八行實狀鄉上之縣縣延入學審考無僞上其名於州州第其等孝悌忠和爲上睦姻爲中任恤爲下苟備八行不俟中歲卽奏貢入太學免試補爲上舍司成以下審考不誣申省釋褐優命之官不能全備者爲州學上上等上舍餘有差八刑則反八行而麗於罪各以其罪名之縣上其名於州州稽於學毋得補弟子員然品目既立有司必求其迹以應令遂有牽合瑣細者自元祐勅經明行修科主德行而略辭藝間取禮部試黜之士附實恩科當時固已咎其無所甄別及八行科立則三舍皆不試而補往往設爲形迹求與名格相應於是兩科相望幾數十年迺無一人卓然能自著見者而八行又有甚敝蓋後世欲追古制而不知風俗教化之所從出其難固如此夫開封始建府學立貢士額凡五十而士子不及三百盡額而取則涉太優欲稍裁之詔王畿立學若不優誘使進何以首善其常解五十勿闕大觀元年詔願兼他經者量立升進之法大抵用本經決去取而兼經所中等第特爲升貢每歲附公試院而別異其號每十五人取一人分上中下

等別榜示之唱名日甄別奏聞與升甲皆優於專經者異時內外學官闕皆得在選縣學生三不赴歲升
試及三赴歲升試而不能升州學者皆除其籍諸路賓興會試辟雍獨常州中選者多州守若教授俱選
一官政和四年小學生近一千人分十齋以處之自八歲至十二歲率以誦經書字多少差次補內舍若
能文從博士試本經小經義各一道稍通補內舍優補上舍又詔學校教養額少則野有遺士應諸路學
校及百人以上者三分增一七年試高麗進士權適等四人皆賜上舍及第遣歸其國時宰臣留意學校
因事究徹有司考閤防閑益密先是禮部上雜修御試貢士勅令格式又取舊制凡關學政者合勅令格
式成書以上用給事中毛友言初試補入縣學生並簾試以別僞冒徽宗崇尚老氏之學知兗州王純乞
於御注道德經注中出論題范致虛亦乞用聖濟經出題宣和元年帝親取貢士卷考定能深通內經者
升之以爲第一三年詔罷天下州縣學三舍法惟太學用之課試開封府及諸路並以科舉取士太學官
吏及州縣嘗置學官凡元豐舊制所有者皆如故其辟雍官屬及宗學并諸路提舉學事官屬並罷內外
學悉遵元豐成憲七年詔政和中嘗命學校分治黃老莊列之書實失專經之旨其內經等書並罷治崇
寧以來士子各徇其黨習經義則誣元祐之非尙詞賦則誚新經之失互相排斥羣論紛紛欽宗卽位臣
僚言科舉取士要當質以史學詢以時政今之策問虛無不根古今治亂悉所不曉詩賦設科所得名臣

不可勝紀專試經義亦已五紀救之術莫若遵用祖宗成憲王安石解經有不背聖人旨意亦許採用至於老莊之書及字說並應禁止詔禮部詳議諫議大夫兼祭酒楊時言王安石著爲邪說以塗學者耳目使蔡京之徒得以輕費妄用極侈靡以奉上幾危社稷乞奪安石配饗使邪說不能爲學者惑御史中丞陳過庭言五經義微諸家異見以所是者爲正所否者爲邪此一偏之大失也頃者指蘇軾爲邪學而加禁甚切今已弛其禁許采其長實爲通論而祭酒楊時矯枉太過復詆王氏以爲邪說此又非也諸生習用王學聞時之言羣起而詆詈之時引避不出齋生始散詔罷時祭酒而諫議大夫馮澥崔鷗等復更相辨論會國事危而貢舉不及行矣建炎初卽行在置國子監立博士二員以隨幸之士三十六人爲監生紹興八年葉琳上書請建學而廷臣皆以兵興餽運爲辭十三年兵事稍寧始建太學置祭酒司業各一員博士三員正錄各一員養士七百人上舍生三十員內舍生百員外舍生五百七十員凡諸道住本州學滿一年三試中選不犯第三等以上罰或不住學而曾兩預釋奠及齒于鄉飲酒者聽充弟子員每歲春秋兩試之旋命一歲一補於是多士雲集至分場試之俄又詔三年一試增至千員中選者皆給綾紙贊詞以寵之每科場四取其一自外舍有月校而公試入等曰內舍自內舍有月校而舍試入等曰上舍凡升上舍者皆直赴廷對二十七年立定制春季放補遇省試年改用孟夏舊太學遇覃恩無免解法

孝宗始勅行之在朝清要官許牒期親子弟作待補國子別號考校如太學生遇有期親任清要官更爲國子生不預校定升補及差職事惟得赴公私試科舉則混試焉淳熙中命諸生暇日習射以斗力爲等差比類公私試別理分數自中興以來四方之士有本貫在學公據皆得就補帝始加限節命諸路州軍以解試終場人數爲準其薦貢不盡者令百取六人赴太學謂之待補生其住本學及游學之類一切禁止元豐舊制內舍生校定分優平二等優等再赴舍試又入優則謂之兩優釋褐中選者卽命以京秩除學官至是始令先注職官代還注職事官恩例視進士第二人舊校定歲額五六分爲優選者增爲十分矣光宗初公試始命附省場別院紹熙三年禮部侍郎倪思請復混補法命兩省臺諫雜議可否於是吏部尙書趙汝愚等合奏曰國家恢儒右文京師郡縣皆有學慶厯以後文物彬彬中興以來建太學于行都行貢舉於諸郡然奔競之風勝而忠信之俗微亦惟榮辱升沉不由學校德行道藝取決糊名工雕篆之文無進修之志視庠序如傳舍目師儒如路人季考月書盡成文具今請重教官之選假守貳之權倣會法以育材因大比以取士考終場之數定所貢之員期以次年試于太學其諸州教養課試升貢之法下有司條上思議遂寢四年詔國子監試中上等小學生比類諸州待補中選之額放補一次寧宗慶元嘉定中始兩行混補於是增外舍生爲千四百員內舍校定不係土舍試年分以八分爲優等又以國子

生員多僞濫命行在職事官期親齋務官子孫乃得試補嘉定十四年詔自今待補百人取三人舊法自外舍升內舍雖有校試必公試合格乃許升補蓋私試皆學官自考而公試則降勅差官至是歲終許取外舍生校最優者一人升內舍理宗復百取六人之制紹定二年以待補生自外方來參齋者間有鬻帖僞冒之弊遂命中選之人召升朝保官二員批書印紙仍命州郡守倅結罪保明比照字跡無僞方許籛引注籍犯者治罪罰及保官五年以省試下第及待補生之羣試于有司者有請託賄求之弊學官考文有親故交通之私命今後兩學補試並從廟堂臨時選差卽令入院凡用度則用國子監供給學官事例未幾監察御史何處久又言宜遵舊制以武學宗學補試併就兩學於大院排日引試有親嫌人依選房法且士子試卷頗多考官頗少期日既迫費用不敷乃增給用度仍添差考官五員寶祐元年復命分路取放補試員數以免遠方士子道路往來之費及都城壅併之患三年復試於京師度宗咸淳二年正月幸太學謁先聖禮成推恩三學前廊與免省試內舍上舍及已免省試者與升甲起居學生與泛免一次內該曾經兩幸人與補上州文學如願在學者聽其在籍諸生地遠不及趁起居者三學申請乞併行泛免一次命特從之凡諸生升舍在幸學之前者方許陳乞恩例七年正月以壽和聖福皇太后兩上尊號推恩三學在齋生員並特與免解赴省一次九年外舍生晏泰亨以七分三釐乞理爲第三優朝命不

許遂申嚴學法今後及八分者方許歲校三名如八分者止有一人而援次優三優之例者亦須止少三
二釐方可陳乞特放庶不盡廢學法當亦不過一人而止

律學國私置博士掌授法律熙寧六年始卽國子監設學置教授四員凡命官舉人皆得入學各處一齋
舉人須得命官二人保任先入學聽讀而後試補習斷按則試按一道每道敘列刑名五事或七事習律
令則試大義五道中格乃得給食各以所習月一公試三私試略如補試法凡朝廷有新頒條令刑部卽
送學其犯降舍殿試者薄罰金以示辱餘用太學規矩而命官聽出宿尋又置學正一員有明法應格而
守選者特免試注官使兼之月奉視所授官後以教授一員兼管幹本學規矩仍從太學例給晚食元豐
六年用國子司業朱服言命官在學如公試律義斷案俱優準吏部試法授官太學生能兼習律學中公
試第一比私試第二等政和間詔博士學正依大理寺官除授不許用無出身人及以恩例陳請生徒犯
罰者依學規仍犯不改書其印麻或補牒參選則理爲闕失建炎三年復明法新科進士預薦者聽試紹
興元年復刑法科凡問題號爲假案其合格分數以五十五通分作十分以所通定分數以分數定等級
五分以上入第二等下四分半以上入第三等上四分以上入第三等中以曾經試法人爲考官五年以
李洪嘗中刑法入第二等命與改秩中書較之趙鼎謂古者以刑弼教所宜崇獎高宗曰刑名之學久廢

不有以優之則其學絕矣卒如前詔後議者謂得解人取應更不兼經白身得官反易於有官試法乃命所試斷案刑名全通及粗通以十分爲率斷及五分刑統義文理全通爲合格及雖全通而斷案不及分數者勿取仍自後舉兼經十五年罷明法科以其額歸進士惟刑法科如舊二十五年四川類省始附試刑法淳熙七年祕書郎李燾言漢世儀律令同藏于理官而決疑獄者必傳以古義本朝命學究兼習律令而廢明法科後復明法而以三小經附蓋欲使經生明法法吏通經今所試止於斷案律義斷案稍通律義雖不成文亦得中選故法官罕能知書宜令習大法者兼習經義參攷優劣帝曰古之儒者以儒術決獄若用俗吏必流於刻乃從其奏詔自今第一第二第三場試斷案每場各三道第四場大經義一道小經義二道第五場刑統律義五道明年命斷案三場每場止試一道每道刑名十件與經義通取四十分以上爲合格經義定去留律義定高下寧宗慶元三年以議臣言罷經義五年又復嘉定二年臣僚上言試法設科本以六場引試後始增經義一場而止試五場律義又居其一斷案止三場而已殊失設科之初意且考試類多文士輕視法家惟以經義定去留其弊一也法科欲明憲章習法令察舉明比附之精微識比折出入之錯綜酌情法於數字之內決是非於片言之間比年案題字多專尙困人一日之內僅能謄寫題目豈暇深究法意其弊二也刑法考官不過會中法科丞評數人由是請託之風盛換易之

弊與其弊二也今請罷去經義仍分六場以五場斷案一場律義爲定問題稍減字數而求精於法律者爲試官各供五六題納監試或主文臨時點定如是讞議得人矣從之六年以議者言法科止試刑統是盡廢理義而專事法律遂命復用經義一場以尙書語孟題各一篇及刑統大義通爲五場所出經題不必拘刑名倫類以防預備以斷案定去留經義爲高下仍禁雜流入貴人收試八年罷四川類試刑法科初凡試法科者皆取撰成見義挾入試場理宗淳祐三年令刑部措置關防其考試則選差大理丞正歷任中外有聲望者不許止用新科評事未經作縣之人逮其試中又當倣省試中書覆試之法質以疑獄觀其讞筆明允始與差除時所立等第文法俱通者爲上徑除評事文法粗通者爲次與檢法不通者駁放度宗咸淳元年申嚴選試之法凡引試刑法官命題一如紹興式八年以試法科者少特命考試命題務在簡嚴毋用長語有過而願試者照見行條法除私罪應徒或入己贓失入死罪并停替外餘犯輕罪者與放行收試或已經三試終場之人已歷三考赴部參注命本部考覈元試果有所批分數不須舉狀與注外郡刑法獄官差使一次庶可激厲誘掖格法試法科者批及八分方在取放之數咸淳未有僅及二分以上者亦特取一名授提刑司檢法官寬以勸之也

初宗學廢置無常凡諸王屬尊者立小學于其宮其子孫自八歲至十四歲皆入學日誦二十字其已授

環衛官有學藝得召試遷轉者每有之然非有司常試乃特恩也熙寧十年始立宗子試法凡祖宗祖免親已受命者附鎖廳試自祖免以外得試于國子監禮部別異其卷而校之十取其五舉者雖多解毋過五十人廷試亦不與進士同考年及四十嘗累舉不中疏其名以聞而錄用之其官于外而不願附各路鎖試許謁告試國子監崇寧初疏屬年二十五以經義律義試禮部合格分二等附進士榜與三班奉職文優者奏裁其不能試及試而黜者讀律於禮部推恩與三班借職勿著爲令及兩京皆置敦宗院院皆置大小學教授立考選法如熙寧格出官所涖長貳或監司有二人任之乃注授後又許見在任者於本任附貢士試大觀三年宗子癯褐者十二人宗學官須宗子中上舍第且有行者方始爲之四年詔宗子之升上舍不經殿試遽命之官熙寧法不如是其依貢士法俟殿試補入上中等者唱名日取裁後又定上等賜上舍及第中等賜出身授官有差凡隸學有篤疾若親老無兼侍者大宗正察其實罷歸宣和二年詔罷量試出官之法紹興二年帝初策士及宗子于集英殿五年初復南省試十四年始建宗學于臨安生員額百人大學生五十人小學生四十人職事各五人置諸王宮大小學教授一員在學者皆南宮北宅子孫若親賢宅近屬則別選館職教授初行在宗室試國子監者有官鎖廳七取其三無官應舉七取其四無官祖免親取應文理通爲合格不限其數而外任主宮觀嶽廟試于轉運司者取放之額同進

士十五年命諸路宗室願赴行在試者依熙寧舊制並國子監請解不願者依崇寧通用貢舉法所以優國族也孝宗登極凡宗子不以服屬遠近人數多寡其曾獲文解兩次者並直赴廷試略通文墨者量試推恩習經人本經義二道習賦人詩賦各一首試論人論一首仍限二十五歲以上合格第一名承節郎餘並承信郎曾經下省人免量試推恩四川則附試于安撫制置司於是入仕者驟踰千人隆興元年詔量試不中年四十以上補承信郎屢三年出官餘並於後舉再試四月御射殿引見取應省試第一人賜同進士出身第二第三人補保義郎餘四十人承節郎七人承信郎凡宗室鎖廳得出身者京官進一秩選人比類循資無官應舉得出身者補修職郎濮秀二王下子孫中進士舉者更特轉一秩乾道五年命宗室職事隨侍子弟許赴國子監補六年臣僚上言神宗朝始立教養選舉宗子之法保義至秉義鎖試則與京秩在末科則升甲取應不過量試注官所以寵異同姓不與寒畯等也然曩時向學者少比年篤異者多或冠多士或登詞科幾與寒士齊驅而入仕寔繁未知裁抑非所以示至公也於是禮部請鎖廳登第者舊於元官上轉行兩官自今止依元資改授餘准舊制十二年右正言胡衛請自今宗室監試無官應舉照鎖廳例七取其三省試則三舉所放人數如取應例立爲定額從之寧宗嘉定四年詔鎖廳應舉省試第一名殿試唱名授官日於應得恩例外更遷一秩九年以宮學併歸宗庠教授改爲博士宗諭

十四年命前隸宮學近屬令附宗學公私試中選者與正補宗學生近屬子孫年十五以下者許試小學
生復置諸王宮大小學教授一員宗學解試依太學例取放每舉附國子監發解所異題別考理宗寶慶
二年以鎖廳宗子第一名若指學深春秋秀出譜籍與補保護郎特賜同進士出身仍換修職郎端平元
年命宗子鎖廳應舉解試凡在外州軍或寄居或見在隨侍及見寓行在就試者各召知識官委保正身
國子監取其宗子出身訓名生長左驗以憑保收試仍於試卷家狀內具保官職位姓名以防欺詐淳祐
二年建內小學置教授二員選宗子就學寶祐元年五月特正奏名進士宗子必眺等二人特授保護郎
若瑰等二十九人承節郎勅略曰必眺等取應及選咸補右階蓋欲誘之進學而教以入仕也其毋以是
自畫焉度宗咸淳元年以鎖廳應舉宗子兩請舉人遇卽位赦恩並赴類試其曾經覆試文理通者照例
升等文理不通及未經覆試者則否第五等人特與免銓出官九年凡無官宗子應舉初生則用乳名給
據既長則用訓名其赴諸路漕司之試有一人前後用兩據印二卷者至是命漕司並索乳名訓名各項
公據方許收試以杜姦弊

武舉武選咸平時令兩制館閣詳定入官資故事而未及行仁宗時嘗置武學既而中輟天聖八年親試
武舉十二人先閱其騎射而試之以策爲去留弓馬爲高下神宗熙寧五年樞密請建武學於武成王廟

以尙書兵部郎中韓纘判學內藏庫副使郭固同判賜食本錢萬緡生員以百人爲額選文武官知兵者爲教授使臣未參班與門蔭草澤人召京官保任人材弓馬應格聽入學習諸家兵法教授纂次歷代用兵成敗前世忠義之節足以訓者講釋之願試陣隊者量給兵伍在學三年具藝業考試等第推恩未及格者逾年再試凡試中三班使臣與三路巡檢砦主未有官人與經略司教隊差使三年無過則升至大使臣有兩省待制或本路鈐轄以上三人保舉堪將領者並兼諸衛將軍外任回歸環衛班科場前一年武臣路分都監文官轉運判官以上各奏舉一人聽免試入學生員及應舉者不過二百人春秋各一試步射以一石三斗馬射以八斗矢五發中的或習武伎副之策略雖弓力不及學業卓然並爲優等補上舍生毋過三十人試馬射以六斗步射以九斗策一道孫吳六韜義十道五通補內舍生馬步射馬戰應格對策精通士行可稱者上樞密院審察試用雖不應格而曉術數知陣法智略可用或累試策優等悉取旨補上舍武藝策略累居下等復降外舍先是樞密院修武舉試法不能答策者答兵書墨義王安石奏曰三路義勇藝入三等以上皆有旨錄用陛下又欲推府界保甲法於三路則武力之人已多近以學究一科從誦書不曉理廢之而武舉復試墨義則亦學究之流無補於事先王收勇力之士皆屬於車右者欲以備禦侮之用則記誦何所施於是悉從中書所定凡武舉始試義策於祕閣武藝則試于殿前司

及殿試則又試騎射及策于庭策武藝俱優爲右班殿直武藝次優爲三班奉職又次借職末等三班差使減磨勘年策入平等而武藝優者除奉職次優借職又次三班差使減磨勘年武藝末等者三班差使八年詔武舉與文舉進士同時鎖試於貢院以防進士之被黜而改習者遂罷祕閣試又以六韜本非全書止以孫吳書爲題元豐元年立大小使臣試弓馬藝業出官法第一等步射一石矢十發三中馬射七斗馬上武藝五種孫吳義十通七時務邊防策五道文理優長律令義十通七中五以上免短使減一任監當三事以上免短使升半年名次兩事升半年一事升一季第二等步射八斗矢十發二中馬射六斗馬上武藝三種孫吳義十通五策三道成文理律令義十通五中五事免短使升半年三事升半年兩事升一季一事與出官第三等步射六斗矢十發一中馬射五斗馬上武藝兩種孫吳義十通三策三道成文理律令義十通三計算錢穀文書五通三中五事升半年三事升一季兩事與出官其步射並發兩矢馬射發三矢皆著爲格四年罷試律義七年止試孫吳書大義一場第一等取四通次二等三通三等二通爲中格元祐四年詔解試省試增策一道崇寧間諸州置武學立考選升貢法倣儒學制其武藝絕倫文又優特者用文士上舍上等法歲貢釋褐中等仍隸學俟殿試凡試出官使臣仍赴殿前司呈試諸州武士試補不得文士同一場馬射三上垛九斗爲五分八斗爲四分七斗爲三分九斗八斗七斗再上垛

及一上操視此爲差理爲分數馬射一中帖當兩上操一中的當兩中帖舊制武舉三年一試命官不過三十餘人後增額以每貢者三人卽取一以升上舍積送增展遂至百人入流比文額太優四年詔自今貢試上舍者取十人入上等四十人入中等五十人入下等皆補充武學內舍人材不足聽闕之餘不入等者處之外舍大抵以弓馬程文兩上一上兩中一中兩下一下相參以爲第凡州教諭須州都監乃得兼吏部取武舉武士上舍出身者政和三年以隸學者衆凡經三歲校試而不得一與者除其籍宣和二年尙書省言州縣武學旣罷有願隸京城武學者請用元豐法補試舊制不入學而從保舉以試者附試武學外舍通取一百人偕上舍生發解今旣罷科舉請依元豐法奏舉歲終集闕下免試補外舍生赴次年公試其春選升補推恩依大觀法靖康元年詔諸路有習武藝知兵書者州長貳以禮遣送詣闕毋限數將親策而用之建炎三年詔武舉人先經兵部驗視弓馬于殿前司仍權就淮南轉運司別場附試七書義五道兵機策二首紹興五年帝御集英殿策武舉進士翌日閱試騎射策入優等與保義承節郎平等承信郎其武藝不合格者與進義校尉川陝宣撫司類省試武藝合格人並補官十二年御試正奏名策入優等承節郎平等承信郎進義校尉特奏名平等進義校尉各展磨勘有差十六年始建武學兵部上武士弓馬及選試去留格凡初補入學步射弓一石若公私試步騎射不中卽不許試程文其射格自

一石五斗以下至九斗凡五等二十六年帝見武學頽弊因諭輔臣曰文武一道也今太學就緒而武學幾廢恐有遺才詔兵部討論典故參立新制凡武學生習七書兵法步騎射分上內外三舍學生額百人置博士一員以文臣有出身或武舉高選人爲之學諭一員以武舉補官人爲之凡補外舍先類聚五人以上附私試先試步射一石弓不合格不得試程文中格者依文士例試七書義一道其內舍生私試程文三在優等弓馬兩在次優公試入等具名奏補試上舍者以就試人三取其一以十分爲率上一分中等二分下等七分仍以三年與發解同試凡內舍補上舍以上舍試合格入等與行藝相參兩上者爲上一上一中或兩中及一上一下爲中等一中一下或兩下一上一否爲下等仍不犯第三等罰土行可稱者具名奏補二十七年御試第一名趙應熊武藝絕倫又省試第一特與保義郎閣門祗候修立武舉入官資格二十九年命武舉人自今依府監年數免解孝宗隆興元年御試得正奏名三十七人殿中侍御史胡沂言唐郭子儀以武舉異等初補右衛長史歷振遠橫塞天德軍使國初試中武藝人並赴陝西任使又武舉中選者或除京東捉賊或三路沿邊試其效用或經略司教押軍隊準備差使今率授以權酷之事是所取非所用非所學也請取近歲中選人數量其材品者任授以軍職使之習練邊事諳曉軍旅實選用之初意也乾道二年中書舍人蔣芾亦以爲言請以武舉登第者悉處之軍中帝以問

洪适對曰武舉人以文墨進雜於卒伍非便也帝曰累經任者可以將佐處之是歲以登極推恩武舉進士比文科正奏名例第一名升一秩爲成忠郎第二第三名依第一名恩例五年兵部請外舍有校定人參考榜上等者候滿一年私試四入等及不犯三等以上罰或有校定而參考在中下等候再試參考入中等聽升補外舍生赴公試舊射親除許試五等弓外步射馬射止許試第三等以上弓程文雖優而參考弓馬分數難以對入優等自今許比上舍法不以爲步射親並通試五等吏部言武舉比試發解省試三場依條以策義考定等第其字號會封彌所以武藝并策義參考今比試自依舊法其解省兩場請依文士例考定字號先具奏聞拆號放榜從之初命武學生該遇登極覃恩曾升補內舍或在學及五年曾經公私試中人並令赴省是歲廷試始依文科給黃牒榜首賜武舉及第餘並賜武舉出身其年頒武舉之法令四川帥臣憲漕知州軍監及寄居侍從以上各舉武士一員興元府利闔金洋階成西和鳳州各三員拔其尤者送四川安撫司解試類省並如文科淳熙元年議者請武學外舍生有校定公試合格令試五等弓馬與程文五等相參入中上等者據闕升補餘俟再試入等升補從之帝御幄殿引見正奏名呈試武藝二年以武科授官與文士不類詔自今第一人補秉義郎堂除諸司計議官序位在機宜之上第二第三人保義郎諸路帥司準備將領代還轉忠翊郎第四第五人承節郎諸路兵馬監押代還轉

保義郎皆做進士甲科恩例四年以文科狀元代選例除館職亦召武舉榜首爲閣門舍人五年始立武學國子額收補武臣親屬其文臣親屬願附補者亦聽七年初立武舉絕倫并從軍法凡願從軍者殿試第一人與同正將第二第三人同副將五名以上省試第一名六名以下並同準補將從軍以後立軍功及人材出衆者特旨擢用帝曰武舉本求將帥之材今前名皆從軍以七年爲限則久在軍中諳練軍政他日可備委任八年命特奏名補官展減磨勘有差九年議者以爲從軍之人率多養望不屑軍旅詔自今職事勤恪者從主帥保奏升差懈惰者按劾光宗紹熙元年武臣試換文資南渡以前許從官三人薦舉紹興令敦武郎以下聽召保官二人以經義詩賦求試其後太學諸生久不第者多去從武舉已乃鎖廳應進士第凡以秉義或忠翊皆換京秩恩數與第一人等後以林穎秀言武士舍棄弓矢更習程文褒衣大袖專做舉子夫科以武名不得雄健喜功之士徒啟其僥倖名爵之心於是詔罷鎖廳換試寧宗卽位復其制慶元五年命兩淮京西湖北諸郡做兵部及四川法於本道安撫司試武士合格者赴行在解試別立字號分項考校撥十名爲解額五名省額理宗紹定元年命武舉進士避親及所舉之人止避本廳令無妨嫌官引試若合格則朝廷別遣官覆試淳祐九年以北兵屢至命極邊次邊一體收試仍量增解額五名省額二名是歲武舉正奏名王時發已係從軍之人充殿前司左軍統領既登第換授特命就

本職上與帶同字以示優厚勸獎度宗咸淳六年命禮部貢院於武舉進士平等每百人內取放待補十人絕倫每百人內取待補十三人

算學崇寧三年始建學生員以二百一十人爲額許命官及庶人爲之其業以九章周髀及假設疑數爲算問仍兼海島孫子五曹張丘建夏侯算法并厯算三式天文書爲本科本科外人占一小經願占大經者聽公私試三舍法略如太學上舍三等推恩以通仕登仕將仕郎爲次大觀四年以算學生歸之太史局併書學生入翰林書藝局畫學生入翰林圖畫局醫學學生入太醫局紹興初命太史局試補併募草澤人淳熙元年春聚局生子弟試厯算崇天宣明大衍厯三經取其通習者五年以紀元厯試九年以統元厯試十四年用崇天紀元統元厯三歲一試紹興二年命今歲春銓太史局試應三全通一粗通合格者並特收取時局生多闕故也嘉定四年命局生必俟試中方許轉補理宗淳祐十二年祕書省言舊典以太史局隸祕省今引試局生不經祕書非也稽之於令諸局官應試厯算天文三式官每歲附試通等則以精熟爲上精熟等則以習他書多爲上習書等則以占事有驗爲上諸局生補及二年以上者並許就試一年試厯算一科一年試天文三式兩科每科取一人諸同知算造官闕有試翰林天文官闕有試諸靈臺郎有應試補直長者諸正名學生有試問景祐新書者諸判局闕而合差諸秤漏官五年而轉資者

無不屬於祕書而局官等人各置脚色遇有差遣改補功過之類並申祕書今乃一切自行陳請殊乖初意自今有違令補差及不經祕書公試補中者中書執奏改正仍從舊制申嚴試法從之

書學生習篆隸草三體明說文字說爾雅大雅方言兼通論語孟子義願占大經者聽篆以古文大小二篆爲法隸以二王歐虞顏柳真行爲法草以章草張芝九體爲法考書之等以方圓肥瘦適中鋒藏畫勁氣清韻古老而不俗爲上方而有圓筆圓而有方意瘦而不枯肥而不濁各得一體者爲中方而不能圓肥而不能瘦模倣古人筆畫不得其意而均齊可觀爲下其三舍補試升降略同算學法惟推恩降一等自初置及併罷年數悉同算學

畫學之業曰佛道曰人物曰山水曰鳥獸曰花竹曰屋木以說文爾雅方言釋名教授說文則令書篆字著音訓餘書皆設問答以所解義觀其能通畫意與否仍分士流雜流別其齋以居之士流兼習一大經或一小經雜流則誦小經或讀律考畫之等以不做前人而物之情態形色俱若自然筆韻高簡爲工三舍試補升降以及推恩如前法惟雜流授官止自三班借職以下三等

醫學初隸太常寺神宗時始置提舉判局官及教授一人學生三百人設三科以教之曰方脉科鍼科瘍科凡方脉以素問難經脉經爲大經以巢氏病源龍樹論千金翼方爲小經鍼瘍科則去脉經而增三部

鍼灸經常以春試三學生願與者聽崇寧間改隸國子監置博士正錄各四員分科教導糾行規矩立上舍四十人內舍六十外舍二十齋各置長諭一人其考試第一場問三經大義五道次場方脈試脈證運氣大義各二道鍼瘍試小經大義三道運氣大義二道三場假令治病法三道中格高等爲尙藥局醫師以下職餘各以等補官爲本學博士正錄及外州醫學教授紹興中復置醫學以醫師主之翰林局醫生并奏試人並試經義一十二道取六通爲合格乾道三年罷局而存御醫諸科後更不置局而存留醫學科令每舉附省闈別試所解發太常寺掌行其事淳熙十五年命內外白身醫士經禮部先附銓闈試脈義一場三道取其一通者次赴年省試經義三場一十二道以五通爲合格五取其一補醫生俟再赴省試升補八通翰林醫學六通祇候其特補薦補並停紹熙二年復置太醫局銓試依舊格其省試三場以第一場定去留墨義大義等題倣此

補道職舊無試元豐三年始差官考試以道德經靈寶度人經南華真經等命題仍試齋醮科儀祝讀政和間卽州縣學別置齋授道徒蔡攸上諸州選試道職法其業以黃帝內經道德經爲大經莊子列子爲小經提學司訪求精通道經者不問已命未仕皆審驗以聞其業儒而能慕從道教者聽每路於見任官內選有學術者一人爲幹官分詣諸州檢察教習內經道德經置博士聖濟經兼講道徒升貢悉如文士

初入官補志士道職賜褐服藝能高出其徒者得推恩道徒術業精退州守貳有考課殿最罪法陳州學生慕從道教踰月而道徒換籍殆與儒生相半有宋瑀者願改道徒內舍獻神霄玉清萬壽宮雅一篇特換志士俟殿試由是長停以下受賞有差其誘勸之重如此宣和二年學罷

宋史卷一百五十七

皇朝通志

卷一百五十七

三

宋史卷一百五十七考證

選舉志三天章閣侍講王洙言國子監每科場詔下許品官子役然試藝給牒充廣文太學律學三館學

生○臣開鼎按通考作天章閣侍講王洙此洙字應是洙字之譌役然試藝等字亦有錯落

州給常平或係省田宅充養士費○充監本訛允從通考改正

宋史卷一百五十七考證

宋史卷一百五十八

元中書右丞相總裁脫脫等修

選舉志第一百十一

選舉四

銓法上

太祖設官分職多襲五代之制稍損益之凡入仕有貢舉奏廢攝署流外從軍五等吏部銓惟注擬州縣
官幕職兩京諸司六品以下官皆無選文臣少卿監以上中書主之京朝官則審官院主之武臣刺史副
率以上內職樞密院主之使臣則三班院主之其後典選之職分爲四文選曰審官東院曰流內銓武選
曰審官西院曰三班院元豐定制而後銓注之法悉歸選部以審官東院爲尙書左選流內銓爲侍郎左
選審官西院爲尙書右選三班院爲侍郎右選於是吏部有四選之法文臣寄祿官自朝議大夫職事官
自大理正以下非中書省勅授者歸尙書左選武臣升朝官自皇城使職事官自金吾階衛仗司以下非
樞密院宣授者歸尙書右選自初仕至州縣幕職官歸侍郎左選自借差監當至供奉官軍使歸侍郎右
選凡應注擬升移敘復廢補封贈酬賞隨所分隸校勘合格團甲以上尙書省若中散大夫閤門使以上
則列選敘之狀上中書省樞密院得畫旨給告身凡選人階官爲七等其一曰三京府判官留守判官節

度觀察判官

即後來承直郎

其二曰節度掌書記觀察支使防禦團練判官

即後來儒林郎

其三曰軍事判官京府留守

節度觀察推官

即後來文林郎

其四曰防禦團練軍事推官軍監判官

即後來從事郎

其五曰縣令錄事參軍

即後來從政郎其

六曰試銜縣令知錄事

即後來修職郎

其七曰三京軍巡判官司理戶曹司戶法曹司法參軍主簿縣尉

即後來迪功郎

七階選人須三任六考用奏薦及功賞迺得升改凡改官留守兩府兩使判官進士授太常丞

舊亦授正言監察或

太常博士後多不除

餘人太子中允

舊亦授殿中丞

支使學書記防禦團練判官進士授太子中允

或祕書郎

餘人著作佐郎兩

使推官軍事判官令錄事參軍進士授著作佐郎餘人大理寺丞初等職官知縣知錄事參軍防禦團練

軍事推官軍器監判官進士授大理寺丞餘人衛尉寺丞惟判司主簿縣尉七考進士授大理寺丞餘人

衛尉寺丞自節察判官至簿尉考不及格者遞降等凡非登科及特旨者年二十五方注官凡三班院二

十以上聽差使初任皆監當次任為監押巡檢知縣凡流外人三任七考有舉者六員移縣令通判有班

行舉者三員與磨勘凡進納人六考有職官或縣令舉者四員移注四任十考有改官者五人舉之與磨

勘初定四時參選之制凡本屬發選解並以四孟月十五日前達省自千里至五千里外為五等日期離

本處若違限及不如式本判官罰五十直錄事參軍本曹官各殿一選諸州四時具員闕報吏部踰期及

漏誤判官罰七十直錄事參軍以下殿一選在京百司發選解及送闕違期亦有罰諸歸司官奏年滿俟

勅下準格取本司文解赴集流外銓則據其人自投狀申奏亦依四時取解參選凡州縣老疾不任事者許判官錄事參軍糺舉以聞判官錄事參軍則州長吏糺之藩郡監牧每遣朝臣攝守往往專恣太祖始削外權命文臣往蒞之由是內外所授官多非本職惟以差遣爲資歷建隆四年詔選朝士分治劇邑以重其事大理正奚嶼知館陶監察御史王祐知魏楊應夢知永濟屯田員外郎于繼徽知臨清常參官宰縣自此始舊制畿內縣赤次赤畿外三千戶以上爲望二千戶以上爲緊一千戶以上爲上五百戶以上爲中不滿五百戶爲中下有司請據諸道所具板圖之數升降天下縣以四千戶以上爲望三千戶以上爲緊二千戶以上爲上千戶以上爲中不滿千戶爲中下自是注擬以爲資敘又詔周廣順中應出選門州縣官於南曹投狀準格敕考校無礙與除官其敘復者刑部檢勘送銓先是選格未備乾德二年命陶穀等議凡拔萃制舉及進士九經判中者並入初等職官判下者依常選初入防禦團練軍事推官軍事判官者並授將仕郎試校書郎周三年得資卽入留守兩府節度推官軍事判官並授承奉郎試大理評事又周三年得資卽入掌書記防禦團練判官並授宣德郎試大理評事兼監察御史周二年得資卽入留守兩府節度觀察判官並授朝散大夫試大理司直兼監察御史周一年入同類職事諸府少尹又周一年送名中書門下仍依官階分爲四等已至兩使判官以上次任入同類職事者加檢校官或轉運憲

銜凡觀察判官以上緋十五年乃賜紫每任以周年爲限閏月不預每周一年校成一考其常考依令錄例書中上公事闕遺曾經殿罰者卽降考一等若校成殊考則南曹具功績請行酬獎或考滿未代更一周年與成第四考隨有罷者不赴集其奏授職事書校考第並準新格參選自是銓法漸有倫矣帝又慮銓曹惟用資歷而才傑或湛滯乃詔吏部取赴集選人歷任課績多而無闕失其材可副升擢者送中書引驗以聞時仕者愈衆頗委積不可遣開寶初令選人應格者到京卽赴集不必限四時及成次甲又給限南曹八日銓司旬有五日門下省七日自磨勘注擬及點檢謝詞總毋踰一月若別論課績或貢過名須考驗行遣如法及資考未合注擬者不在此限三年詔曰吏多難以求其治祿薄未可責其廉與其冗員重費不若省官益奉州縣官宜以戶口爲率差減其員舊奉月增給五千西川管內諸州凡二萬戶依舊設曹官三員戶不滿一萬置錄事參軍司法參軍各一員司法兼司戶不滿萬戶止置司法司戶司戶兼錄事參軍戶不滿五千止置司戶兼司法及錄事參軍縣千戶以上依舊置令尉主簿凡三員戶不滿千置令尉縣令兼主簿事戶不滿四百止置主簿尉以主簿兼知縣事戶不滿二百止置主簿兼令尉諸道減員亦倣此制西川官考滿得代更不守選嶺表初平上以其民久困苛政思惠養之令吏部銓自襄荊以南州縣選見任年未五十者移爲嶺南諸州通判得攜族之官以廣南僞署官送學士院試書判

稍優則授上佐令錄簿尉初州縣有闕員差前資官□□帝以其紊常制令所在卽上闕員有司除注又謂諸□□官或著吏能悉令罷去良可惜也有司按其歷任三攝無曠敗者以名聞六年從流內銓之請復四時選而引對者每季一時引對之時國家取荆衡克梁益下交廣關土既遠吏多闕是以歲常放選選人南曹投狀判成送銓依次注擬其後選部闕官卽特詔免解非時赴集謂之放選習以爲常而取解季集之制漸廢是冬迺命參知政事盧多遜等以見行長定循資格及泛降制書乃正違異削去重復補其闕漏參校詳議取悠久可用者爲書上之頒爲永式而銓綜之職益有敘矣先是選人試判三道其二全通而文翰俱優爲上一道全通而文翰稍堪爲中三道俱不通爲下判上者職事官加一階州縣官超一資判中依資判下入同類惟黃衣人降一資至是增爲四等三道全次文翰無取者爲中下用舊判下格全不通而文翰又紕繆爲下殿一選太平興國六年詔京朝官除兩省御史臺自少卿監以下奉使從政於外受代而歸者令中書舍人郭贄膳部郎中兼侍御史知雜事滕中正戶部郎中雷德驥同考校勞績論量器材以中書所下闕員擬定引對以遺謂之差遣院蓋前代朝官自一品以下皆曰常參官其末常參者曰未常參官宋自常參者曰朝官祕書郎而下未常參者曰京官舊制京朝官有員數除授皆云替某官或云填見闕京官皆屬吏部每任滿三十月罷任則歲校其考策取解赴集太祖以來凡繼知諸

州若通判若監臨物務官無定員月限既滿有司住給奉料而見釐務者牒有司復文所釐務罷則已但不常參注授皆出中書不復由吏部至是與朝官悉差遣院主之凡吏部黃衣選人始許改爲白衣選人太宗選用庶僚皆得引對觀其敷納可采者超擢之復慮因緣矯飾徼幸冒進詔應臨軒所選官吏並送中書門下考其履歷審取進止舊制州縣官南曹判成流內銓注擬其職事官中書除授然而歷任功過須經南曹考驗遂令幕府官罷任並歸銓曹其特除拜者聽朝旨又詔獄官關繫尤重新及第人爲司理參軍固未精習令長吏察視不勝任者奏判司簿尉對易其官淳化四年選人以南郊赦免選悉集京師帝曰並放選則負罪者幸矣無罪者何以勸乃令經停殿者守常選又詔司理司法參軍在任有犯遇赦及書下考者止與免選更勿超資工部郎中張知白上言唐李嶠嘗云安人之方須擇郡守朝廷重內官輕外任望於臺閣選賢良分典大州共康庶績鳳閣侍郎韋嗣立因而請行遂以本官出領郡今江浙州郡方切擇人臣雖不肖願繼前修帝曰知白請重親民之官良可嘉也然不允其請淳化以前資敘未一及是始定遷秩之制凡制舉進士九經出身者校書郎正字寺監主簿助教並轉大理評事評事轉本寺丞任太祝奉禮郎者轉諸寺監丞諸寺監丞轉著作佐郎或特遷太子中允祕書郎由大理寺丞轉殿中丞由著作佐郎轉祕書監丞資淺者或著作郎優遷者爲太常丞由太子中允祕書郎轉太常丞三丞

著作皆遷太常博士轉屯田員外郎優者爲禮部工部祠部主客由屯田轉都官優者爲戶部刑部度支
金部由都官轉職方優者爲吏部兵部司封司勳其轉郎中亦如之左右司員外郎太平興國中有之後

罕除者左右司郎中惟待制以上當爲少卿者卽爲之由前行郎中轉太常少卿祕書少監由此二官轉

右諫議大夫或祕書監光祿卿諫議轉給事中資淺者或右轉左給事中轉工部禮部侍郎至兵部吏部

轉左右丞由左右丞轉尙書自侍郎以上或歷曹或超曹皆繫特旨諸科及無出身者校書郎正字寺監

主簿助教並轉太祝奉禮郎太祝奉禮郎轉大理評事評事轉諸寺監丞諸寺監丞轉大理寺丞大理寺

丞轉中舍優者爲左右贊善資淺者爲洗馬由幕職爲著作佐郎者轉太子中允由中允贊善中舍洗馬

皆轉殿中丞殿中丞轉國子博士舊除五經者至春秋博士則轉國子博士後罕除由國子博士轉虞部員外郎優者爲膳部由

虞部轉比部優者爲倉部由比部轉駕部優者爲考功或由水部轉司門司門轉庫部爲郎中亦如之至

前行郎中轉少卿監或一轉或二三轉卽爲諸寺太卿監自太卿監特恩獎擢或入給諫焉其爲臺省官

則正言監察比太常博士殿中司諫比後行員外郎起居侍御史比中行員外郎起居轉兵部吏部員外

郎侍御史轉職方員外郎優者爲兵部司封知制誥由正言以上至郎中皆敘遷兩資中行郎中爲左右

司郎中若非次醜勞有遷三資或止一資者至左右司郎中爲知制誥若翰林學士者遷中書舍人舊亦有自

前行郎中除者後
兵吏部止遷諫議

由中書舍人轉禮部以上侍郎入丞郎卽越一資以上

內職學士待制亦如之

御史中丞由諫議

轉者遷工部侍郎由給事轉者遷禮部侍郎由丞郎改者約本資爲其學官司業視少卿祭酒視太卿其
法官大理正視中允贊善凡正言監察以上皆特恩或被舉方除其任館閣三司王府職事開封府判官
推官江淮發運諸路轉運使提點刑獄皆得優遷或以勤效特獎者亦如之兩制龍圖閣三館皆不帶御
史臺官樞密直學士三司副使皆不帶御史臺官及兩省官待制以上不帶少卿監其內職自借職以上
皆循資而遷至東頭供奉官者轉閣門祇候閣門祇候轉內殿崇班崇班轉承制承制轉諸司副使自副
使以上或一資或五資七資或直爲正使者至正使亦如之至皇城使者轉昭宣使昭宣使轉宣慶使宣
慶使轉景福殿使其閣門祇候特恩轉通事舍人通事舍人轉西上閣門副使亦有加諸司副使兼通事
者西上閣門副使轉東上東上轉引進引進轉客省客省轉西上閣門使自此以上亦如副使之遷惟至
東上者又轉四方館使客省使轉內客省使內客省使轉宣徽使或出爲觀察使自內客省使以上非特
恩不授武班副率以上至上將軍其遷歷軍衛如諸司使副焉由牧伯內職改授則觀察使以上爲上將
軍團練使閣門使以上爲大將軍刺史諸司使至崇班爲將軍閣門祇候供奉官爲率殿直以上爲副率
內侍省入內內侍省自小黃門至內供奉官皆歷級而轉至內東頭供奉官轉內殿崇班有轉內侍常侍

者內常侍亦正轉崇班其銓選之制兩府司錄次赤令留守兩府節度觀察判官少尹一選兩府判司兩
畿令掌書記支使防禦團練判官二選諸府司錄次畿令四赤簿尉軍事判官留守兩府節度觀察防禦
團練軍事推官軍監判官進士制舉三選諸府司理判司望縣令九經四選輔州大都督府司理判司緊
上州錄事參軍緊上縣令次赤兩畿簿尉五經三禮三傳三史通禮明法五選雄望州司理判司中州錄
事參軍中縣令次畿簿尉六選緊上州司理判司下州中下州錄事參軍中下縣下縣令緊望縣簿尉學
究七選中州中下州司理判司上縣簿尉八選下州司理判司中縣簿尉九選中下縣下縣簿尉十選太
廟齋郎室長通理九年郊社齋郎掌坐通理十一年凡入官則進士入望州判司次畿簿尉九經入緊州
判司望縣簿尉五經三禮通理三傳三史明法入上州判司緊縣簿尉學究有出身人入中州判司上縣
簿尉太廟齋郎入下州判司中縣簿尉郊社齋郎試銜無出身人入下州判司中下縣簿尉諸司入流人
入下州判司下縣簿尉仁宗初吏員猶簡吏部奏天下幕職州縣官期滿無代者八百餘員而川廣尤多
未代帝曰此豈人情之所樂耶其亟代之帝御後殿視事或至盱食中書請如天禧舊制審官三班院流
內銓日引見毋得過兩人詔弗許自真宗朝試身言書判者第推恩迺特詔曰國家詳覈吏治念其或淹
常選而以四事程其能朕承統緒循用舊典爰命從臣精加詳考其令翰林學士李諮與吏部流內銓以

成資闕爲差擬於是咸得遷官率以爲常後議者以身言書判爲無益迺罷凡磨勘遷京官始增四考爲六考舉者四人爲五人曾犯過又加一考舉吏各有等數得被舉者須有本部監司長史按察官乃得磨勘須到官一考方許薦任凡選人年二十五以上遇郊限半年赴銓試命兩制三員鑠試于尙書省糊名謄錄習辭業者試論試詩賦詞理可采不違程式爲中格習經業者人專一經兼試律十而通五爲中格聽預選七選以上經三試至選滿京朝官保任者三人補遠地判司簿尉無舉主者補司士參軍或不赴試亦無舉者永不預選京官年二十五以上歲首赴試于國子監考法如選人中格者調官兩任無私罪而有部使州守倅舉者五人入親民舉者三人惟與下等釐物務官初州郡多闕官縣令選尤猥下多爲清流所鄙薄每不得調乃詔吏部選幕職官爲知縣又立舉任法以重令選勅諸路察縣之不治者然被舉者日益衆有司無闕以待之中書奏罷舉縣令法未幾有言親民之任輕則有害於治法不宜廢復令指劇縣奏舉舉者二人必一人本部使既居任復有舉者始得遷否則如常遷毋輒升補常參官已授外任勿奏舉然銓格煩密府史姦弊尤多而磨勘者待次外州或經三二歲乃得改官往往因緣薄勞求截甲引見有詔自是弗許神宗欲更制度建議之臣以爲唐銓與今選殊異雜用其制則有留礙煩紊之弊始刊削舊條務從簡便因廢南曹而併歸之于銓初審官西院與東院對掌文武尋改從吏部而左右選

分爲祖宗以來中書有堂選百司郡縣有奏舉雖小大殊科然皆不隸于有司暨元豐罷奏舉闕屬之銓曹而堂選亦不領於中書一時更制必欲公天下而詒永久於是除免選之恩重出官之試定賞罰之則酌資廩之宜凡設試以待命士而入之銓注者自廩補銓試之外有進士律義武臣呈試及試刑法官等而銓試所受爲特廣中書言選人守選有及三年方遇恩放選者或適歸選而遽遇恩旣爲不均且蔭補免試注官以不習事多失職試者又止試詩豈足甄才已受任而無勞績舉薦及免試恩法須再試書判三道然亦虛文熙寧四年遂定銓試之制凡守選者歲以二月八月試斷按二或律令大義五或議三道後增試經義法官同銓曹撰式考試第爲三等上等免選注官優等升資如判超格無出身者賜之出身自是不復試判仍去免選恩格若歷任有舉者五人自與免試注官任子年及二十聽赴銓試其試中或不能試選人滿三歲許注官惟不得入縣令司理司法任子年及三十方許參注若年及二十授官已及三年出官亦不用試若秩入京朝卽展任監當三年在任有二人薦之免展選人應改官必對便殿薦制五人一引不過二人至是待次者多有踰二年乃得引帝閱其留滯詔每甲引四人以便之帝因論郡守謂宰臣曰朕每思祖宗百戰得天下今州郡付之庸人常切痛心卿輩謂何如而得選任之要文彥博請擇監司而按察之陳升之曰取難治劇郡擇審官近臣而責以選才宜可得也初置審官西院磨勘武

臣並如審官院格而舊審官曰東院御史中丞呂公著言英宗時文臣磨勘例展一年至少卿監止武臣橫行以上及使臣猶循舊制固未嘗如文臣有所節抑也又仁宗時嘗著令正在防禦團練以上非邊功不遷今及十年嘗歷外任卽許轉亦未如少卿監之有限止也詔兩制詳定王珪等言文武兩選磨勘已皆均用四年請今自正任刺史以上轉官未滿十年若有顯效者自許特轉其非次恩惟許改易州鎮以示旌寵有過則比文臣展年從之知審官西院李壽朋言皇城使占籍者三十餘員多領遙郡而尙得從磨勘遷刺史團練防禦使每進一級增奉錢五萬廩粟雜給如之實爲無名請於皇城使上別置二使名視前行郎中量給奉祿其遙郡刺史團練防禦使並從朝廷賞功擢用更不序遷詔遙郡刺史團練防禦使並以十年磨勘至觀察留後止應官止而有功若特恩遷者不以法諸司使副每磨勘皆用常制雖軍功亦無別異而閣門內侍輩轉皆七資帝謂左右近習非勳勞而得超躐至營立功者乃無優遷非制也使副嘗有軍功應轉許特超七資閣門通事舍人帶御器械兩省都知押班管幹御藥院使臣七資超轉法皆除之後客省引進四方館各置使二員東西上閣門共置使六員客省引進閣門副使共八員副使磨勘如諸司使法使有闕改官及五期者樞密院檢舉歷閣門職事有犯事理重者當遷日除他官閣門四方館使七年無私過未有闕可遷者加遙郡特旨與正任者引進四年轉團練使客省四年轉防禦使

皆著爲定制爲先是御史乞罷堂選曾公亮執不可王安石曰中書總庶務今通判亦該堂選徒留滯不能精擇百官者哉元豐四年堂選堂占悉罷初有司屬職卑者不在吏銓率命長吏舉奏都水監主簿李士良言沿河幹集使臣凡百六十餘員悉從水監奏舉往往不諳水事干請得之迺詔東西審官及三班院選差於是悉罷內外長吏舉官法明年令吏部始立定選格其法各隨所任職事以入仕功狀循格以俟擬注如選巡檢捕盜官則必因武舉武學或緣舉薦或從獻策得出身之人他皆倣此自官制行以舊少卿監爲朝議大夫諸卿監爲中散大夫祕書監爲中大夫故事兩制不轉卿監官每至前行郎中郎超轉諫議大夫前行郎中於階官爲朝請大夫諫議大夫於階官爲太中大夫帝謂磨勘者古考績之法所與百執事共之而禁近獨超轉非法也於是詔待制以下並三年一遷仍轉朝議中散中大夫三官自是遷敘平允凡開府儀同三司至通議大夫無磨勘法太中大夫至承務郎皆應磨勘待制以上六年遷兩官至太中大夫止承務郎以上四年遷一官至朝請大夫止朝議大夫以七十員爲額有闕以次補之選人磨勘用吏部法遷京朝官則依新定之制除授職事官並以寄祿官品高下爲法凡高一品以上者爲行下一品者爲守二品以下者爲試品同者不用行守試哲宗時御史上官均言今仕籍合文武二萬

八千餘員吏部逆用兩任闕次而仕者七年乃成一任當清其源宜加裁抑朝廷下其章議之司諫蘇軾議曰祖宗舊法凡任子年及二十五方許出官進士諸科初命及已任而應守選者非逢恩不得放選先朝患官吏不習律令欲誘之讀法乃減任子出官年數去守選之格槩令試法通者隨得注官自是天下爭誦律令於事不爲無補然人人習法則試無不中故蔭補者例減五年而選人無復選限吏部員今年已用後四年夏秋闕官冗至此亦極矣宜追復祖宗守選舊法而選滿之日兼行試守之科此亦今日之便也事報聞三省言舊經堂除選人惟嘗歷省府推官臺諫寺監長貳郎官監司外悉付吏部銓注凡格所應入遞升一等以優之被邊州軍其城砦巡檢都監監押砦主防巡諸路捕盜官及三萬緡以上課息場務凡舊應舉官員闕許仍奏舉時通議大夫以上有以特恩磨勘轉官而比之舊格或實轉兩官至三四官者右正言王覲謂非所以愛惜名器請官至太中大夫以上毋用磨勘遷轉詔待太中大夫應磨勘者止於通議大夫餘官止中散大夫中散以上勞績酬獎合進官者止許回授子孫特命特遷不拘此制初武臣戰功得賞凡一資則從所居官遞遷一級於是以皇城使驟上遙刺或入橫行且闔門使以上等級相比而輕重絕遠因樞密院言乃詔闔門左藏庫副使得兩資客省皇城使得三資止許一轉減年者許回授親屬又小使臣磨勘轉崇班者歲毋過八十人內臣昭宣使以上無磨勘法惟押班以上則取

裁餘里五年磨勘紹聖初改定銓試格凡攝官初歸選散官權官歸司若新賜第皆免試每試者百人惟取一人入優等中書奏裁二人爲上等五人爲中等崇寧以後又復元豐制而蔭補者須隸國學一年無過罰乃試銓若在學試嘗再入等卽免試其公私試嘗居第一得比銓試推恩政和間著爲令既而臣僚言進士中銓格者每二百人得優恩不過五七人又或闕上等不取而朝廷取隸國子試格用之銓注及今五年而得上等優恩者二百四十人免試者尙在其外是蔭補隸學者優於累試得第之人矣於是詔在學嘗魁一試者許如舊恩餘止令免試注官吏部侍郎彭汝礪乞稍責吏部甄別能否凡京朝官才能事效苟有可錄尙書暨郎官銓擇以聞三省分三年考察之高則引對次卽試用下者還之本選若資歷舉薦應入高而才行不副許奏而降其等凡皆略許出法而加升黜歲各毋過三人初選人改官歲以百人爲額元祐變法三人爲甲月三引見積累至紹聖初待次者二百八十餘人詔依元豐五日而引一甲甲以三人歲毋過一百四十人俟待次不及百人別奏定又令歷任通及三者而資序已入幕職令錄方許舉之改官吏部言元豐選格經元祐多所紛更於是選集後先路分遠近資歷功過悉無區別踰等超資惟其所欲詔旨既復元豐舊制而辟舉一路尙存請盡復舊法以息僥倖乃罷辟舉崇寧元年詔吏部講求元豐本制酌以時宜刪成彙格使才能閎闊兩當其實吏部言堂選寔名及舉官員闕內外共約三

千餘目元祐法選人得升資以上賞及參選射闕不許遣人代注今皆罷從元豐法所當損益者其知邊近蠻夷州如威茂黎瓊等及開封府曹掾平準務諸路屬官在京重課場務京城內外廂官戶部幹官黜院權貨務將作監管幹公事黃河都大內外權茶官凡干刑獄及筦庫繁劇皆不可罷舉若御史臺主簿檢法官協律郎豈可泛以格授諸如此類仍舊辟舉從之惟諸路毋得直牒差待闕得替官權攝初未改官制大率以職爲階官如以吏部尙書爲階官而同中書門下平章事則其職也至於選人則幕職令錄之屬爲階官而以差遣爲職名實混淆甚矣元豐未及革正崇寧二年刑部尙書鄧洵武極言之遂定選人七階曰承直郎曰儒林郎曰文林郎曰從事郎曰通仕郎曰登仕郎曰將仕郎政和間改通仕爲從政登仕爲修職將仕爲迪功而專用通事登仕將仕三階奏補未出官人承直至修職須六考迪功七考有官保任而職司居其一乃得磨勘坐愆犯則隨輕重加考及舉官有差時權姦柄國僥倖並進官員益濫銓法留礙臣僚官吏員增多蓋因入流日衆熙寧郊禮文武奏補總六百一十一員元豐六年選人磨勘改京朝官總一百三十有五員考之吏部政和六年郊恩奏補約一千四百六十有畸選人改官約三百七十有畸欲節其濫惟嚴守磨勘舊法而今之磨勘有局務減考第有川遠減舉官有用酬賞比類有因大人特舉有託事到闕不用滿任有約法違礙許先次而改凡皆棄法用例法不能束而例日益繁苟不

裁之將又僭徒而未可計也請詔三省若吏部舊有止法自當如故餘皆毋得用例迺詔惟川廣水土惡地許減舉如制餘悉用元豐法既而又言元豐進納官法多所裁抑應入令錄及因賞得職官止與監當該磨勘者換授降等使臣仍不免科率法意深矣邇者用兵東南民入金穀皆得補文武官理選如官戶與士大夫涇渭並流復其戶不受科輸是得數千緡於一日而失數萬斛於無窮也況大戶得復則移其科於下戶下戶重貧州縣緩急責辦何人此又弊之大者不聽初宗室無參選法祖宗時尚選法一二不爲常制徽宗欲優宗室多得官一曰參選即在合選名次之上而膏粱之習往往貪恣出任州縣黷貨虐民議者頗陳其害欽宗卽位臣僚復以爲言始令不注郡守縣令仍與在部人通理名次高宗建炎初行都置吏部時四選散亡名籍莫考始下諸道州府軍監條具屬吏寓官之爵里年甲出身歷任功過舉主到罷月日編而籍之然自兵難以來典籍散失吏緣爲私申明繁苛承用踳駁保任滋衆阻會無期參選者苦之迺令凡文字有不應於今而按牘參照明白從郎官審覆長貳予決小不完者聽行有徇私挾情則令御史糾之又詔京畿京東河北京西河東士夫在部注授雖銓未中而年及者皆聽注官二年命京官赴行在者令吏部審量非政和以後進書頌及直赴殿試之人乃聽參選在部知州軍通判僉判及京朝官知縣監當以三年爲任者權改爲二年以赴調者萃東南選法留滯故也又詔州縣久無正官者

聽在選人申部審度勝闕差注紹興元年起居郎胡寅言今典章文物廢墜無幾百司庶府不無闕者莫如吏部姑置侍郎一員郎官二員胥吏三十人則所謂磨勘封敘奏薦常程之事可按而舉矣詔曰六官之長佐王理邦國者其惟銓衡乎亂離以來士大夫流徙有徒跣而行者在注授勝闕姦弊日滋寒士困苦甚可憫焉宜令三省議除其弊嚴立賞禁仍選能吏以主之御史臺常加糾察於是三省立八事曰注擬藏闕申請徵幸去失艱難刷闕滅裂闕會淹延審量疑似給自邀求保明退難令長貳機棍之又詔館職選人到任及一年通理四考並自陳改京官二年呂頤浩言近世堂除多侵部注士人失職宜倣祖宗故事外自監司郡守及舊格堂除通判內自察官省郎以上館職書局編修官外餘闕并寺監丞法寺官大院等武臣自準備將領正副將以上其部將巡尉指使以下並歸部注從之又復文臣銓試以經義詩賦時議斷案律義爲五場願試一場者聽榜首循一資武臣呈試合格者並聽參選三年右僕射朱勝非等上吏部七司敕令格式自渡江後文籍散佚會廣東轉運司以所錄元祐吏部法來上乃以省記舊法及續降指揮詳定而成此書先是侍御史沈與求言今日矯枉太過賢愚同滯帝曰果有豪傑之士雖自布衣擢爲輔相可也苟未能考其實不若姑守資格迺命吏部注授縣令准用合格之人五年詔凡注擬並選擇非老疾及未嘗犯贓與非緣民事被罪之人時建議者云親民莫如縣令今率限以資格

雖貪懦之人一或應格則大官大邑得以自擇請詔監司郡守條上劇邑遴選清平廉察之人爲之旣而
又詔知縣依舊法止用兩任關升通判資序明年侍御史周祕言今有無舉員考第因近臣薦對卽改官
升擢實長奔競望詔大臣自今惟賢德才能之人餘並依格注擬廷臣或請以前宰執所舉改官易以司
馬光十科之目歲薦五員中書難之詔前宰執所舉京削不理職司而已三十二年吏部侍郎凌景夏言
國家設銓選以聽羣吏之治其掌於七司著在令甲所守者法也今升降於胥吏之手有所謂例焉長貳
有遷改郎曹有替移來者不可復知去者不能盡告索例而不獲雖有強明健敏之才不復致議引例而
不當雖有至公盡理之事不復可伸貨賄公行姦弊滋甚嘗觀漢之公府有辭訟比尙書有決事比比之
爲言猶今之例今吏部七司宜置例冊凡換給之期限戰功之定處去失之保任書填之審實奏薦之限
隔酬賞之用否凡經申請或堂白或取旨者每一事已命郎官以次擬定而長貳書之于冊永以爲例每
半歲上于尙書省仍關御史臺如是則巧吏無所施而銓敘平允矣有議減任子者孝宗以祖宗法令難
於遽改令吏部嚴選試之法自是初官毋以恩例免試雖宰執亦不許自陳回授舊制任子降等補文學
及恩科人皆免至是悉試焉凡未經銓中及呈試者勿堂除雖墨敕亦許執奏舊制宗室文資與外官文
臣參注窠闕武資則不得與武臣參注但注添差至是始聽注釐務闕七年始命銓試不中年四十呈試

不中年三十者令寫家狀讀律法官陳師正言請令宗室恩任子弟出官日量行銓試如士夫子弟之法多立其額而優爲之制遂詔自今宗室曾經應舉得解者許參選餘並行銓試三人取二其三試終場不中人聽不拘年限調官淳熙元年參知政事龔夬良言官人之道在朝廷則當量人才在銓部則宜守成法法本無弊例實敗之法者公天下而爲之者也例者因人而立以壞天下之公者也昔之患在於用例破法今之患在於因例立法諺稱吏部爲例部今七司法自晏敦復裁定不無疎略然守之亦可以無弊而徇情廢法相師成風蓋用例破法其害小因例立法其害大法常斬例常寬今法令繁多官曹冗濫蓋緣此也望令衷集參附法及乾道續降申明重行考定非大有牴牾者弗去凡涉寬縱者悉刊正之庶幾國家成法簡易明白賊墨之姦絕冒濫之門塞矣於是重修焉旣而吏部尙書蔡洸以改官奏薦磨勘差注等條法分門編類名吏部條法總類十一月七司敕令格式申明成書淳熙三年中書舍人程大昌言舊制選人改秩後兩任關升通判兩任關升知州知州兩任卽理提刑資序除授之際則又有別以知縣資序隔兩等而作州者謂之權發遣以通判資序隔一等而作州者謂之權知上而提刑轉運亦然隔等而授是擇材能也結銜有差是參用資格也今得材能資格俱應選者爲上其次則擇第二任知縣以上有課績者許作郡初任通判以上許作監司第二任通判以上許作職司庶幾人法並用從之寧宗

慶元中重定武臣關升格先是初改官人必作令謂之須入至是復命除殿試上三名南省元外並作邑

後又命大理評事已改官未歷縣人並令親民一次著為令紹定元年臣僚上言銓曹之患員多闕少注

擬甚難自乾道嘉定以來嘗命選部職官窠闕各於元出闕年限之上與展半年用闕歷年寢久入仕者

多即今吏部參注之籍文臣選人武臣小使臣校尉以下不下二萬七千餘員大率三四人共注一闕宜

其膠滯壅積而不可行乞命吏部錄參司理司法令丞監當酒官於元展限之上更展半年從之七年監

察御史陳垓建言乞申戒飭銓法十弊一曰添差數多破法耗財謂倅武幕職參議機宜總戎鈐轄監押之類二曰抽差員眾

州縣廢職謂監司帥守幕屬多差見任州縣他官權攝三曰攝局違法蠹政害民謂監司帥守徇私差權幕屬等職四曰須入不行徼幸撓法

謂初改官人必作知縣今多規免荷圖京局五曰奏辟不應奔競日甚謂在法未經任人不許奏辟今或

躡求倅武遂使不曾歷縣之人冒當郡寄六曰改任巧捷紊亂官常謂在法已授差遣人不得干求換易今既授是官復謀他職辭卑居尊棄彼就此七曰薦舉不公多歸請託八曰借

補繁多官資泛濫九曰瘵曠職守役心外求十曰匿過居官翫視國法謂曾經罪犯必俟赦宥今則既請遭彈劾初未經赦者經營差遣

制軍功補授之人自合從軍非老疾當汰無參部及就辟之法比年諸路奏功不實實緣窠名許令到部

及諸司紛然奏辟實礙銓法建炎兵興雜流補授者眾有曰上書獻策曰勤王曰守禦曰捕盜曰奉使其

名不一皆闕帥假便宜承制之權以擅除擢有進士徑補京官者有素身冒名即為耶大夫者乃詔從軍

乾隆四年校刊

應賞者第補右選以清流品又有民間願習射者籍其名姓守令月一試取藝優者如三路保甲法區用紹興初嘗以兵革經用不足有司請募民人賞補官帝難之參知政事張守曰祖宗時授以齋郎今之將仕郎是也知樞密院季回曰此猶愈科率於民乃許補承節郎承信郎諸州文學至進義副尉六等後又給通直郎修武郎秉義郎承直至迪功郎其注擬資考磨勘改轉陞補封敘並依奏補出身法毋得注令錄及親民官和議之後立格購求遺書亦命以官凡歿於王事無遺表致仕格法者聽奏補本宗異姓親子孫弟姪文臣將仕郎武臣承信郎餘親上州文學或進武校尉所以褒恤忠義也又以兩淮荆襄其土廣袤募民力田凡白身勸民墾田及七十五頃者與副尉五百頃補承信郎孝宗卽位命帥臣監司郡守嘗任兩府及朝官等遣親屬進貢等第補授登仕郎將仕郎推恩理爲選限淳熙三年詔罷鬻爵除歛歲民願入粟賑饑有裕於衆聽補官餘皆停自是進納軍功不理選限登仕郎諸州助教不許出官止於贖罪及就轉運司請解而已

宋史卷一百五十九

元 中 書 右 丞 相 總 裁 脫 脫 等 修

選舉志第一百十二

選舉五 銓法下

遼州銓 補蔭 流外補

川峽閩廣阻遠險惡中州之人多不願仕其地初銓格稍限以法凡州縣幕職每一任近卽一任遼川峽廣南及沿邊不許挈家者為遠餘悉為近既分川峽為四路廣南東西為二路福建一路後增荆湖南一路始立八路定差之制許中州及土著在選者隨意就差名曰指射行之不廢太平興國初選人孟巒擬賓州錄事參軍詣匭訴冤坐流海島自是得遠地者不敢辭既而詔川峽嶺南福建注授計程外給兩月期違則本州不得放上遣送闕下除籍不齒或被疾則所至陳牒長吏按驗付以公據廢瘡未損則條狀以聞雍熙四年又詔選人年六十勿注遠地非土人而願者聽凡任廣蜀福建州縣並給續食初嶺南闕官往往差攝至是詔州長吏試可者選用之罷秩奏送闕下與出身淳化間又詔嶺南攝官各路惟許選二十員以承之餘悉罷歸始令嶺南幕職許攜族行受代不得寄留至道初申詔劍南州縣官不得以族

行敢有妄稱妻爲女奴搆以之官除名初榮州司理判官鄭蛟冒禁搆妻之任會蜀賊李順構亂其黨田子宜攻陷城邑而蛟捕得之擢爲推官至是知梓州張雍奏其事上帝戮蛟而有是詔咸平間以新恩循梅四州瘴地選荆湖福建人注之吏部銓擬官悉標其過犯自是凡注惡地令不須書又詔規避遐遠違期受代勘鞫責罰就移遠地神宗更制始詔川峽福建廣南之官罷任迎送勞苦其令轉運司立格就注免其赴選於是八路自常選知州而下轉運司置員闕籍具書應代時日下所部郡衆示之凡見任距受代半年及已終更者許用本資序指射有司受而閔之定其應格當差者上之審官東院流內銓審覆如令卽奏聞降勅若占籍本路或游注此州皆從其便惟不許官本貫州縣及鄰境其多擬銓次悉如銓格無願注者上其闕審官而在選者射之武臣之屬西院三班院者令樞密院放此具制後荆湖南亦許就注或言土人知州非便法應遠近迭居而川人許連任本路常獲便家實太偏濫王安石曰分遠近均勞佚也中州士不願適遠四路人樂就家便用新法卽兩得所欲況可以省吏卒將迎官府浮費邪何正臣又言蜀人之在仕籍者特衆今自郡守而下皆得就差一郡之官土人大半窳窳吏民皆其鄉里親信難於徇公易以合黨請收守令闕歸之朝廷而他官兼用土人量立分限庶經久無弊兼聞差注未至盡公願許提刑司案案牘究察之奏上法不爲改但申嚴提刑司互察之法元祐初御史上官均言定差不均

之弊有七諸路赴選中試乃差八路隨意取射一也諸路吏部待試需次率及七年方成一任八路就法若及七年已更三任二也八路雖坐停罷隨許射注其待次者又許權攝祿無虛日而吏選無愆犯亦大率四年方再得祿四也士人得射奏名者免試就注家便年高力憊不復望進往往營私廢職五也仕久知識既多士人就射本路不無親故請託六也八路監司地遠而專設漫滅功過名次人亦不敢爭校故有力者多得優便而孤寒滯却七也請併八路差盡歸吏部爲便既而吏部亦請用常格差除遂悉歸之銓紹聖復行舊制且許八路人應補出官卽轉運司試中注闕重和間臣僚又言其弊轉運以軍儲吏祿供饋支移爲己責而視差注爲末務往往付之主案吏胥定擬而簽廳視成書判而已注闕之高下視賄之厚薄無賂則定差之隨脫漏言詞隱落節目及其上部必致退却參會重上又半歲矣以是闕多而不調者衆宜督典領之官歲終取吏部退難有無多寡爲之課而賞罰之庶可公注擬而絕吏昧乃命立考課法建炎初詔福建二廣闕並歸吏部惟四川仍舊制初累朝以廣南地遠利入不足以資正官故使舉人兩與薦選者試刑法於漕司以合格者注攝兩路謂之待次攝官更兩任無過則錫以眞命至是雖歸之吏部踰年無願就者復歸漕司自神宗朝宗室不許調川陝官至是宗室多避難入蜀乃聽於四路注擬六年詔川陝轉運司每季孟月上旬集注爲定法焉八年直學士院勾龍如淵上疏謂行都去蜀萬里

而比歲窳闕歸之朝廷寒遠之士困抑者眾願參酌前制稍還漕銓之舊立為定格使與堂除不相侵紊遂命以小郡知州監以下仍付漕司差注其選人改官詣司公參理為到部人稱便焉

補廕之制凡奏戚屬太皇太后皇太后皇后本服期親奉禮郎大功守監簿小功初等幕職官元豐前試大理評事

總麻知令錄元豐前試校書郎異服親亦如之有服女之夫則本服大功以上女夫知令錄小功判司主簿或尉

總麻試監簿周功女之子知令錄孫及大功女之子判司主簿或尉曾孫及大功女之孫小功女之子並

試監簿其非所生子若孫各降一等總麻女之子試監簿每祀南郊誕聖節太皇太后皇太后並錄親屬

四人皇后二人非遇推恩而特旨賜官不用此法凡諸妃期親守監簿餘判司主簿或尉異姓親試監簿

婉容以上有服親才人以上小功親並試監簿凡大長公主長公主主夫之期親判司主簿或尉餘試

監簿子補殿中丞孫光祿寺丞壻太常寺太祝外孫試銜知縣凡親王壻大理評事外孫初等職官女之

子壻試監簿宗室總麻以上女之夫試銜知縣祖免判司主簿或尉其願補右職依換官法奉禮郎即右

侍禁幕職官即左班殿直知令錄即右班殿直判司主簿尉即奉職試監簿即借職凡文臣三公宰相子

為諸寺丞期親校書郎餘親本宗大功至總麻服者以屬遠近補試銜使相參知政事樞密院使副使宣徽使子為

太祝奉禮郎期親校書正字餘親補試銜節度使僕射尚書太子三少御史大夫文明殿學士資政殿大

學士子校書郎正字期親寺監主簿餘親試銜三司使翰林資政殿侍講龍圖閣學士樞密直學士太常宗正卿中丞丞郎留後觀察使內客省使子正字期親寺監主簿餘親試銜及齋郎兩省五品龍圖閣直學士待制三司副使知雜御史子寺監主簿期親試銜餘親齋郎諸司大卿監子寺監主簿期親試銜小卿監兼職者子試銜期親齋郎凡武臣宰相子爲東頭供奉官使相知樞密院子爲西頭供奉官期親皆左侍禁餘屬自左班殿直以下第官之樞密使副使宣徽節度使子西頭供奉官期親右侍禁餘屬自右班殿直以下第官之六統軍諸衛上將軍節度觀察留後觀察使內客省使子右侍禁期親右班殿直餘屬三班奉職以下第官之客省使引進防禦使團練使四方館使樞密都承旨閣門使子右班殿直期親三班奉職餘屬爲差使殿侍諸衛大將軍內諸司使樞密院諸房副承旨子三班奉職期親借職餘屬爲下班殿侍諸衛將軍內諸司副使樞密分房副承旨子爲三班借職凡兼職在館閣校理檢討王府記室翊善侍講三司主判官開封府判官推官江淮發運諸路轉運始許奏及諸親提點刑獄惟許奏男其嘗以贓抵罪得復故官文臣至郎中及員外郎任館閣職武臣至諸司副使諸衛將軍者止許贖子若孫一人尙在謫籍者弗預太祖初定任子之法臺省六品諸司五品登朝嘗歷兩任然後得請始減歲補干牛齋郎員額齋郎須年貌合格誦書精熟乃得奏太宗踐極諸州進奏者授以試銜及三班職初推恩授散

試官者不得赴選太平興國二年乃詔授試銜等人特定七選集歲爲定令凡誕聖節及三年大祀皆聽
奏一人而淳化改元恩文班中書舍人武班大將軍以上並許廢補如遇轉品許更蔭一子由是奏薦之
恩始廣每誕聖節朝臣多請奏疏屬不報至道二年始限以翰林學士兩省五品尙書省四品以上賜一
子出身此聖節奏薦例也先是任子得攝太祝奉禮未幾卽補正員帝謂膏粱之子不十年坐致閭籍是
年悉授同學究出身赴選集真宗東封祀汾陰進奉人已官者進秩未官者令翰林試藝與試銜齋郎借
職公主郡縣主以下諸親外命婦入內者亦有恩慶而東封恩則提點刑獄朝臣使臣皆得奏一人奏戚
屬舊無定制有求補閤門祇候者真宗以宣贊之職非可以恩澤授乃詔自今求敘遷者至殿直止大中
祥符二年以門廢授京官年二十五以上求差使者令於國學受業及二年審官院與判監官考試其業
及以名聞內諸司使副授邊任官者陛辭時許奏子詔樞密院定其制凡妾名孫及從子爲子求蔭者坐
之七年帝幸南京詔臣僚逮事太祖者賜一子恩澤令翰林學士李維等定自給諫觀察使以上得請初
轉運使辭日許奏一人天禧後惟川廣福建者聽餘路再任始得奏又詔承天節恩例所蔭子孫不許以
他親及已食祿者特許西京分司官郊禋奏廕一子自是分務西洛者得以爲例南京則否仁宗慶厯中
義損奏補入仕之路凡選人遇郊赴銓試其不赴試亦無舉者永不預選罷聖節奏廕學士以下遇郊

恩得奏大功以上親再遇郊得奏小功以下親郎中帶職員外郎初遇郊蔭子若孫再郊及期親四遇郊聽蔭大功以下親初得奏而年過六十無子孫廢期親其皇親大將軍以上妻再遇郊亦許之武臣蔭例倣此凡蔭長子孫皆不限年諸子孫須年過十五若弟姪須過二十必五服親乃許已嘗蔭而物故者無子孫祿仕聽再蔭自是任子之恩殺矣英宗卽位郡縣致貢奉人悉命以官知諫院司馬光建言監司太守遣親屬奉表京師不問官職高下親屬近遠推恩至班行幕職權知州軍或所遣非親亦除齋郎及差使殿侍此蓋國初承五代姑息藩鎮之弊因循不革爵祿本待賢才今此等受官誠爲太濫縱不能盡罷其人若五服內親等第受以一官其無服屬量賜金帛庶少致濫官之失然詔令已行不從其議時方患官冗言者皆謂由三歲一磨勘其進甚亟易至高位故獲蔭者衆乃令待制以上自遷官後六歲無故則復遷之有過益展年至諫議大夫止京朝官四歲磨勘至前行郎中止少卿監限七十員有闕以前行郎中久次者補之少卿監以上遷官聽旨仁宗雖罷聖節恩而猶行之妃主神宗旣裁損臣僚奏蔭以官掖外戚恩尤濫故稍抑之舊諸妃遇聖節奏親屬一人間一年許奏二人郊禮許奏一人嬪御每遇郊奏一人兩遇聖節與一奏後定諸妃每遇聖節并郊許奏有服親一人淑儀充儀婕妤貴人遇郊許奏小功以上親一人位號別而資品同者許比類奏薦舊公主每遇聖節郊禮奏夫之親屬一人公主生日許奏

一人後罷生日恩所奏須有服親皇親妻兩遇郊許奏期親一人後罷奏舊郡縣主遇郊許奏親生子右班殿直若庶子及其夫之親兩遇郊許奏借職一人後親子惟注幕職孫若庶子兩遇郊方許奏一人夫之親屬勿奏舊臣僚之妻爲國夫人者得遺表恩後除之妃嬪公主以下非有服親之婿不許奏旣而曾布等又言臣僚陳請恩澤宜有定制乃許見任二府歲乞差遣一人宰臣樞密使兼平章事因事罷者陳乞轉官一人指射差遣二人餘執政官並各一人待制以上乞差遣遷學士者又一人三路廣桂安撫使知成都府梓州差遣一人親孫子循一資廣南轉運提點刑獄奏子孫或期親合入官一人成都梓利夔路差遣一人子孫循一資中書檢正官樞密院檢詳官至員外郎在職及二年遇大禮許補親屬中書堂後官提點五房官雖未至員外聽奏補豈宜欽極邊烟瘴知州聽奏子孫一人凡因戰陣物故及歿於王事許官其子孫又功臣繪像之家如無食祿人則許特奏子孫一人入官旣定銓試法任子中選者得隨銓擬注其入優等往往特旨賜進士出身元祐元年詔諸軍致仕停放人其遺表恩該及子而過五年自陳者慮有冒濫毋推恩職事官卿監以下應任子者須官至朝奉郎乃許奏三年定宰臣執政初遇郊許奏本宗異姓親各一人次遇郊奏數如初願用其恩與有官人則許轉官并循資或乞差遣惟不得轉入朝官循入支掌應奏承務郎殿直以上許換升一任不得升入通判餘官三遇郊許奏有官人舊制應奏

兩人止者次郊止許奏有官人其後遇郊更合補蔭者並準此爲間隔之次已致仕而遇大禮應奏補者再奏而止宣仁太皇太后諭輔臣曰近已裁減入流本家恩澤宜減四分之一呂公著等曰陛下臨朝同聽斷本殿恩澤自不當限數先來所定止與皇太后同等豈可更損宣仁曰裁減恩澤凡自上而始則均一矣乃詔曰官冗之患實極于今苟非裁入流之數無以清取士之原吾以眇身率先天下今後每遇聖節大禮生辰合得親屬恩澤並四分減一皇太后皇太妃同之哲宗既親政復舊凡乞致仕而不願轉官者中大夫至朝奉郎及諸司使許奏補本宗有服親一人自奉議郎內殿承制以下許與有服親一人恩例惟中大夫中散大夫諸司使帶遙郡者蔭補外仍與有服親恩例若致仕未受勅而身亡者在外以陳乞至門下省日在京以得旨日亦許乞有服親恩例一人初任子法以長幼爲序若應奏者有廢疾或嘗犯私罪至徒或不肖難任從仕許越奏其次至是始刪去格令長幼爲序四字五年定親王女郡主蔭補法遇大禮許奏親屬一人所生子仍與右班殿直兩遇奏子或孫與奉職卽用奏子孫恩廻授外服親之夫及夫之有服親者有官人轉一官毋得升朝選人循一資無官者與借職須期以下親乃得奏吏部言皇太妃遇大禮以應奏恩與其親屬而服行不應法詔用皇后緦麻女之子爲比補借職舊法母后之家十年一奏門客而太妃未有法紹聖初詔皇太妃用興龍節奏親屬恩廻授門客自是太后每及八年

太妃十年奏門客一名與假承務郎許參選如年數未及凡恩皆毋回授元符後命婦生皇子許依大禮
奏有服親三品以上三人宗室緦麻親許視異姓蔭孫凡蔭補異姓惟執政得奏如簽書樞密院事雖依
執政法而所蔭卽不理選限後因轉官礙止法者許回授未仕子孫而貪買者又請回授異姓有司每沮
止之然亦多御筆許特補政和間尙書省定回授格謂無官可轉或可轉而官高不欲轉或事大而功效
顯著爲一格許奏補內外白身有服親官有止法不可轉功績次著爲一格許奏本宗白身祖免親官不
甚高而功績大爲一格許奏本宗白身有服親官不甚高功不甚大爲一格而分爲三一與內外有官有
服親一與有官有服本宗親一與有官有服者之子孫凡爲六等宣和二年殿中侍御史張汝舟言今法
所該補奏與先朝同昔之官至大夫厯官不下三五十年而今闕三五年有已至大夫者矣諸翼將軍至
武翼郎須出官三十年方許奏補今文武官奏補未嘗限年此太濫也至若中大夫以下及武功武翼大
夫已求致仕而不及受勅乃格其恩於是有身謝而未受勅者其家或至匱哀須限然不及親受而不與
霽恩者多矣此太吝也欲自今中大夫至帶職朝奉郎以上雖遇郊恩入官不及二十年皆未許蔭補雖
已經奏薦再遇郊恩年仍未及者亦寢其奏庶抑其濫至於文武官及大夫以上嘗求休致而身謝在出
勅前欲並許奏蔭以補其不及尙書省文武官致仕雖不及受勅若無曾受蔭人自有遺表恩又寺監長

貳至開封少尹係用職事蔭補不合限年餘從之崇寧以來類多泛賞如曰應奉有勞厥頌可采職事脩舉特受特轉者皆無事狀可名而直以與之孟昌齡朱勛父子童貫梁師成李邦彥等凡所請求皆有定價故不三五年選人有至正郎或員外帶職小使臣至正副使或入遙郡橫行者而蔡京拔用從官不論途轍一言合意卽日持橐又優堂吏往往至中奉大夫或換防禦觀察使由此任子百倍欽宗卽位赦恩覃轉惟許宗室其文武臣止令回授有官有服親且詔非法應回授及特許者毋錄用高宗中興重定補陞法內外臣僚子孫期親大功以下及異姓親隨文武各有等秩見職官志建炎元年詔宰執子弟以恩澤任待制以上者並罷紹興四年詔文武太中大夫以上及見帶兩制職名依舊不限年內無出身自授官後以及十五年及三十不係宮觀責降之人聽依條補陞七年中書舍人趙思誠言孤寒之士名在選部皆待數年之闕大率十年不得一任今親祠之歲任子約四千人是十年之後增萬二千員科舉取士不與焉將見寒士有三十年不得調者矣祖宗時仕至卿監者皆實以年勞功績得之年必六十身不過得恩澤五六人厥後私謁行橫恩廣有年未三十而官至大夫者員數比祖宗時不知其幾倍而恩例未嘗少損有一人而任子至十餘者此而不革實蠹政事望議革其弊會思誠去國議遂寢舊法惟贓罪不許任子新令併及私罪徒有司以爲拘礙者多遂罷新令又詔宰執侍從致仕遺表惟補總麻以上親

毋及異姓二十二年以武臣多出軍中爵秩高而族姓少凡有薦奏同姓皆期功異姓皆中表閭巷之徒附會以進命須經統轄長官結罪保明詭冒者連坐之帝於后妃補蔭每加裁抑詔后族不得任從官孝宗卽位思革冗官初詔百官任子遇郊恩權免奏薦年七十人遇郊不許奏子俄又詔未奏者許一名隆興元年以張宋卿言蔭補冗濫立爲定法凡員外轉正郎正郎轉侍從卿監之至中大夫每初遇郊則聽任一子再經則不許復請遺表之恩各減其一減年之類亦去其半至府史之屬武功之等亦倣此差降之乾道三年詔非泛補官如宗室戚里女夫捧香異姓上書獻頌隨奉使補官陣亡女夫異姓給使減年之類轉至合奏薦官候致仕與奏一名嘗奏者不再奏四年詔宗室祖免親諸衛將軍武功大夫至武翼郎以上遇大禮奏補親屬並依外官法著爲令九年詔文臣帶職員外郎及武翼大夫以上生前未嘗奏薦者與致仕恩澤一名卽已嘗奏薦而被蔭人身亡許再請應朝奉郎武翼郎以上補授及三十年者亦與一名又詔武臣嘗任執政官遇郊聽補文資於是恩數視執政者亦得之蓋戚里宗王與夫攀附之臣皆爭以文資祿其子不可復正矣自隆興著酬賞實歷對用轉官之法遷官稍緩至是郊恩之奏視爲減半然猶未大艾也淳熙九年始詔減任子員數自宰相執政侍從卿監正郎員外郎分爲五等每等降殺以兩酌中定爲止數武臣如之宰相十人執政八人侍從六人中散大夫至中大夫四人帶職朝奉郎至

朝議大夫二人通減三分之一於是冗濫漸革宣宗慶元中立補蔭新格自使相以下有差文臣中大夫武臣防禦使以下不許遺表推恩嘉泰初以官冗恩濫凡宗女夫授官者依舊法終身止任一子兩府使相不得以郊恩奏門客著爲令

凡流外補選五省御史臺九寺三監金吾司四方館職掌每歲遣近臣與判銓書就尙書同試律三道中者補正名理勞考三館秘閣楷書皆本司試書札中書覆試補受後以就試多懷挾傳授乃鎖院巡搜糊名凡試百司吏人問律及疏既考合格復令口誦所對以防其弊其自敘勞績臣僚爲之陳請特免口誦謂之優試得優試者率中選後遂考試百司人歲以二十人爲額毋得僥倖求優試爲職掌者皆限年授外州司戶勒留有至諸衛長吏兩省主事者學士審官審刑院登聞檢鼓院糾察刑獄司皆選取諸司吏人或以年限或理本司選然中書制勅及五院員闕多卽遣官特試書劄驗視材質制勅院須堂後官以下親屬五院須父祖有官者樞密院亦如之惟本院試驗宣徽院三司各省閤門三班院皆本司召補至其首者出職凡出職者樞密院三司皆補借職以上餘或補州縣內廷諸司主吏三司大將亦有補三班借職者中書主事以下三司勾覆官以上各帶諸州上佐樞密院主事以上皆帶同正將軍餘多帶遠地司戶簿尉先是勒留出官及選限皆無定制其隸近司有裁三二年卽堂除外官者咸平末命翰林學士

承旨宋白與兩制御史中丞同詳定之白等請令中書沿堂五院行首副行首依舊制補三班通引堂門直省發勅驗使臣遇闕依名次補正名三年授勒留官遇恩則一年授後七年出官宣徽院貼房至都勾押官軍將至知客押衙各六等並以次補至勾押官押衙及五年以上出官補三班或簿尉學士院孔目官補正三年授勒留官遇恩一年授後五年出官驅使官補正四年授勒留官遇恩二年授後八年出官三館孔目官書直庫表奏守當官四年授勒留官遇恩二年授後守當官八年書直庫表奏官七年孔目官六年出職其職遷補者許通計年考有奉錢官者更留三年典書楷書五選集準格三館入流歲數已少無得以諸色優勞減選閣門客省承受驅使官轉次第並依本司舊例補正名四年授勒留官遇恩則二年授後七年出授簿尉其行首並如舊制審刑院本無職掌名額於諸司選差正名令不以有無勒留審官五年審刑三年出官以前諸司請自今勒留並比七選集授官例赴選日不以州縣地望為資敘從之後又定客省承受行首歲滿補殿直奉職御書院翰林待詔書藝祇候十年以上無犯者聽出職太祖嘗親閱諸司流外人勒之歸農者四百人開寶間詔流外選人經十考入令錄者引對方得注擬驅使散從官伎術人資考雖多亦不注擬堂後官多為姦賊欲更用士之在令錄簿尉選者充之或不屑就而所選不及數乃如舊制雍熙時以堂後官充職事官入謝外不赴朝參見宰相禮同胥吏端拱初以河南府

法曹參軍梁正儼楚丘縣主簿喬蔚等五人爲將作監丞充中書堂後官拔選人授京官爲堂吏自此始

乾隆四年校刊

宋史卷一百五十九 選舉志

八

宋史卷一百五十九

宋史卷一百六十

元 中 書 右 丞 相 總 裁 脫 脫 等 修

選舉志第一百十三

選舉六

保任
考課

保任之制銓注有格槩拘以法法可以制平而不可以擇才故予奪升黜品式具在而又責官以保任之凡改秩遷資必視舉任有無以爲應否至其職任優殊則又隨時立目往往特詔公卿部刺史牧守長官卽所部所知揚其才識而任其能否上自侍從臺諫館學下暨錢穀兵武之職時亦以薦舉命之蓋不膠於法矣國初保任未立限制建隆三年始詔常參官及翰林學士舉堪充幕職令錄者各一人條析其實毋以親爲避旣而舉者頗因緣爲姦用知制誥高錫奏請許人許告得實則有官者優擢非仕宦者授以官或賞緡錢不實則反坐之自是或特命陶穀等舉才堪通判者或詔翰林學士及常參官舉京官幕職州縣正員堪升朝者藩鎮奏掌書記多越資敘則詔歷兩任有文學方得奏又令諸道節度觀察使於部內官選才識優茂德行敦篤者各二人防禦團練使各舉一人遣詣闕庭觀其器業而進用焉凡被舉擢官於誥命署舉主姓名他日不如舉狀則連坐之太宗尤嚴牧守之任詔諸道使者察部內履行著聞政

術尤異文學茂異者州長吏擇判司簿尉之清廉明幹者具名以聞驛召引對授之知縣又令闔屬都司理參軍廉慎而明於推鞠者舉之雍熙二年舉可升朝者始令翰林學士兩省御史臺尙書省官舉之清化元年令宰相以下至御史中丞各舉朝官一人爲轉運使迺詔曰國家詳求幹事之吏外分主計之司雖曰轉輸得兼按察總覽郡國職任尤重物情舒慘靡不由之尙慮微功因當責實凡轉運使釐革庶務平反獄訟漕運金穀成績居最及有建置之事果利於民令歲終以聞非殊異者不得條奏又詔三司三館職事官已升擢者不在論薦其有懷材外任未爲朝廷所知者方得奏舉始令內外官凡所舉薦有變節踰矩者自首則原其聯坐之罪太宗聽政之暇每取兩省兩制清望官名籍擇其有德譽者悉令舉官所舉之人須析其爵里及歷任殿最以聞不得有隱如舉狀者有賞典無驗者罪之又嘗謂宰臣曰君子小人趨向不同君子畏慎不欺暗室名節造次靡渝小人雖善談忠信而履行頗僻在官黷貨罔畏刑罰如薛智周以待御史守藝政以賄成聚斂無已其土產富於羅州民謂之羅端公則爲治可知矣卿等職在掄材今今朝臣舉官已是逐末更不擇舉主何由得人也供奉官劉文質嘗入奏察舉兩浙部內官高輔之李易直艾仲孺梅詢高鼎高貽慶姜嶼戚綸八人有治迹並降璽書褒諭帝曰文質所舉皆良吏也特遷文質爲西京作坊副使咸平間祕書丞陳彭年請用唐故事舉官自代詔祕書直學士馮拯陳堯叟

參詳之丞等上言往制常參官及節度觀察防禦刺史少尹畿赤令并七品以上清望官授詔三日內於四方館上表讓一人以自代其表付中書門下每官闕以見舉多者量而授之今官品制度沿革不同請令兩省御史臺尚書省六品以上諸司四品以上授詔具表讓一人自代於閣門投下方得入謝在外者授詔三月內具表附驛以聞遂著爲令真宗初屢詔舉官未立常制大中祥符二年詔幕職州縣官初任未闕吏事須三任六考方得論薦五年始定制自翰林學士以上常參官歲各舉外任京朝官三班使臣幕職州縣官一人著其治行所宜任令閣門御史臺歲終會其數如無舉狀卽具奏致罰於冬季以差出亦須舉官後乃入辭諸司使副承制崇班曾任西北邊川廣鈐轄親民者亦做此制諸路轉運使副提點刑獄官知州通判奏舉部內官屬則不限人數具在任勞績無由可舉及顯有踰濫者亦須指述不得顧避以次年二月二十五日以前到京違期則都進奏院以名聞論如不申考帳法三司使副舉在京掌事京朝官使臣凡被舉者中書歲置二籍疏其名銜下列歷任功過舉主姓名及薦舉數一以留中書一以五月一日進內明年籍內仍計向來功過及舉主數使臣卽樞密院置籍兩省尚書省御史臺官凡出使迴須採訪所至及經歷隣近郡官治迹善惡以聞轉運使副提點刑獄官知州通判赴闕各具前任部內官治迹能否如隣近及所經州縣訪聞善惡亦許同奏先於閣門投進方得入見凡朝廷須人才及欲理

州縣弊政劇務卽籍內視舉任及課績數多而資歷相當者差委於宣勅內盡列舉主姓名或任內幹集特與遷秩苟不集事本犯雖不去官亦移閑慢僻遠地內外羣臣所舉及三人有成績仰中書樞密院具姓名取旨甄獎如併舉三人俱不集事坐罪不至去官亦仰奏裁當行責降或得失相參亦與折當天聖六年詔審刑院舉常參官在京刑法司皆爲詳議官大理寺詳斷刑部詳覆法直官皆舉幕職州縣曉法令者爲之自請試律者須五考有舉者乃聽試試律三道疏二道又斷中小獄案二道通者爲中格時舉官擢人不常其制國子監闕講官則詔諸路轉運使舉經義通明者或欲不次用人嘗詔近臣舉常參官歷通判無贓罪而才任繁劇者欲官諸邊要亦嘗詔節度使至關門使知州軍鈐轄諸司使舉殿直以上材勇堪邊任者或令三司使下至天章閣待制舉奏之邊有警則詔諸轉運使提點刑獄舉所部官才堪將帥者三路知州通判縣令則詔近臣舉廉幹吏選任之毋拘資格至于文行之士錢穀之才刑名之學各因時所求而薦焉自天聖後進者頗多始戒近臣非受詔毋輒舉官又下詔風厲毋以薦舉爲阿私其任用已至部使者毋得復薦失舉而已擢用聽自言不實弗爲負初選人四考有舉者四人得磨勘遷京官始詔增爲六考舉者五人須有本部使者御史王端以爲法用舉者兩人得爲縣令爲令無過譴遷職事官知縣又無過譴遂得改京官乃是用舉者兩人保其三任也朝廷初無參伍考察之法偶幸無過輒

信而遷之是以碌碌之人皆得自進因仍弗革其弊將深乃定令被薦爲令任內復有舉者始得遷否則如常選毋輒升補時增設禁限常參官已授外任毋得奏舉京官見任知州通判升朝官兵馬都監諸司副使以上及在京員外郎嘗任知州通判諸司副使嘗任兵馬都監者乃聽舉流內銓復裁內外臣僚歲舉數文臣待制至待御史武臣自觀察至諸司副使舉吏各有等數毋得輒過而被舉者須有本部監司長使按察官乃得磨勘又限到官一考方得薦知雜御史觀察使以上歲舉京官不得過二人其常參官毋得復舉自是舉官之數省矣定監司以所部州多少劇易之差爲舉令數非本部勿舉其後又增舉主三員蓋官冗之弊浸極故保薦之法大抵初略而後詳也英宗時御史中丞賈黯又言今京朝官至卿監凡一千八百餘員而吏部奏舉磨勘選人未引見者至二百五十餘人且以先朝事較之方天聖中法尙簡選人以四考改官而諸路使者薦部吏未有限數而在京臺閣及常參官嘗任知州通判者雖非部吏皆得薦時磨勘改官者歲才數十人後資考頗增而知州薦吏視屬邑多少裁定其數常參官不許薦士其條約漸繁而改官者固已衆矣然引對猶未有待次者也皇祐中始限監司奏舉之數其法益密而磨勘待次者已不減六七十人皇祐及今纔十年耳而猥多至於三倍向也法疏而其數省今也法密而其數增此何故哉正在薦吏者歲限定員務充數而已如郡守歲許薦五人而歲終不滿其數則人人以爲

遺己當舉者避謗畏議欲止不敢此所以多而真才實廉未免屈於無能也宜明詔天下使有人則薦不
必滿所限之數天子納其言下詔申勅中外臣僚歲得舉京官者視元數以三分率之減一分舉職官有
舉者三人任滿選如法所以分減舉者數省京官也判吏部流內銓蔡抗又言奏舉京官人度二年引對
乃可畢計每歲所舉無慮千九百員被舉者既多則磨勘者愈衆且今天下員多闕少率三人而待一闕
若不稍改除吏愈難臣以爲可罷知雜御史觀察使以上歲得舉官法從之自是舉官之數彌省矣故事
初入二府舉所知者三人將以觀大臣之能後來請謁之說勝而薦者或不以公四年詔中書樞密院舉
人皆明言才業所長堪任何事以副朕爲官擇人之意神宗卽位乃罷兩府初入舉官凡薦任之法選人
用以進資改秩京朝官用以升任舊悉有制熙寧後又從而損益之故舉皆限員而歲又分舉制益詳矣
定十六路提點刑獄歲舉京官縣令額又詔察訪使者得舉官選人任中都官者舊無舉薦始許其屬有
選人六員者歲得舉三員旣而帝以舊舉官往往緣求請得之乃革去奏舉而槩以定格詔內外舉官法
皆罷令吏部審官院參議選格元祐初左司諫王巖叟言自罷辟舉而用選格可以見功過而不可以見
人材中外病之於是不得已而別爲之名以用其平日之所信故有踏逐申差之目踏逐實薦舉而不與
同罪且選才薦能而謂之踏逐非雅名也況委人以權而不容舉其所知豈爲通術遂復內外舉官法及

司馬光爲相奏曰爲政得人則治然人之才或長於此而短於彼雖臯夔稷契各守一官中人安可求備

故孔門以四科論士漢室以數路得人若指瑕掩善則朝無可用之人苟隨器授任則世無可棄之士臣

備位宰相職當選官而識短見狹士有恬退滯淹或孤寒遺逸豈能周知若專引知識則嫌於私若止循

資序未必皆才莫若使有位達官各舉所知然後克叶至公野無遺賢矣欲乞朝廷設十科舉士一曰行

義純固可爲師表科有官無官人皆可舉二曰節操方正可備獻納科舉有官人三曰智勇過人可備將帥科舉文武有官人四

曰公正聰明可備監司科舉知州以上資序五曰經術精通可備講讀科有官無官人皆可舉六曰學問該博可備顧問科

上七曰文章典麗可備著述科同上八曰善聽獄訟盡公得實科舉有官人九曰善治財賦公私俱便科舉有官人十

曰練習法令能斷請讞科同上應職事官自尙書至給舍諫議寄祿官自開府儀同三司至大中大大夫職自

觀文殿大學士至待制每歲須於十科內舉三人仍具狀保在中書置籍記之異時有事須材卽執政案

籍視其所嘗被舉科格隨事試之有勞又著之籍內外官闕取嘗試有效者隨科授職所賜誥命仍備所

舉官姓名其人任官無狀坐以繆舉之罪所貴人人重慎所舉得才光又言朝廷執政惟八九人若非交

舊無以知其行能不惟涉循私之嫌兼所取至狹豈足以盡天下之賢才若採訪毀譽則情僞萬端與其

聽遊談之言曷若使之結罪保舉故臣奏設十科以舉士其公正聰明可備監司誠知請屬挾私所不能

乾隆四年校刊 宋史卷一百六十 選舉志 四

無但有不如所舉譴責無所寬宥則不敢妄舉矣詔皆從之二年殿中侍御史呂陶言郡守提封千里生聚萬衆所係休戚而不察能否一以資格用之凡再爲半刺有薦者三人則得之矣不公不明十郡而居三四是天下之民半失其養請令內外從歲舉可爲守臣者各三人略資序而採公言庶其可以擇才比民也詔內外待制太中大夫以上歲舉再歷通判資序堪任知州者一人籍于吏部遇三路及一州而四縣者其守臣有闕先差本資序人次案籍以所薦者填之侍御史韓川言近太中大夫以上歲舉守臣而薦所不及雖課入優等皆未預選此倚薦以爲信也然太中大夫以上率在京師唯馳鶩請求因緣宛轉者常多得之迹遠地寒雖歷郡久治狀著課入上考偶以無薦則反在通判下不許入三路及四縣州且州以縣之多少而分簡劇亦未爲盡蓋繁簡在事不在縣固有縣多而事不繁亦有縣少而事不簡者願參以考績之實著爲通令仍不以縣之多少而爲簡劇詔吏部立法以聞已而歲舉積久吏部無闕以授四年遂罷太中大夫以上歲舉法惟奉詔乃舉焉紹聖元年右司諫朱勅言選人初受任雖能法未得舉爲京官而有挾權善請求者職官縣令舉員既足又併改官舉員求之詔歷任通及三考而資序已入幕職令錄方許舉之改官初神宗罷薦舉惟舉御史法不廢熙寧二年王安石言舉御史法太密故難於得人帝曰豈執政者惡言官得人耶於是中書悉具舊法以奏安石曰舊法凡執政所薦卽不得爲御史執

政取其平日所長者薦之則其人不復得言事矣蓋法之弊如此帝乃令悉除舊法一委中丞舉之而稍
略其資格趙抃曰用京官恐非體又不委知雜專任中丞亦非舊制帝曰唐以布衣馬周爲之用京官何
爲不可知雜屬也委長爲是侍御史劉述奏曰舊制舉御史必官升京朝資入通判衆學士本臺丞知雜
更互論薦每一闕上二人而擇用一人今專委中丞則愛憎由己公道廢於私恩或受權臣之託引所親
厚擅竊人主威福此大不便弗聽既改法著作佐郎程顥王子韶謝景福方爲條例司屬官中丞呂公著
薦之遂以太子中允權監察御史裏行宣仁太后聽政詔范純仁爲諫議大夫唐叔問蘇轍爲司諫朱光
庭范祖禹爲正言章惇曰故事諫官皆薦諸侍從然後大臣稟奏今得無有近習援引乎太后曰大臣實
皆言之非左右也惇曰臺諫所以糾大臣之越法者故事執政初除苟有親戚及嘗被薦引者見爲臺臣
則皆他徙防壅弊也今天子幼冲太皇太后同聽萬機故事不可違於是呂公著以范祖禹韓縝司馬光
以范純仁皆避親嫌光曰純仁祖禹實宜在諫列不可以臣故妨賢蓋臣避位惇曰縝光公著必不私他
日有懷姦營國者例此而引其親黨蔽塞聰明恐非國之福純仁祖禹請除他官仍令侍從以上各得奏
舉於是詔尙書侍郎給舍諫議中丞待制各舉諫官二員純仁改除天章閣待制祖禹爲著作佐郎後又
命司諫正言殿中侍御史監察御史並用升朝官通判資序元祐六年御史中丞鄭雍言舊御史闕臺官

得自薦所以正名舉職也自官制行御史中丞與兩省分舉而今之兩省官屬皆與聞門下中書政事其自舉非故事且有嫌乞專委臺官若稍涉私自黜典詔御史中丞舉殿中侍御史二員翰林學士中書舍人同舉監察御史二員給事中亦舉二員雍正言風憲之地責任宜專若臺屬多由他薦恐非責任之本意詔中丞更舉監察御史二員八年侍御史楊畏言風憲之任人主寄耳目焉御史進用宰執不得預顧令兩省屬官舉之非是遂寤前命武臣薦舉立格有枚別職任而舉之者有槩名材武而入之銓格者又其上則謀略膽勇可備統眾諳練兵事可任邊寄之類惟邊要任使隸樞密院餘則審官西院三班院按格注之其後雖時有更易而薦舉之所重輕選用之所隸屬多規此立制建炎兵興多事以中外有文武材略出倫或淹布衣或沉下僚命侍從監司郡守搜訪各舉所知州縣禮遣赴行在又詔舉忠信寬博可使絕域與智謀勇毅能將萬眾者不以有無官資並詣登聞檢院自陳才謀勇略可使者赴御營司量才錄用或命庶僚各舉內外官及布衣隱士才堪大用者擢爲輔弼協濟大功或命侍從舉可爲臺諫者或舉縣令或舉宗室刺史舉忠義之士能恢復土疆保護王室者師臣監司守令舉所部見任寄居待次文武官有智謀及武藝精熟者及訪求國初功臣後裔中興以來忠義死節之家子孫四年以朝班多闕詔臺諫左右司郎官以上各薦士二人仍令執政同選在外侍從雖在謫籍無大過而政事才學實可用

者亦與召擢紹興二年廷臣言今右武之世雖二三大將各立雋功微賤之中尙多奇士願廣加薦舉延
問恢復之計帝然其言詔觀察使以上各薦可爲將帥者二人樞密籍錄以備選用又以中原士大夫隔
絕滋久流徙東南者媒寡揆疎多致沉滯令侍從搜訪以聞三年復司馬光十科時遣五使宣諭諸道令
訪廉潔清修可以師表吏民者尋詔宣諭官所薦並俟終更令入對升擢以勸能吏復用舊制侍從官受
命三日舉官一員自代中書門下省籍記姓名每闕官卽以舉狀多者進擬內外武臣舉忠勇智略可自
代者一人如文臣法五年命自監察御史至侍從官舉曾經治縣聲績顯著者爲監司郡守不限員數遇
闕選除才堪大縣者通舉二十人不限資序十年以南渡後人材萃於兩浙而屬吏薦員甚狹增部使者
薦舉改官之額歲五員十四年命守臣終更入見各舉所部縣令一人二十二年右諫議大夫林大鼐言
國初常參官皆得舉人不限內外亦無員數南渡之初恩或非泛人得僥倖有從軍而改秩者有捕盜而
改秩者有以登對而改秩者今朝廷無事謹惜名器惟薦舉一路貪躁者速化廉靜者陸沉今欲取考第
員數增減以便之增一任者減一員十考者用四十二考者用三十五考者用二如減舉法須實歷縣令
不得仍請獄司其或負犯殿選自如常坐上有應此格者行無玷缺年亦蹉跎無非孤寒老練安義分之
士望付有司條上以弭奔競二十五年命侍從舉知州通判治跡顯著者以補監司之闕仍保任終身犯

贓及不職與同罪二十九年聞人滋又請凡在官歷任及十考以上無公私罪雖舉劄不及格許降等升改或疑其太濫則取吏部累年改官酌中之數立爲限隔舉狀年勞參酌並用於是其議中書舍人洪遵給事中王晞亮等上議曰本朝立薦舉之法必使歷任六考所以遲其歲月而責其赴功必使之舉官五員所以多其保任而必其可用今如議臣所請則有力者惟圖見次無材者苟冀終更出官十餘年可以坐待京秩此不可一也今欲減改官分數以待無舉劄者則當被舉之人必有失職淹滯之歎此不可二也京官易得劄至郎位任子之恩愈不可減非可以救入流之弊此不可三也夫祖宗之法非有大害未易輕議今一旦取二百年成法而易之此不可四也臣以爲如故便滋議遂寢三十年以武臣被薦者衆命內外大臣所舉統制統領官各遷一秩將官以下所舉者令兩府籍記右正言何溥言比命侍從薦舉縣令如聞選人不可授大邑止籍記姓名夫論人才不拘資格豈堪爲縣令而有小大之別乎今所舉者才也非官也願無拘劇易早與選除歲一行之十年之後天下多賢令矣乃詔薦舉守令遇見闕依次除授如已授差遣者任滿取旨帝謂輔臣曰朕有一人材簿臣下有所薦揚退則記其姓名遇有選用搜而得之無不適當孝宗嘗命內外選在任閑居待次官舉可任監司郡守之人以資序分二等一見今可任一將來可任注籍于三省仍作圖進呈以憑除擢又以武選之衆拔擢未廣立謀略沉雄可任大計寬

猛適宜可使御衆臨陣驍勇可鼓士氣威信有聞可守邊郡思智精巧可治器械凡五等科目令曾歷軍功觀察使以上各舉二人其通習典章可掌朝儀練達民事可任郡寄諳曉財計可裕民力持身廉潔可律貪鄙詞辯不屈可備奉使五等令非軍功觀察使以上舉之並隨類指陳實迹毋得別撰褒詞隆興二年廷臣上言謂國朝視文武爲一體故有武臣以文學換授文資文臣以材略智謀換右職當邊寄者蓋文武兩塗情本參商若文臣總幹戎事不換武階則終以氣習相忌有不樂從者矣今兵塵未息方厲恢復之圖願博采中外有材智權略可以臨邊可以制閩者做舊制改授從之乾道以後又選大將之家能世其武勇者武舉及第武藝絕倫可爲將佐者會廷臣言曰方今國家之兵東至淮海西至川蜀殆百餘萬其間可爲將帥者不在其上則在其下而朝廷未知振其氣表其才也今文臣有三人舉主則爲之循資再任五人則爲之改秩而武臣無有焉古語曰三辰不軌擢士爲相纒夷不恭拔卒爲將宜令都統制視監司者歲舉武臣二人視郡守者歲舉一人以智勇俱全爲上善撫士卒專有膽勇者次之不拘將校士卒優以獎擢被舉人有臨戰不用命者與文臣犯入己贓者同併坐舉主帝可其奏仍著爲法三年禮部尙書趙雄請令侍從臺諫兩省於知縣資序以上歲薦堪充郡守通判資序以上歲薦監司仍用漢朝雜舉之制三省詳加考察詔如所請仍不以內外雜舉歲各五人保舉官及五員以上列銜共奏帝曰薦

舉本欲得人又恐干請反長奔競龔茂良言三代良法亦不免於弊今欲精選監司郡守非薦舉何由知之帝曰若今雜舉則雖衆論愈允又經中書考察而後除授亦博采遴選之道也吏部請武舉軍班武藝特奏名出身并任巡檢駐泊監押知若比附文臣關升條令並實厯六考有舉主四人內監司一人聽關升親民正副將兩任有舉主二人內一人監司亦與關升凡升副將視文臣初任通判資序再關升正將視文臣次任通判資序關升路分副都監視文臣初任知州資序小郡州鈐轄視文臣次任知州資序孝宗以歲舉京官數濫於是內外薦舉改官員數六部寺監長貳戶部右曹郎官等三分減一禮部國子監長貳如上條外又減半前宰執歲各減二員諸道轉運提刑提舉常平茶鹽學事司總領茶馬鑄錢司安撫制置司及諸路州軍並四分減一通籍之數彌省矣光宗時言者謂被薦者衆朝廷疑其私而不信病其泛而難從縱有賢才不免與僥倖者併棄請條約之乃命帥守監司毋獨員薦士時薦舉固多得人然有或乏廉聲而舉充廉吏或素昧平生而舉充所知或不能文而舉可備著述遂命臣僚自今有人則薦無人則闕其尤繆妄者覺察之嘉泰二年令內外舉薦並具實跡以聞自是監舉之弊稍革嘉定十二年命監司守臣舉十科政績所知自代露章列薦並籍記審察任滿則取其舉數多有政績行誼者升擢之宋初內外小職任長吏得自奏辟熙寧間悉罷歸選部然要處職任如沿邊兵官防河捕盜重課額務屬

之類尊又立專法聽舉於是辟置不能全廢也既出常格則儉人往往因之以行其私元祐以來屢行屢止蓋處心公明則得以用其所知固爲良法苟循私昧理則才不爲用請屬賄賂無所不有矣又孰若付之銓曹而槩以公法者哉建炎初詔河北招撫河東經制及安撫等使皆得辟置將佐官屬行在五軍并御營司將領亦辟大小使臣諸道郡縣殘破之餘官吏解散諸司誘人填闕皆先領職而後奏給付身於是州郡守將皆假軍興之名換易官屬有罪籍未敘復守選未參部者朝論患之乃令釐正使歸部依格注擬惟陝西五路兩河兩淮京東等路經略安撫司屬官聽舉辟餘路並罷四年初置諸鎮撫使管內州縣官並許辟置言者謂遠方之民理宜綏撫如峽州四縣多用軍功或胥吏補知縣欄吏補監稅民被其害遂命取峽州江陵府荊門軍公安軍州縣官闕委安撫司奏辟命御史臺仍舊辟舉承務郎以上官充主簿檢法官不限資序紹興二年臣僚又以比年帥守監司辟官攬奪部注朝廷不能奪銓曹不能違又多畀以添差不釐務之闕上自監司倅貳下至掾屬給使一郡之中兵官八九員一務之中監當六七員數倍於前日存無事之官食至重之祿所以重困生民請裁省其闕否則以宮廟之祿畀之遂命自今已就辟差理責任者毋得據舊闕以妨下次六年詔諸道宣撫司僚屬許本司奏辟內京官以二年爲任願留再任者取旨自兵興所辟官有經十年不退者故條約焉二十六年詔已注知縣縣令不許奏辟孝宗

初詔內外有專法辟闕並仍舊乾道九年命監司帥臣非有著令不得創行奏辟所辟毋得擬已差之闕違者御史臺察之淳熙三年命自今極邊知縣縣令闕官專委本州守臣奏辟毋得仍舊權攝其見攝官留意民事百姓愛服者許不以有無拘礙特行奏辟七年詔未中銓未歷任初改秩人毋得差辟著爲令理宗寶慶三年以廣南東西路通判幕職教授等官法未嘗許辟者須於各官將滿之前具闕如未有代者卽聽申部出闕滿三月無人注擬申省下本路通判以下京官闕從諸司奏辟選人闕從漕司定差作邑未滿三年作倅未滿二考不許預期奏辟他闕諸司屬官不許輕自辟置或久闕正官許令次官暫攝待朝命方許奏辟淳熙十一年以御史臺嚴申銓法禁監司郡守辟親戚爲屬吏又選人無考第舉主不及三員及納粟人雖有考第舉主並不聽辟爲令寶祐二年戒諸路監司帥闕不應辟而輒辟者辟主及受辟之官並與銷秩

考課宋初循舊制文武常參官各以曹務閑劇爲月限考滿卽遷太祖謂非循名責實之道罷歲月敘遷之制置審官院考課中外職事受代京朝官引對磨勘非有勞績不進秩其後立法文臣五年武臣七年無賊私罪始得遷秩曾犯贓罪則文臣七年武臣十年中書樞密院取旨其七階選人則考第資歷無過犯或有勞績者遞遷謂之循資凡考第之法內外選人周一歲爲一考欠日不得成考三考未替更周一

歲書爲第四考已書之續不得重計初著令州縣戶口準見戶十分增一刺史縣令進考若耗一分降考一等建隆三年又以科賦有欠踰十之一及公事曠違嘗有制受罰者皆如耗戶口降考吏部南曹又舉周制請州縣官益戶增稅受代日並書於籍凡千戶以下能增百戶減一選減及三選以上令賜章服主簿升秩進階能歸復逋亡之民者亦如之是年縣始置尉頒捕盜條給以三限限各二十日三限內獲者令尉等第議賞三限外不獲尉罰一月奉令半之尉三罰令四罰皆殿一選三殿停官令尉與賊鬪而能盡獲者賜緋升擢乾德四年詔諸縣令佐有能招攜勸課以致蕃庶民籍租額出其元數減一選仍進一階太宗勵精圖治遣官分行郡縣廉察官吏河南府法曹參軍高丕等皆以不勝任免官復詔諸道察舉部內官第其優劣爲三等政績尤異爲上職務粗治爲中臨事弛慢所泄無狀者爲下歲終以聞先是諸州掾曹及縣令簿尉皆戶部南曹給印紙麻子俾州郡長吏書其續用愆過秩滿送有司差其殿最詔有司申明其諸州別給公據者罷之判吏部南曹董澹言有司批書印麻多所闕略令漏書一事殿一選三事降一資自是職事官依州縣給南曹麻子天下知州通判京朝官釐務於外者給以御前印紙令書課績時蔣元振知白州爲政清簡民甚便之秩滿衆輒詣部使乞留凡十有八年未受代姚益恭清白有才幹知鄆州須城縣鞭扑不施境內大治澹化初採訪使各言其狀下詔褒嘉賜元振絹三十四匹粟五十石

賜益恭對衣銀帶絹五十四四年始分置磨勘之司審官院掌京朝官考課院掌幕職州縣官廢差遣院
令審官總之乃詔郡縣有治行尤異吏民畏服居官廉恪蒞事明敏鬪訟衰息倉廩盈羨寇盜剪滅部內
清肅者本道轉運司各以名聞當驛置赴闕親問其狀加旌賞焉其貪冒無狀淹延鬪訟踰越憲度盜賊
競起部內不治者亦條其狀以聞當行貶斥以翰林學士錢若水樞密直學士劉昌言同知審官院考覆
功過以定升降又以判流內銓翰林學士蘇易簡知制誥王旦等知考課院重其職也凡流內銓主常調
選人考課院主奏舉及歷任有殿最者明年帝親選京朝官三十餘人自書戒諭之言于印紙曰勤政愛
民奉法除姦方可書爲勞績且謂錢若水曰奉法除姦之言恐諸臣未喻因而生事可語之曰除姦之要
在乎奉法至道初罷考課院併流內銓二年遣使廉察諸道長吏得八人莅事公正惠愛及民皆降璽書
獎諭真宗卽位命審官院考京朝官殿最引對遷秩京朝官引對磨勘自此始先是每恩慶百僚多得序
進帝始罷之惟郊祀恩許加勳階爵邑帝察羣臣有聞望者得刑部郎中邊肅等二十有四人令闕門再
引對觀其辭氣文藝並得優升景德初令諸道辨察所部官吏能否爲三等公勸廉幹惠及民者爲上幹
事而無廉譽清白而無治聲者爲次畏懦貪猥爲下仁宗尤矜憐下吏以銓法選人有私罪皆未聽磨勘
諭近臣凡門謝弗至與對敷失儀其毋以爲罪又曰州縣秩卑而長吏多鈎摭細故文致之法使不得自

進朕甚憫焉宰相王曾曰引對時陛下酌其輕重而稍擢之則下無滯才矣其後選人有東鹿縣尉王得說歷官寡過書考最多而無保任者帝察其孤貧特擢爲大理寺丞天聖時詔文武臣僚非有勳德善狀不得非時進秩非次罷免者毋以轉官帶職爲例兩省以上舊法四年一遷官今具履歷聽旨京朝官磨勘年限有私罪及歷任嘗有罪先以情重輕及勤績與舉者數奏聽旨若無私犯而著最課及有舉者皆第遷之自請釐物務于京師五年一磨勘因舉及選差勿拘凡有善政異績準事大小遷升選人視此又定監物務入親民次升通判通判升知州皆用舉者舉數不足毋輒關升慶厯三年從輔臣范仲淹等奏定磨勘保任之法自朝官至郎中少卿須清望官五人保任始得遷其後知諫院劉元瑜以爲適長奔競非所以養廉恥乃罷之八年詔近臣論時政翰林學士張方平言祖宗之時文武官不立磨勘年歲不爲升遷次序有才實者從下位立見超擢無才實者守一官十餘年不轉其任監當或知縣通判知州至數任不遷當時人皆自勉非有勞効知不得進祥符之後朝廷益循寬大自監當入知縣知縣入通判通判入知州皆以兩任爲限守官及三年例得磨勘先朝始行未見有弊及今年深習以爲常皆謂分所宜得無賢不肖莫知所勸願陛下稍革此制其應磨勘敘遷必有勞績或特勅擇官保任者卽與轉遷如無勞績又不因保任者更增展年其保任之法須選擇清望有才識之人命之舉官如此則是執政之臣舉清

望官委清望官舉親民官凡官有闕惟隨員數舉之庶見急才愛民之意嘉祐六年下詔曰朕觀古者治世牧民之吏多稱其職而百姓安其業今求材之路非不廣責善之法非不詳而吏多失職非稱所以爲民之意豈人材獨少而世變殊哉殆不得久於其官故也蓋智能材力之士雖有興利除害禁奸勸善之意非假以歲月則亦媮不爲用欲終厥功其路無由自今諸州縣守令有清白不擾政迹尤異而實惠及民者本路若州連書同罪保舉將政迹實狀以聞中書門下察訪得實許令再任英宗治平三年考課院言知磁州李田再考在劣等降監淄州鹽酒稅務坐考劣降等自田始考續舊審定殿最格法自發運使率而下至於知州皆歸考課院專以監司所第等級爲據至考監司則總其甄別部吏能否副以採訪才行合二事爲課悉書中等無高下神宗卽位凡職皆有課凡課皆責實監司所上守臣課不占等者展年降資而治狀優異者增秩賜金帛以璽書獎勵之若監司以上則命御史中丞侍御史考校凡縣令之課以斷獄平允賦入不擾均役屏盜勸課農桑振恤饑窮導修水利戶籍增衍整治簿書爲最而德義清謹公平勤恪爲善參考治行分定上中下等至其能否尤殊絕者別立優劣二等歲上其狀以詔賞罰其入優劣者賞罰尤峻繼又令一路長吏無甚臧否不須別爲優劣二等止因上中下三等區別以聞是時內外官職各從所隸司以考覈而中書皆置之籍每歲竟或有除授則稽差殿最取其尤甚者而進退之熙

宣五年遂罷考課院間遣使察訪所至州縣條其吏課凡知州通判上中書縣令上司農各注籍以相參考惟侍從出守郡聽不以考法朝廷察其治焉元豐元年詔因勞効得酬賞皆分五等有司受其等而差進之初一等京朝官大小使臣皆轉一官選人資歷深者改京朝官資淺者循兩資次二等隨其官高下升資或減磨勘年惟軍功捕盜皆得改次等京朝官自三等以下賞以差減若一人而該兩賞許累計其等以遷三年詔御史臺六察按官以所糾劾官司稽違失職事多寡爲殿最中書置簿以時書之任滿取旨升黜元祐初御史中丞劉摯言近者朝廷主察名實行綜覈之政下乃承之以刻主行教化擴寬洪之澤而下乃爲苟簡先此追罪監司數人爲其掎斂害民耳而昧者矯枉過正乃欲以緩縱委靡爲安靜請申立監司考績之政以常賦登耗郡縣勤惰刑獄當否民俗休戚爲之殿最歲終用此以誅賞之文彥博又奏唐大典所載以德行才用勞效三類察在選之士參辯能否今之選格特多舉主有軍功斯爲上矣然舉主可求軍功或妄何可盡據請委吏依倣三類第其才德功效送中書門下覆驗取其應選者引對而去留之詔令近臣議議者請用元豐考課令第爲高下以行升黜歲毋過五人後改立縣令課有四善五最之目及增損監司轉運課格守令爲五等減磨勘法初元祐嘗立吏戶刑三部郎官課崇宣間言者乞倣周制歲終委省寺監六曹之長各考其屬稽其官成而三年遂校其勤惰行賞罰焉大觀元年詔國

家休養生民垂百五十年生齒日繁而戶部民籍曾不加益州縣於逸丁入者收落失實以故課役不均皆守令弛職可申嚴考課法然其考法因時所尚以示誘抑若勸學墾田植桑棗振貸葬枯興發坑冶奉詔無違誘進道徒賦稅趣辦能按賊吏皆因事而增品目舊法固不易也但奉行不皆良吏以請謁移實者亦多紹興二年初詔監司守臣舉行考課之法時郡縣數罹兵燹又命以戶口增否別立守令課分上中下三等每等分三甲置籍守倅考縣令監司考知州考功會其已成較其優劣而賞罰之五年立縣令四課曰糾正稅籍團結民兵勸課農桑勸勉孝悌三歲就緒者加旌賞無善狀者汰之臣僚上言守令之治其略有七一曰宣詔二曰厚風俗三曰勸農桑四曰平獄訟五曰理財賦六曰興學校七曰實戶口得人則七者皆舉今之監司實古刺史比年守令姦貪監司未嘗按發玩弛之弊日甚而戶部侍郎張致遠亦言之乃下詔戒飭監司考察守令而舉按焉頃之有請令江淮官久任而課其功過者帝曰朕昔爲元帥時見州縣官以三年爲任猶且一年立威信二年守規矩三年則務收人心以爲去計今止以二年爲任雖有葺治之心蓋亦無暇矣可如所奏是時歲以十五事考校監司取四善四最考校縣令違限不實者有罪又詔監司一歲再具所部知縣有無善政顯著繆懦不職上之省十三年詔准東京西路州縣逐考批書若增添戶口勸課農桑增修水利歲終委監司覆實比較守臣之條有九通判之條十有四令

佐而下有差二十五年以州縣官吏爲虐監司郡守不詞察遂命監司按郡守之縱容臺諫劾監司之失察而每歲校其所按之多寡以爲殿最之課二十七年校書郎陳俊卿言古人各守一官終身使易地而居未必盡其能也今監司帥守小州換大州東路易西路朝廷百執事亦往往計日待遷視所居之官有如傳舍望令有政術優異者或增秩賜金或待終秩而後遷使久於其職察其勤惰而升黜之庶幾人安其分而萬事舉矣詔三省行之隆興元年命湖南北路應守令增闢田疇自一千頃以下轉磨勘有差虧者展磨勘降名次二年詔淮南川陝京西邊郡守令能安輯流亡勸課農桑首就緒者本道監司以開乾道二年廷臣上言國朝盛時有京朝官考課有幕職州縣官考課其後爲審官院爲考課院皆中書或兩制臣僚校其能否以施賞罰望遵故事應監司郡守朝辭日別給御前麻子如薦賢才爲幾人若爲治錢穀若爲理獄訟興某利除某害合爲條目使之黽勉從事每考令當職官吏從實批書代還使籍手陛見然後詔執事精加考覈其風績有聞者優與增秩所蒞無狀者罰之無赦則賢者効職而中下之才亦皆強於爲善矣帝乃命經筵官參照累朝考課之法講而行之淳熙二年因臣僚言沿邊七路每路以文臣一人充安撫使以治民武臣一人充都總管以治兵分舉其職各奏其功任必加九歲考優劣一年視其規畫二年視其成效三年視其大成重議誅賞臧否分爲三等治效顯著者爲臧貪刻庸繆者爲否無功

無過者爲平時天子留意黜陟諸道莫敢不奉承於是得實者皆增秩升擢而監司牧伯舉按稽緩者輒降黜行之十餘年不免有弊帝因諭輔臣曰臧否亦有喜怒之私如諸司以爲臧一司以爲否必從衆爲公亦在精擇監司而以臺諫攷察之庶乎其可也光宗初詔罷其令監宗以郡國按刺多徇私情遂做舊制於御史臺別立考課一司歲終各以能否之實聞于上以詔升黜其貪墨昏懦致臺諫奏劾者坐監司郡守以容庇之罪度宗咸淳三年命參酌舊制凡文武官一是以公勤廉恪爲主而又職事修舉斯爲上等公勤廉恪各有一長爲中等旣無廉聲又多繆政者考下等其要則以御史臺總帥閫監司監司總守倅守倅總州縣屬官餘如戎司及屯司軍大壘則總之制司或無制司則併各郡總管鈐轄並總於帥司或以逐路所部州郡多寡之數分隸轉運提舉提刑三司守倅月一考州縣屬官監司會所隸守倅制司會戎司軍壘遵照舊制互用文移會其兵甲獄訟金穀之數及各司屬官書擬公事拘權錢物招軍備器之數次月置冊各申御史臺上之課籍俟至半年類考較前三年定爲三等中者無所賞罰上者或轉官或減磨勘下者降官展磨勘各有等差

宋史卷一百六十一

元 中 書 右 丞 相 總 裁 脫 脫 等 修

職官志第一百一十四

職官一 三師 三公 宰執 尚書省

昔武王克商史臣紀其成功有曰列爵惟五分土惟三建官惟賢位事惟能後世曰爵曰官曰職分而任之其原蓋始乎此然周初之制已不可考周公作六典自天官冢宰而下小大高下各帥其屬以任其事未聞建官而不任以事位事而不命以官者至於列爵分土此封建諸侯之制也亦未聞以爵以土如後世虛稱以備恩數者也秦漢及魏晉南北朝官制沿革不常不可殫舉後周復周禮六典官稱而參用秦漢隋文帝廢周禮之制惟用近代之法唐承隋制至天授中始有試官之格又有員外之置尋為檢校試攝判知之名其初立法之意未嘗不善蓋欲以名器事功甄別能否又使不肖者絕年勞序遷之覬覦而世戚勳舊之家寵之以祿而不責以猷為其居位任事者不限資格使得自竭其所長以為治效且黜陟進退之際權歸於上而有司若不得預殊不知名實混雜品秩貿亂之弊亦起於是矣宋承唐制抑又甚焉三師三公不常置宰相不專任三省長官尚書門下並列于外又別置中書禁中是為政事堂與樞密

對掌大政天下財賦內庭諸司中外筦庫悉隸三司中書省但掌冊文覆奏考帳門下省主乘輿八寶朝會版位流外者較諸司附奏挾名而已臺省寺監官無定員無專職悉皆出入分泄庶務故三省六曹二十四司類以他官主判雖有正官非別敕不治本司事事之所寄十七二三故中書令侍中尙書令不預朝政侍郎給事不領省職諫議無言責起居不記注中書常闕舍人門下罕除常侍司諫正言非特旨供職亦不任諫諍至於僕射尙書丞郎員外居其官不知其職者十常八九其官人受授之別則有官有職有差遣官以寓祿秩敘位著職以待文學之選而別爲差遣以治內外之事其次又有階有勳有爵故仕人以登臺閣升禁從爲顯官而不以官之遲速爲榮滯以差遣要劇爲貴途而不以階勳爵邑有無爲輕重時人語曰靈登瀛不爲卿靈抱藁不爲監虛名不足以砥礪天下若此外官則懲五代藩鎮專恣頗用文臣知州復設通判以貳之階官未行之先州縣守令多帶中朝職事官外補階官既行之後或帶或否視是爲優劣大凡一品以下謂之文武官未常參者謂之京官樞密宣徽三司使副學士諸司而下謂之內職殿前都校以下謂之軍職外官則有親民釐務二等而監軍巡警亦比親民此其槩也故自眞宗仁宗以來議者多以正名爲請咸平中楊億首言文昌會府有名無實宜復其舊旣而言者相繼乞復二十四司之制至和中吳育亦言尙書省天下之大有司而廢爲閑所當漸復之然朝論異同未遑釐正神宗

卽位慨然欲更其制監盜未始命館閣校唐六典元豐三年以摹本賜羣臣乃置局中書命翰林學士張璪等詳定八月下詔肇新官制省臺寺監領空名者一切罷去而易之以階九月詳定所上寄祿格會明堂禮成近臣遷秩卽用新制而省臺寺監之官各還所職矣五年省臺寺監法成六年尙書新省成帝親臨幸召六曹長貳以下詢以職事因誡敕焉初新階尙少而轉行者易以及元祐初於朝議大夫六階以上始分左右旣又以流品無別乃詔寄祿官悉分左右詞人爲左餘人爲右紹聖中罷之崇寧初以議者有請自承直至將仕郎凡換選人七階大觀初又增宣奉至奉直大夫四階政和末自從政至迪功郎又改選人三階於是文階始備而武階亦詔易以新名正使爲大夫副使爲郎而橫班十二階使副亦然故有郎居大夫之上者繼以新名未具增置宣正履正大夫郎凡十階通爲橫班而文武官制益加詳矣大抵自元祐以後漸更元豐之制二府不分班奏事樞密加置簽書戶部則不令右曹專典常平而總於其長起居郎舍人則通記起居而不分言動館職則增置校勘黃本凡此皆與元豐稍異也其後蔡京當國率意自用然動以繼志爲言首更開封守臣爲尹牧由是府分六曹縣分六案又內侍省職悉倣機廷之號已而修六尙局建三衛卽又更兩省之長爲左輔右弼易端揆之稱爲太宰少宰是時員旣濫冗名且素雜甚者走馬承受升擁使華黃冠道流亦濫朝品元豐之制至此大壞及宣和末王黼用事方且追咎

元祐紛更乃請設局以修官制格目爲正名亦何補矣建炎中興參酌潤色因呂頤浩之請左右僕射並同中書門下平章事兩省侍郎改爲參知政事三省之政合乎一乾道八年又改左右僕射爲左右丞相刪去三省長官虛稱道揆之名遂定然維時多艱政尙權宜御營置使國用置使修政局置提舉軍馬置都督並以宰相兼之總制司理財同都督督視理兵並以執政兼之因事創名殊非經久惟樞密本兵與中書對掌機務號東西二府命宰相兼知院事建炎四年實用慶厓故典其後兵興則兼樞密使兵罷則免至開禧初始以宰臣兼樞密爲永制當多事時諸部或長貳不並置或併郎曹使相兼之惟吏部戶部不省不併兵休稍稍增置其後詔非曾任監司守臣不除郎官著爲令又增館閣員廣環衛官然紹興務行元祐故事以左右二字分別流品其後以人言省去寧清濁相涵無絕人遷善之路橫班以郎居大夫之上既釐而正之矣而介冑之士與縉紳同稱寧名號未正毋示人以好武之機陳傅良欲定史官遷次之序衆論違之而未及行洪邁欲改三衙軍官稱謂當時嘉之卒未暇講考古之制量今之宜蓋自元祐以建政和己未嘗拘乎元豐之舊中興若稽成憲二者並行而不悖故凡大而分政任事之臣微而筦庫監局之官沿襲不革者皆先後所同便也或始創而終罷或欲革而猶因則有各當其可者焉類而書之先後互見作職官志以至輿給備從雖微必錄並從舊述云

三師三公宋承唐制以太師太傅太保爲三師太尉司徒司空爲三公爲宰相親王使相加官其特拜者不預政事皆赴上於尙書省凡除授則自司徒遷太保自太傅遷太尉檢校官亦如之太尉舊在三師下由唐至宋加重遂以太尉居太傅之上若宰臣官至僕射致仕者在位久近或已任司空司徒則拜太尉太傅等官若太師則爲異數自趙普以開國元勳文彥博以累朝耆德方特拜焉雖太傅王旦司徒呂夷簡各任宰相二十年止以太尉致仕熙寧二年富弼除守司空兼侍中平章事辭司空侍中三年曾公亮除守司空檢校太師兼侍中以兩朝定策之功辭相位也六年文彥博除守司徒兼侍中九年彥博除守太保兼侍中辭太保元豐三年以曹佾檢校太師守司徒兼中書令九月詔檢校官除三公三師外並罷又以文彥博落兼侍中除守太尉富弼守司徒皆錄定策之功也六年彥博守太師致仕八年王安石守司空曹佾守太保元祐元年文彥博落致仕太師平章軍國重事呂公著守司空同平章軍國重事崇寧三年蔡京授司空行尙書左僕射大觀元年蔡京爲太尉二年爲太師政和二年京落致仕依前太師三日一至都堂治事九月詔以太師太傅太保古三公之官今爲三師古無此稱合依三代爲三公爲真相之任司徒司空周六卿之官太尉秦主兵之任皆非三公並宜罷之仍考周制立三孤少師少傅少保亦稱三少爲三次相之任至是京始以三公任真相三公自國初以來未嘗備官獨宣和末三公至十八

人三少不計也太師三人蔡京童貫鄧紳太傅四人王黼燕王侯越王偲鄆王楷太保十一人蔡攸燕王
樞至儀王樞渡江後秦檜爲太師張俊韓世忠爲太傅劉光世爲太保乾道初楊沂中吳玠並爲太傅紹
熙初史浩爲太師嗣秀王爲太保自紹熙後三公未嘗備官其後韓侂胄史彌遠賈似道專政皆至太師
爲宰相之職佐天子總百官平庶政事無不統宋承唐制以同平章事爲真相之任無常員有二人則分
日知印以承郎以上至三師爲之其上相爲昭文館大學士監修國史其次爲集賢殿大學士或置三相
則昭文集賢二學士併監修國史各除唐以來三大館皆宰臣兼故仍其制國初范質昭文學士王溥監
修國史魏仁浦集賢學士此爲三相例也神宗新官制於三省置侍中中書令尙書令以官高不除人而
以尙書令之貳左右僕射爲宰相左僕射兼門下侍郎以行侍中之職右僕射兼中書侍郎以行中書令
之職政和中改左右僕射爲太宰少宰仍兼兩省侍郎靖康中復改爲左右僕射建炎三年呂頤浩請參
酌三省之制左右僕射並加同中書門下平章事門下中書三侍郎並改爲參知政事廢尙書左右丞從
之乾道八年詔尙書左右僕射可依漢制改爲左右丞相詳定敕令所言近承詔旨改左右僕射爲左右
丞相令刪去侍中中書尙書令以左右丞相充緣舊左右僕射非三省長官故爲從一品今左右丞相係
充侍中中書尙書令之位卽合爲正一品從之丞相官以太中大夫以上充平章軍國重事元祐中置以

文彥博太師呂公著守司空相繼爲之序宰臣上所以處老臣碩德特命以寵之也故或稱平章軍國重
事或稱同平章軍國事五日或兩日一朝非朝日不至都堂其後蔡京王黼以太師總三省事三日一朝
赴都堂治事開禧元年韓侂胄拜平章討論典禮乃以平章軍國事爲名蓋省重事則所預者廣去同字
則所任者專邊事起乃命一日一朝省印亦歸其第宰相不復知印其後賈似道專權竊位日久尊寵日
隆位皆在丞相上

使相親王樞密使留守節度使兼侍中中書令同平章事者皆謂之使相不預政事不書敕惟宣敕除授
者敕尾存其銜而已乾德二年范質等三相皆罷以趙普同平章事李崇矩樞密使命下無宰相書敕使
問翰林陶穀穀謂自昔輔相未嘗虛位惟唐太和中甘露事數日無宰相時左僕射令狐楚等奉行制書
今尙書亦南省長官可以書敕寶儀曰穀之所陳非承平令典今皇弟開封尹同平章事卽宰相之任也
可書敕從之

參知政事掌副宰相毗大政參庶務乾德二年置以樞密直學士薛居正兵部侍郎呂餘慶並本官參知
政事先是已命趙普爲相欲置之副而難其名稱以問翰林學士陶穀曰下宰相一等有何官對曰唐有
參知機務參知政事故以命之仍令不押班不知印不升政事堂殿廷別設磚位敕尾著銜降宰相月奉

雜給半之未欲與普齊也開寶六年始詔居正餘慶於都堂與宰相同議政事至道元年詔宰相與參政輪班知印同升政事堂押敕齊銜行則並馬自寇準始以後不易元豐新官制廢參知政事置門下中書二侍郎尚書左右丞以代其任建炎三年復以門下中書侍郎爲參知政事而省左右丞乾道八年改左右僕射爲左右丞相其參知政事如故以中大夫以上充常除二員或一員嘉泰三年始除三員故事丞相謁告參預不得進擬惟丞相未除則輪日當筆然多不踰年少僅旬月淳熙初葉衡罷相龔茂良行相事近三年亦創見也

門下省受天下之成事審命令駁正違失受發通進奏狀進請寶印凡中書省畫黃錄黃樞密院錄白畫旨則留爲底及尚書省六部所有法式事皆奏覆審駁之給事中讀侍郎省侍中審進入被旨畫聞則授之尚書省樞密院卽有舛誤應舉駁者大則論列小則改正凡文書自內降者著之籍章奏至則受而通進俟頒降分送所隸官司凡吏部擬六品以下職事官則給事中校其任歷功狀侍郎侍中引驗審察非其人則論奏凡遷改爵秩加敘勳封四選擬注奏鈔之事有舛誤退送尚書省覆刑部大理寺所斷獄審其輕重枉直不當罪則以法駁正之國初循舊制以中書門下平章事爲宰相之職復用兩制官一員判門下省事官制行始釐正焉凡官十有一侍中侍郎左散騎常侍各一人給事中四人左諫議大夫起

居郎左司諫左正言各一人先是中書人吏分掌五房曰孔目房吏房戶房兵禮房刑房又有主事勾銷二房至是釐中書爲三省分兵與禮爲六房各因其省之事而增益之門下九分房十曰吏房曰戶房曰禮房曰兵房曰刑房曰工房皆視其房之名而主行尙書省六曹二十四司所上之事曰開拆房曰章奏房曰制敕庫房亦皆視其名而受遺文書表狀與供闕敕令格式擬官爵封勳之類惟班簿本省雜務則歸吏房吏四十有九錄事主事各三人令史六人書令史十有八人守當官十有九人而外省吏十有九人令史一人書令史二人守當官六人守闕守當官十人元豐八年以門下中書外省爲後省門下外省復置催驅房元祐三年詔吏部注通判赴門下引驗應省臺寺監諸司人吏四分減一復置點檢房四年又別立吏額紹聖二年守闕守當官門下中書省各以百人尙書省百五十人爲額四年三省吏員並依元豐七年額

侍中掌佐天子議大政審中外出納之事大祭祀則版奏中嚴外辦導輿輅詔升降之節皇帝齋則請就齋室大朝會則承旨宣制告成禮祭祀亦如之册后則奉寶以授司徒國朝以秩高罕除自建隆至熙寧眞拜侍中纔五人雖有用他官兼領而實不任其事官制行以左僕射兼門下侍郎行侍中職別置侍郎以佐之南渡後置左右丞相省侍中不置

侍郎掌貳侍中之職省中外出納之事大祭祀則前導輿輅詔進止大朝賀則授表以奏祥瑞冊后則奉節及寶位與知樞密院同知樞密院中書侍郎尚書左右丞爲執政官南渡後復置參知政事省門下侍郎不置

左散騎常侍

左諫議大夫

左司諫

左正言同掌規諫諷諭凡朝政闕失大臣至百官任非其人三

省至百司事有違失皆得諫正國初雖置諫院知院官凡六人以司諫正言充職而他官領者謂之知諫院正言司諫亦有領他職而不預諫諍者官制行始皆正名元豐八年諫議大夫孫覺言據官制格目諫官之職凡發令舉事有不便於時不合於道大則廷議小則上封若賢良之遺滯於下忠孝之不聞於上則以事狀論薦乞依此以修舉職事八月門下省言諫議大夫司諫正言合通爲一詔並從之十月詔倣六典置諫官員元祐元年二月詔諫官雖不同省許二人同上殿後又從司諫虞策之請如獨員許與臺官同對九月左右正言久闕侍御史王巖叟言國家倣近古之制諫官六員方之先王已自爲少望詔補足無令久空職十月司諫王覲言自今中書舍人闕勿以諫官兼權從之十一月巖叟又言近降聖旨兩省諫官各令出入異戶勿與給事中中書舍人通實欲限隔諫官不使在政事之地恐知本末數論列爾尋詔諫官直舍仍舊八年詔執政親戚不除諫官建中靖國元年言者謂諫官論事惟憑詢訪而百司之

事大曹所報外皆不得其詳遂詔諫官案計關臺察

給事中四人分治六房掌讀中外出納及判後省之事若政令有失當除授非其人則論奏而駁正之凡章奏日錄日以進考其稽違而糾治之故事詔旨皆付銀臺司封駁官制行給事中始正其職而封駁司歸門下元豐五年五月詔給事中許書畫黃不書草著爲令六月給事中陸佃言三省密院文字已讀者尙令封駁慮失之重複詔罷封駁房六年詔駁正事赴執政稟議七年有旨舉駁事依中書舍人封還詞頭例旣而令稟議如初給事中韓忠彥言給舍職位頗均一則不稟白而聽封還一則許舉駁而先稟議於理未允且朝廷之事執政所行職當封駁則已與執政異自當求決於上尙何稟議之有詔從之紹聖四年葉祖洽言兩省置給舍使之互察今中書舍人兼權封駁則給事中之職遂廢詔特旨書讀不迴避餘互書判元符三年翰林學士曾肇言門下之職所以駁正中書違失近日給事封駁中書錄黃乃令舍人書讀行下墮壞官制有損治體願正紀綱爲天下後世法重和元年給事中張叔夜言凡命令之出中書宣奉門下審讀然後付尙書頒行而密院被旨者亦錄付門下此神宗官制也今急速文字不經三省而諸房以空黃先次書讀則審讀殆成虛設矣乞立法禁從之凡分案五曰上案主寶禮及朝會所行事曰下案主受發文書曰封駁案主封駁及試吏校其功過曰諫官案主關報文書曰記注案主錄起居注

其雜務則所分案掌焉紹興以後止除二人或一人

起居郎一人掌記天子言動御殿則侍立行幸則從大朝會則與起居舍人對立於殿下螭首之側凡朝廷命令赦宥禮樂法度損益因革賞罰勸懲羣臣進對文武臣除授及祭祀宴享臨幸引見之事四時氣候四方符瑞戶口增減州縣廢置皆書以授著作官國朝舊置起居院命三館校理以上修起居注熙寧四年詔諫官兼修注者因後殿侍立許奏事元豐二年兼修注王存乞復起居郎舍人之職使得盡聞明天子德音退而書之神宗亦謂人臣奏對有頗僻讒慝者若左右有史官書之則無所肆其姦矣然未果行故事左右史雖日侍立而欲奏事必稟中書俟有存因對及之八月迺詔雖不兼諫職許直前奏事蓋存發之也官制行改修注爲郎舍人六年詔左右史分記言動元祐元年仍詔不分七年詔邇英閣講讀罷有留身奏事者許侍立紹聖元年中丞黃履言所奏或干機密難令旁立仍依先朝故事先是御後殿則左右史分日侍立崇寧三年詔如前殿之儀更不分日大觀元年詔事有足以勸善懲惡者雖秩卑亦書之紹興二十八年用起居郎洪遵言起居郎舍人自今後許依講讀官奏事隆興元年用起居郎兼侍講胡銓言前殿依後殿輪左右史侍立

符寶郎二人掌外廷符寶之事禁中別有內符寶郎官制行未嘗除大觀初八寶成詔依唐六典增置講

康罷之

通進司隸給事中掌受三省樞密院六曹寺監百司奏牘文武近臣表疏及章奏房所領天下章奏案牘具事目進呈而頒布於中外

進奏院隸給事中掌受詔敕及三省樞密院宣劄六曹寺監百司符牒頒于諸路凡章奏至則具事目上門下省若案牘及甲粟文書則分納諸官司凡奏牘違展法式者貼說以進熙寧四年詔應朝廷擢用材能賞功罰罪事可懲勸者中書檢正樞密院檢詳官月以事狀錄付院牒報天下元祐初罷之紹聖元年詔如熙寧舊條靖康元年二月詔諸道監司帥守文字應邊防機密急切事許進奏院直赴通進司投進舊制通進銀臺司知司官二人兩制以上充通進司掌受銀臺司所領天下章奏案牘及閣門在京百司奏牘文武近臣表疏以進御然後頒布于外銀臺司掌受天下奏狀案牘抄錄其目進御發付勾檢糾其違失而督其淹緩發敕司掌受中書樞密院宣敕著籍以頒下之

登聞檢院隸諫議大夫 登聞鼓院隸司諫正言掌受文武官及士民章奏表疏凡言朝政得失公私利害軍期機密陳乞恩賞理雪冤濫及奇方異術改換文資改正過名無例通進者先經鼓院進狀或爲所抑則詣檢院並置局于闕門之前中興後檢鼓糧審官官告進奏謂之六院例以京官知縣有政績者充

亦有自郡守除者繼卽除耶恩數略視職事官而不入雜壓紹興十一年胡汝明以糾院除監察御史遂遷侍御史乾道後相繼入臺者數人大院彌重爲察官之儲淳熙初班寺監丞之上紹熙五年詔六院官復入雜壓在九寺簿之下六院各隨所隸

中書省掌進擬庶務宣奉命令行臺諫章疏羣臣奏請興辦改革及中外無法式事應取自事凡除省臺寺監長貳以下及侍從職事官外任監司節鎮知州軍通判武臣遙郡橫行以上除授皆掌之凡命令之禮有七曰冊書立后妃封親王皇子大長公主拜三師三公三省長官則用之曰制書處分軍國大事頒赦宥德音命尙書左右僕射開府儀同三司節度使凡告廷除授則用之曰誥命應文武官遷改職秩內外命婦除授及封敘贈典應合命詞則用之曰詔書賜待制大卿監中大夫觀察使以上則用之曰敕書賜少卿監中散大夫防禦使以下則用之曰御札布告登封郊祀宗祀及大號令則用之曰敕榜賜黜及戒勵百官曉諭軍民則用之皆承制畫旨以授門下省令宣之侍郎奉之舍人行之留其所得旨爲底大事奏稟得旨者爲畫黃小事擬進得旨者爲錄黃凡事干因革損益而非法式所裁者論定而上之諸司傳宣特旨承報審覆然後行下設官十有一令侍郎右散騎常侍各一人舍人四人右諫議大夫起居舍人右司諫右正言各一人分房八曰吏房曰戶房曰兵禮房曰刑房曰工房曰主事房曰班簿房曰制敕

庫房元補以後析兵禮爲二增催驅點檢分房十有一後又改主事房爲開折凡吏房掌行除授考察升黜賞罰廢置薦舉假故一時差官文書曰戶房掌行廢置升降郡縣調發邊防軍須給貸錢物曰禮房掌行郊祀陵廟典禮后妃皇子公主大臣封冊科舉考官外夷書詔曰兵房掌行除授諸蕃國王爵官封曰刑房掌行赦宥及貶降敘復曰工房掌行營造計度及河防修閉凡尙書省所上奏請給諫所陳章疏內外臣僚官司申請無法式應取旨者六房各視其名而行之曰主事房掌行受發文書曰班簿房掌百官名籍具員曰制敕庫房掌編錄供檢敕令格式及架閣庫曰催驅房督趣稽違曰點檢房省察差失吏四十五有五錄事三人主事四人令史七人書令史十有四人守當官十有七人而外省吏十有九人令史一人書令史二人守當官六人守闕守當官十人元豐八年詔待制以上磨勘本省進擬元祐三年詔應除授從中批付中書省者並三省行紹聖五年詔臣僚上殿劄子中書省進呈取旨其承受傳宣內降非有司所可行者申中書省或樞密院奏審

令掌佐天子議大政授所行命令而宣之祀大神祇則升壇享宗廟則升阼階而相其禮臨軒冊命則讀冊建儲則升殿宣制持冊及璽綬以授太子大朝會則詣御坐前奏方鎮表及祥瑞國朝未嘗真拜以他官兼領者不預政事然止曹偁一人餘皆贈官官制行以右僕射兼中書侍郎行令之職別置侍郎以佐

之中興後置左右丞相省令不置

侍郎掌貳令之職參議大政授所宣詔旨而奉之凡大朝會則押表及祥瑞案臨軒册命則押册引案以所奏文及册書授令四夷來朝則奏其表疏以贊幣付有司南渡後復置參知政事省中書侍郎不置

舍人四人舊六人掌行命令爲制詞分治六房隨房當制事有失當及除授非其人則論奏封還詞頭國初爲所遷官實不任職復置知制誥及直舍人院主行詞命與學士對掌內外制凡有除拜中書吏赴院納詞頭其大除拜亦有宰相召舍人面授詞頭者若大誥命中書并敕進入從中而下餘則發敕官受而出之及修官制遂以實正名而判後省之事分案五曰上案掌册禮及朝會所行事曰下案掌受付文書曰制誥案掌書錄制詞及試吏校其功過曰諫官案掌受諸司闕報文書曰記注案掌錄記注其雜務則隨所分案掌之元豐六年詔中書省置點檢房令舍人通領元祐元年詔舍人各簽諸房文字其命詞則輪日分草九月詔時暫闕官依門下尚書省例送本省官兼權紹聖四年寔序辰請自今命詞以元行遺文書同檢送兩制舍人從之建炎後同他官兼攝者則稱權舍人資淺者爲直舍人院

起居舍人一人掌同門下省起居郎侍立修注官元豐前以起居郎舍人寄錄而更命他官領其事謂之同修起居注官制行以郎舍人爲職在淳熙十五年羅點自戶部員外郎爲起居舍人避其祖諱乃以爲

太常少卿兼侍立修注官其後兩史或闕而用資淺者則降旨以某人權侍立修注官

右散騎常侍 右諫議大夫 右司諫 右正言與門下省同但左屬門下右屬中書皆附兩省班籍通

謂之兩省官元豐既新官制職事官未有不經除授者惟御史大夫左右散騎常侍始終未嘗一除人蓋

兩官爲臺諫之長無有啟之者中興初詔諫院不隸兩省紹興二年詔並依舊赴三省元置局處淳熙十

五年用林栗言置左右補闕拾遺專任諫正不任糾劾之事踰年減罷法司令史書令史守當官各一人

守闕守當官三人乾道六年減二人

檢正官五房各一人掌糾正省務熙寧三年置以京朝官充選人卽爲習學公事官制行罷之而其職歸

左右司建炎三年中書門下省言軍興以來天下多事中書別無屬官元豐以前有檢正官後因置左右

司遂不差致朝廷及應報四方行移稽留無檢舉催促今欲差官兩員充中書門下省檢正諸房公事內

員檢正吏禮兵房一員檢正戶刑工房從之至次年詔並罷紹興二年詔中書門下省復置檢正官一員建炎三年指揮中

書門下省併爲一中書省錄事主事令史書令史守當官共四十三人門下省錄事主事令史書令史守

當官共四十六人依祖額以八十九人爲額隸闕守當官兩省各一百人共存留一百五十人中書省大

分門下省四分

尙書省掌施行制命舉省內綱紀程式受付六曹文書聽內外辭訴奏御史失職攷百官庶府之治否以詔廢置賞罰曰吏部曰戶部曰禮部曰兵部曰刑部曰工部皆隸焉凡天下之務六曹所不能與奪者總決之應取裁者隨所隸送中書省樞密院事有成法則六曹準式具鈔令僕射丞檢察簽書送門下省畫聞審察吏部注擬文武官及封爵承襲賜勳定賞之事朝廷有疑事則集百官議其可否凡更改申明敕令格式一司條法則議定以奏覆太常考功諡議亦如之季終具賞罰勸懲事付進奏院頒行于天下大祭祀則警戒執事官設官九尙書令左右僕射左右丞左右司郎中員外郎各一人分房十曰吏房曰戶房曰禮房曰兵房曰刑房曰工房各視其名而行六曹諸司所上之事曰開拆房主受遣文書曰都知雜房主行進制敕目班簿具員考察都事以下功過遷補曰催驅房主考督文牘稽違曰制敕庫房主編檢敕令格式簡納架閣文書置吏六十有四都事三人主事六人令史十有四人書令史三十有五人守當官六人元豐四年詔尙書都省及六曹各輪郎官一員宿直五年詔得旨行下並用劄子紹聖元年詔在京官司所受傳宣內降隨事申尙書省或樞密院覆奏二月詔尙書省都彈奏大察御史糾不當者令掌佐天子議大政奉所出命令而行之其屬有六曹凡庶務皆會而決之凡官府之紀綱程式無不總焉大事三省通議則同執政官合班小事尙書省獨議則同僕射丞分班論奏若事由中書門下而有失

當應奏者亦如之與三師三公侍中中書令俱以册拜自建隆以來不除惟親王元佐元儼以使相兼領不與政事政和二年詔尙書令太宗皇帝曾任今宰相之官已多不須置然是時說者以謂爲令者唐太宗也熙陵未嘗任此蓋時相蔡京不學之過宣和七年詔復置令亦虛設其名無有除者南渡後並省不置

左僕射 右僕射掌佐天子議大政貳令之職與三省長官皆爲宰相之任大祭祀則掌百官之警戒視滌濯告潔贊玉幣爵坩之事自官制行不置侍中中書令以左僕射兼門下侍郎右僕射兼中書侍郎行侍中中書令職事政和中詔曰昔我神考訓迪厥官有司不能奉承仰惟前代以僕臣之賤充宰相之任可改左僕射爲太宰右僕射爲少宰靖康元年詔依元豐舊制復爲左右僕射南渡後置左右丞相省僕射不置

左丞 右丞掌參議大政通治省事以貳令僕射之職僕射輪日當筆遇假故則以丞權當筆知印大祭祀酌獻薦饌進熟則受爵酒以授僕射舊班六曹尙書下官制行升其秩爲執政元豐五年五月詔左右僕射丞合治省事是月御史言左右丞蒲宗孟王安禮於都堂下馬違法犯安禮爭論帝前神宗是之今左右丞於都堂上下馬自此始南渡後復置參知政事省左右丞不置

左司郎中 右司郎中 左司員外郎 右司員外郎各一人掌受六曹之事而舉正文書之稽失分治省事左司治吏戶禮奏鈔班簿房右司治兵刑工案鈔房而開拆制敕御史元豐六年都司置御史房主行彈糾御史案察失職催驅封樁印房則通治之有稽滯則以期限舉催初於都司置吏設案而議者謂臺郎宰椽不當目爲官司遂隨省房分治所領之事惟置手分書奏各四人主行校定省吏都事以下功過及遷補之事元豐七年都司御史房置簿以書御史六曹官糾察之多寡當否爲殿最歲終取旨升黜紹聖元年詔都司以歲終點檢六曹稽違最多者具郎官姓名上省取旨二年詔御史臺察六曹稽違違失者送左司籍記宣和二年左司員外郎王蕃奏都司以彌綸省闕爲職事無不預今宰丞入省諸房文字填委次第呈覆自朝至于日中或昏暮僅絕其勢不暇一一檢閱細故而省吏徑稟宰丞請筆以草檢令承從官齋赴郎官廳落日押字謂宜遵守元豐及崇寧舊法諸房各具簽帖先都事自點檢次郎官押訖赴宰丞請筆行下於是詔曰先帝肇正三省詔給舍都司以贊省務今都司寔以曠官緣省吏强悍敢肆侵侮自今違法事其左右司官尙書具事舉劾建炎三年詔減左右司郎官兩員置中書門下省檢正諸房公事二員至次年檢正省罷其左右司郎官依舊四員紹興三十二年詔尙書省吏房兵房三省樞密院機速房尙書省刑房戶房工房三省樞密院看詳賞功房尙書省禮房令左右司郎官四員從上分

房書擬隆興元年詔左右司郎官各差一員乾道六年詔權貨務都茶場依建炎三年指揮委都司官提
領措置乾道七年復添置右司郎官一人 權貨務都茶場都司提轄官一員京朝監場官二員京選
通差掌

鹽香礬鈔引之政令以通商賈佐國用舊制置務以通權易建炎中興又置都茶場給賣茶引隨行在

所權貨務置場雖分兩司而提轄官監官並通銜管幹外置建康鎮江務場並冠以行在為名以都司提

領不係戶部經費建康鎮江續分隸總領所開禧初以總領所侵用儲積錢令徑隸提領所乾道七年提

領所置幹辦官一員右提轄官與雜買務雜賣場文思院左藏東西庫提轄並稱四轄外補則為州內遷

則為寺監丞簿亦有徑為雜監司或入三館乾道間權市舶左藏王揖除抗務王禮除紹熙以後往往
治鑄錢司淳熙間熊克自文思除校書郎

更遷大院官或出為添倅有先後輕重之異焉左藏封樁庫都司提領監官一員監門官一員淳熙九年以都

司提領初勅非奉親與軍須不支後或撥入內庫或以供宮廷諸費亦以備振恤之甲

提舉修敕令自熙寧初編修三司令式命宰臣王安石提舉是後皆以宰執為之詳定官以待從之通法

令者充舊制二員宣和中增至七員靖康初減為三員刪定官無常員先是嘗別修一司敕命大觀三年

紹六曹刪定官併入詳定一司敕令所為一局

制置三司條例司掌經畫邦計議變舊法以通天下之利熙寧二年置以知樞密院陳升之參知政事王

安石爲之而蘇轍程顥等亦皆爲屬官未幾升之相乃言條例者有司事爾非宰相之職宜罷之帝欲併歸中書安石請以樞密副使韓絳代升之焉三年判大名府韓琦言條例司雖大臣所領然止是定奪之所今不關中書而徑自行下則是中書之外又有一中書也五月罷歸中書

三司會計司熙寧七年置於中書以宰相韓絳提舉先是絳言總天下財賦而無考較盈虛之法乃置是司既而事多濡滯八年絳坐此罷相局亦尋廢

編修條例司熙寧初置八年罷

經撫房專治邊事宜和四年宰臣王黼主代燕之議置於三省不復以關樞密院六年罷

提舉講議司崇寧元年七月詔如熙寧條例司故事都省置講議司以宰相蔡京提舉侍從爲詳定官卿

監爲參詳官又置檢討官凡宗室冗官國用商旅鹽鐵賦調尹牧每一事各三人主之時又分武備一房別爲樞密院講議

司三年三月知樞密院事蔡下奏罷三年四月結局宣和六年又於尙書省置講議司十二月命太師致仕蔡京兼領聽就

私第裁處仍免簽書

儀禮局大觀元年詔於尙書省置以執政兼領詳議官二員以兩制充應凡禮制本末皆議定取旨政和

三年五禮議注成罷局

禮制局討論古今宮室車服用冠昏喪祭沿革制度政和二年置於編類御筆所有詳議司詳議官宣和二年詔與大晟府製造所協聲律官並罷

宋史卷一百六十一

宋史卷一百六十一考證

職官志一册后則奉寶以授司徒國朝以秩高罕除○秩監本訛秋從通考改正

十月詔倣六典置諫官員○

臣開鼎

按下文云國家倣近古之制置諫官六員則員字上應有六字

宋史卷一百六十一考證

元 中 書 右 丞 相 總 裁 脫 脫 等 修

職官志第一百一十五

職官二 樞密院 宣徽院 三司使 翰林學士院 崇政殿說書 侍讀侍講
諸閣學士 諸殿學士 東宮官 諸修撰直閣 王府官

樞密院掌軍國機務兵防邊備戎馬之政令出納密命以佐邦治凡侍衛諸班直內外禁兵招募闕試選補屯戍賞罰之事皆掌之以升揀廢置揭帖兵籍有調發更戍則遣使給降兵符除授內侍省官及武選官將領路分都監緣邊都巡檢使以上大事則稟奏其付授者用宣小事則擬進其付授者用劄先具所得旨關門下省審覆面得旨者為錄白批奏得畫者為畫旨並留為底惟以白紙錄送皆候報施行其被御寶批旨者即送門下省繳覆應給誥者關中書省命詞即事干大計造作支移軍器及除都副承旨三衙管軍三路沿邊帥臣太僕寺官文臣換右職仍同三省取旨宋初循唐五代之制置樞密院與中書對持文武二柄號為二府院在中書之北印有東院西院之文共為一院但行東院印而職事條目頗多神宗初政迺省其務之細者歸之有司而增置審官西院專領閣門祇候以上至諸司使差遣官制行隨事分隸六曹專以本兵為職而國信民兵牧馬總領仍舊隸焉舊分四房曰兵曰吏曰戶曰禮至是釐正凡

分房十其後又增支馬小吏二房凡房十有二曰北面房掌行河北河東路吏卒北界邊防國信事曰河西房掌行陝西路麟府豐嵐石隰州保德軍吏卒西界邊防蕃官曰支差房掌行調發軍湖北路邊防及京東京西江淮廣南東路吏卒遷補殿侍選親事官曰在京房掌行殿前步軍司事支移兵器川陝路邊防及畿內福建路吏卒軍頭皇城司衛兵曰教閱房掌行中外校習封樁闕額請給催督驛遞及湖南路邊防曰廣西房掌行招軍捕盜賞罰廣南西路邊防及兩浙路吏卒而禁軍轉員則各隨其房之所領兵額治之曰兵籍房掌行諸路將官差發禁兵選補衛軍文書曰民兵房掌行三路保甲弓箭手曰吏房掌行差將領武臣知州軍路分都監以上及差內侍官文書曰知雜房掌行雜務曰支馬房掌行內外馬政并坊院監牧吏卒牧馬租課曰小吏房掌行兩省內臣磨勘功過敘用大使臣已上歷任事狀及校尉以上改轉遷遣吏三十有八逐房副承旨三人主事五人守闕主事二人令史十三人書令史十五人元祐旣朔支馬小吏二房增令史爲十四人書令史十九人掾正名帖房十八人大觀增逐房副承旨爲五人掾守闕書令史三人增正名二十八人中書密院旣稱二府每朝奏事與中書先後上殿慶曆中二邊用兵知制誥富弼建言邊事係國安危不當專委樞密仁宗以爲然卽詔中書同議諫官張方平亦言中書宜知兵事乃以宰相呂夷簡章得象並兼樞密使熙寧初滕甫言中書密院議邊事多不合趙明與西人

戰中書賞功而樞密院降約束郭逵脩堡柵密院方詰之而中書以下褒詔願大臣凡戰守除帥議同而後下神宗善之元祐四年知樞密院安燾以母憂去職樞密院官偶獨員諫議大夫梁燾司諫劉安世言國朝革五代之弊文武二柄未嘗專付一人乞依故事命大臣兼領靖康元年知樞密院事李綱言在祖宗之時樞密掌兵籍虎符三衙管諸軍率臣主兵柄各有分守所以維持軍政萬世不易之法自童貫以領樞密院事爲宣撫使既主兵權又掌兵籍虎符今日不可不戒乞將團結到勤王正兵並付制置使行營司兵付三衙從之

樞密使 知院事 同知院事 樞密副使 簽書院事 同簽書院事 樞密使知院事佐天子執兵

政而同知副使簽書爲之貳凡邊防軍旅之常務與三省分班稟奏事于國體則宰相執政官合奏大祭祀則迭爲獻官國初官無定制有使則置副有知院則置同知院資淺則用直學士簽書院事熙寧元年文彥博呂公弼爲使韓維邵亢爲副使時陳升之三至樞府神宗欲稍異其禮乃以爲知院事於是知院與副使並置元豐五年將改官制議者欲廢密院歸兵部帝曰祖宗不以兵柄歸有司故事命官以統之互相維制何可廢也於是得不廢帝又以樞密聯職輔弼非出使之官乃定置知院同知院二人副使悉罷元祐初復置簽書院事仍以樞密直學士充同簽書樞密院事治平末以殿前都虞候郭逵爲之又以

達判渭州帝初卽位中丞王陶御史呂景等皆言之遂歸改除宣徽南院使知鄆州自是不復置政和六年以內侍童貫權簽書樞密院河西北面房事七年貫宣撫陝西河東北三路帶同簽書樞密院既而詔元豐官制卽無同簽書樞密院事改爲權領樞密院然簽書院事元豐亦未嘗置宣和元年詔童貫領樞密院事後復以鄭居中爲之建炎初置御營司以宰相爲之使四年罷以其事歸樞密院機速房命宰相范宗尹兼知樞密院紹興七年詔樞密本兵之地事權宜重可依故事置樞密使以宰相張浚兼之又詔立班序立依宰相例其後或兼或否至開禧以宰臣兼使遂爲永制使與知院同知副使亦或並除其簽書同簽書並爲端明殿學士恩數特依執政或以武臣爲之亦異典也

都承旨 副都承旨掌承宣旨命通領院務若便殿侍立閣試禁衛兵校則隨事敷奏承所得旨以授有司蕃國入見亦如之檢察主事以下功過及遷補之事都承旨舊用院吏遞遷熙寧三年始以東上閣門使李評爲之又以皇城使李綬爲之副更用四人自評綬始是月詔都承旨副都承旨見樞密副使如閣門使禮五年以同脩起居注曾孝寬兼都承旨參用儒臣自孝寬始元豐四年客省使張誠一爲都承旨都承旨復用武臣自誠一始元祐初復以文臣爲都承旨其後以待制充元符三年王師約爲都承旨左司諫陳瓘言神考以文臣爲都承旨其副則參求外戚武臣之可用者今師約未歷邊任擢置樞屬緣文

臣之位甚非神者設官之意至崇寧之後專用武臣建炎四年高宗在會稽以武臣辛道宗爲都承旨頗用事紹興元年道宗既免乃詔依元祐職制都承旨以兩制爲之如未曾任侍從之人卽依權侍郎法又或加學士待制修撰貼職乾道初再用武臣自張說始淳熙九年都承旨復用士人自蕭燧始副都承旨文武通除

檢詳官熙寧四年置視中書檢正官元豐初定以三員及改官制置之建炎三年復置檢詳兩員敘位在左右司之下紹興二年減一員

計議官四員建炎四年罷御營使司併歸樞密院爲機速房隨司減罷屬官置幹辦官四員詔並改爲計議官至紹興十一年減罷

編修官隨事置無定員以本院官兼者不入御熙寧三年以王存顧臨等同編修經武要略兼刪定諸房例册初擬都副承旨提舉神宗謂存等皆館職不欲令承旨提舉詔改爲管幹紹聖四年編修刑部軍馬司事令都副承旨兼領政和七年編修北邊條例又別置詳覆官講議司崇寧元年以尙書省講議武備房歸樞密院置以知院蔡卞提舉三年卞奏武備本院諸房可行不必專局乃罷之紹興置編修官二員監三省樞密院門舊係差小使臣及內侍官充嘉定六年詔以曾經作縣通判資序人充小使臣省罷內

侍官改以三省樞密院門機察官繫銜

主管三省樞密院架閣文字一員嘉定八年置以選人京朝官通差

三省樞密院激賞庫三省樞密院激賞酒庫監官各二人

初以武臣嘉泰末始易以選人

二庫並因紹興用兵拊以備邊

後兵罷專以備堂東兩廚應于宰執支遣若朝廷軍期急速錢物金帶以備激犒諸軍將帥告命綾紙以備科撥調遣等用省院府吏胥之給亦具焉

御營使 提舉修政局

制國用使

都督諸路軍馬中興多以宰相兼領兵政財用之事而執政同預

焉因事拊名未久過罷可以不書以其關宰相設施因記其名稱本末附見焉建炎元年置御營司以宰相爲之使仍以執政官兼副使其屬有參贊軍事以待從官兼提舉一行事務以大將兼其將佐有都統制及五軍統制以下官初以總齊行在軍中之政三年詔御營使司止管行在五軍營若事務其餘應于邊防措置等事釐正歸三省樞密院四年詔自今宰相兼知樞密院事罷御營使時臣僚言宰相之職無所不統本朝沿五代之制政事分爲兩府兵權付於樞密比年又置御營使是政出於三也請罷御營司以兵權付之密院而以宰相兼知庶幾可以漸議兵政故罷使及官屬以其事歸密院爲機速房至紹興

二十九年九月詔祖宗舊制樞密院卽無機速房合行減罷

紹興二十一年金主亮來攻帝將臨江視師其冬以和義郡王揚存中爲御營宿衛使兵

罷復免明年孝宗即位又以御營使命之然但自名一司掌殿
前處勇等軍非復建炎之比未幾而罷存中非宰執附見於此紹興二年詔置修政局令百官條具修車

馬備器械命右相秦檜提舉參知政事同領之其下有參詳官一人侍從為之參議官二人檢討官四人

卿郎為之如講議司故事三月而罷局乾道四年詔理財之要裕財為重自今宰相可帶兼制國用使參

政可同知國用事先是臣僚言近以宰相兼樞密院蓋欲使宰相知兵也宰相今雖知兵而財穀出入之
原宰相猶未知也望法李唐之制委宰相兼領三司使職事財穀出納之大綱宰相領

之於上而戶部治其凡故有是命五年二月罷國用司八年詔官制已定丞相事無不統所有國用一司與參知政事並

不兼帶嘉泰四年詔遵孝宗典故宰相兼國用使參知政事同知國用事仍於侍從卿監中擇二人充屬

官右丞相陳自强兼國用事參知政事兼知樞密院事費士寅參知政事張巖兼同知國用事兵以部侍
郎詳叔似

兼參計官大府卿陳景思同參計官先是臣僚言今日財計非錢穀不足可憂而滲漏日滋之為可慮也
周家以冢宰制國用而唐亦以宰相兼領度支是知財賦國家之大計其出入之數有餘不足為大臣者

皆所當知庶可節以制度關防欺隱宜略做祖宗遺意命大臣兼提領天下財賦從之陳自强罷亦廢 紹興五年制以左通議大夫尚書左僕射

同中書門下平章事兼知樞密院事趙鼎左政奉大夫尚書左僕射同中書門下平章事兼知樞密院事

張浚都督諸路軍馬未幾浚暫往江上措置邊防至七年秋廢罷其餘宰臣執政開府于外者別載于篇

編修敕令所 提舉宰相兼 同提舉執政兼 詳定侍從官兼 刪定官就職事官內差兼 掌哀集詔旨纂類成書紹興

十二年罷乾道六年復置詳定一司敕命所以右丞相虞允文提舉參知政事梁克家同提舉淳熙十五

年省罷紹熙二年復置局慶元二年復置提舉以右丞相余端禮兼同提舉以參知政事京鎧兼仍以編修敕令所爲名

宣徽院

宣徽南院使 北院使 掌總領內諸司及三班內侍之籍郊祀朝會宴饗供帳之儀應內外進奉悉檢

視其名物舊制以檢校爲使或領節度及兩使留後闕則樞密副使一人兼領二使亦有兼樞密副使兼

書樞密院南院者資望比北院頗優然皆通掌止用南院印二使共院而各設廳事其吏史則有都勾押

官勾押官各一人前行三人後行十二人分掌四案一曰兵案二曰騎案主賜羣臣新史及掌諸司使至崇班內侍供奉官諸司工匠兵

卒之名籍及三班而下三曰倉案掌春秋及聖節大宴節度使迎授恩賜上元張燈四時祠祭及契丹朝遷補假故輪勅之事貢內廷學士赴上並督其供帳內外進奉視其名物教坊伶人歲給衣

帶專其四曰胄案掌郊祀御殿朝謁聖容賜醮國忌供帳之事諸司使副故事與參知政事樞密副使同

知樞密院事以先後入敘位熙寧四年詔位參政樞密副同知下著爲令九年詔今後遇以職事侍殿上或

中書樞密院合班問聖體及非次慶賀並特序二府班官制行罷宣徽院以職事分隸省寺而使號猶存

初吏部尚書王拱辰治平中知大名府神宗卽位拜太子少保明年檢校太傅改宣徽北院使尋遷南

院立班序位視簽樞元豐六年拱辰除武安軍節度使再任自此遂罷使名不復除獨太子少師張方平

許依舊領南院使致仕哲宗卽位始遷太子太保而罷使名元祐三年復置南北院使儀品恩數如舊制六年以馮京爲南院使而方平亦復使名中書舍人韓川言祖宗設此官禮均二府以待勳舊未嘗帶以致仕且宣徽武官也宮保文官也不宜混并不聽方平亦固辭不拜七年馮京亦以使致仕紹聖三年議者官名雖復而無所治之事乃罷之南渡以後不復再置

三司使

使 副使 判官 鹽鐵使 度支使 戶部使 三部副使 三部判官

三司之職國初沿五代之制置使以總國計應四方貢賦之入朝廷不預一歸三司通管鹽鐵度支戶部號曰計省位亞執政目爲計相其恩數廩祿與參樞同太平興國八年分置三使淳化四年復置使一員總領三部又分天下爲十道曰河南河東關西劍南淮南江南東西兩浙廣南在京東曰左計京西曰右計置使二員分掌俄又置總計使判左右計事左右計使判十道事凡干涉計度者三使通議之五年罷十道左右計使復置三部使咸平六年罷三部使復置三司一員闕正使則以給諫以上權使事使一人以兩省五品以上及知制誥雜學士學士充亦有輔臣罷政出外召還充使者使闕則有權使事又闕則有權發遣公事掌邦國財用之大計總鹽鐵度支戶部之事以經天下財賦而均其出入焉

凡奏事及大事悉置案奏

樞常事止置案太平興國初以買玻爲三司鹽鐵掌天下山澤之貨關市河渠軍器之事以資邦國之用
副使七年以侯陟王明同判三司遂省副使

度支掌天下財賦之數每歲均其有無制其出入以計邦國之用 戶部掌天下戶口稅賦之籍榷酒

工作衣儲之事以供邦國之用 副使以員外郎以上歷三路轉運及六路發運使充 判官以朝官以

上會歷諸路轉運使提點刑獄充 三部副使各一人通簽逐部之事 舊以員外郎以上充端拱初省漕

宗卽位副使遷官遂 三部判官各三人分掌逐案之事 舊以朝官充國初承舊制每部判官一人乾德四

官或巡官以朝官充四年三司止置判官一人推官三人及分 三部各有孔目官一人都勾押官一人勾

覆官四人 鹽鐵分掌七案 一曰兵案 掌衛司軍將大將四排岸司兵卒之名籍及庫務月帳吉凶儀制

帳及刑獄造船捕盜亡逃絕戶資產 二曰胄案 掌修護河渠給造軍器之名物及 度支分掌八案 一曰賞

禁錢景德二年併度支案爲刑案 二曰錢帛案 掌軍中春夏秋冬衣百官奉 三曰糧料案

案五曰茶案六曰鐵案 掌金銀銅鐵朱砂白 鑿綠鑿石炭錫鼓鑄 七曰設案 掌旬設節料齋錢餐錢羊

給案 掌諸給賜贈例物口食內外春冬衣時服綾羅 二曰錢帛案 掌軍中春夏秋冬衣百官奉 三曰糧料案

掌三軍糧料諸州獨粟給受諸 軍校口食御河漕運商人飛錢 四曰常平案 掌諸州平糶大中祥 符七年置主吏七人 五曰發運案 掌汴河廣濟蔡河漕

騎案 掌諸坊監院務飼養 七曰斛斗案 掌兩京倉廩積計度東 八曰百官案 掌京朝幕職官奉料 戶部
分掌五案 一曰戶稅案 掌夏 二曰上供案 掌諸州上 三曰修造案 掌京城工作及陶瓦八作排岸作坊諸

四曰糶案掌糧 五曰衣糧案掌衣校百官請軍轉司奉料春冬衣祿粟茶鹽醫醫儀糧等 三部諸案並與本部都孔目官以下分

學 三部勾院判官各一人以朝官充掌勾稽天下所申三部金穀百物出納帳籍以察其差殊而關防

之鹽鐵院度支院戶部院勾覆官各一人 都磨勘司端拱九年置 判司官一人以朝官充掌覆勾三部帳籍

以驗出入之數 都主轄支收司淳化三年置 判官司以判磨勘司官兼掌官物已支未除之數候至所受之

處附籍報所由司而對除之天下上供物至京即日奏之紙畢取其鈔以還本州 拘收司咸平四年置 以判

磨勘司兼掌凡支收財利未結絕者籍其名件而督之 都理欠司雍熙二年三部各置理欠有勾簿司景德四年廢 判司官一

人以朝官充掌理在京及天下欠負官物之籍皆立限以促之 都憑由司以判都理欠司官兼掌在京

官物支破之事凡部支官物皆覆視無虛謬則印署而還之支訖復據數送勾而銷破之 開折司判司

官一人以朝官充掌受宣敕及諸州申牒之籍發放以付三部兼掌發放勾鑿催驅受事 發放司掌受

三司帖牒而下之太平興國中置 勾鑿司掌勾校三部公事簿帳 催驅司掌督京城諸司庫務未帳京畿倉

場庫務月帳憑由送勾及三部支訖內外奉祿之事 受事司掌諸處解送諸色名籍以發付三部 衙

司管轄官二人以判開拆司官及內侍都知押班充掌大將軍將名籍第其勞而均其役使 勾當公事

官二員以朝官充掌分左右廂檢計定奪點檢覆驗估剝之事 三司推勘公事一人以京朝官充掌推

効諸部公事 勾當諸司馬步軍糧料院官各一人以京朝官充掌文武官諸司諸軍給受奉料批書券
麻諸倉庫案驗而廩賦之 勾當馬步軍專勾司官一人以京朝官充舊以三班掌諸軍兵馬逃亡收併
之籍諸司庫務給受之數審校其欺詐批麻以送糧料院 以上並屬三司使元豐官制行罷三司使並
歸戶部

翰林學士院

翰林學士承旨 翰林學士 知制誥 直學士院 翰林權直 學士院權直 掌制誥詔令撰述之

事凡立后妃封親王拜宰相樞密使三公三少除開府儀同三司節度使加封加檢校官並用制賜大臣
大中大夫觀察使以上用批答及詔書餘官用敕書布大號令用御札戒勵百官曉諭軍民用敕榜遣使
勞問臣下口宣凡降大赦曲赦德音則先進草大詔命及外國書則具本取旨得畫亦如之凡拜宰相及
事重者晚漏上天子御內東門小殿宣召面諭給筆札書所得旨稟奏歸院內侍鎖院門禁止出入夜漏
盡具詞進入遲明白麻出閣門使引授中書中書授舍人宣讀其餘除授并御札但用御寶封遣內侍送
學士院鎖門而已至於赦書德音則中書遣吏持送本院內侍鎖院如除授焉凡撰述皆寫畫進入請印
署而出中書省熟狀亦如之若已畫旨而未盡及外誤則論奏貼正凡宮禁所用文詞皆掌之乘輿行幸

則侍從以備顧問有獻納則請對仍不隔班凡奏事用榜子關白三省樞密院用諮報不名凡初命爲學士皆遣使就第宣詔旨召入院上日敕設會從官宥以樂元豐中始命佩魚自蒲宗孟始見執政議事則繫鞶蓋與侍從異禮也政和三年強淵明請以前後所被旨及案例修爲本院敕令格式五年御書摘文堂榜賜學士院靖康元年吳玠等奏大禮鎖院麻三道以上係雙學士宿直分撰乞依故事從之一承旨不常置以學士久次者爲之凡他官入院未除學士謂之直院學士俱闕他官暫行院中文書謂之權直自國初至元豐官制行百司事失其實多所釐正獨學士院承唐舊典不改乾道九年崔敦詩初以祕書省正字兼翰林權直淳熙五年敦詩再入院議者以翰林乃應奉之所非專掌制誥之地更爲學士院權直後復稱翰林權直然亦互除不廢權正或至三人

翰林侍讀學士

太宗初以著作佐郎呂文仲爲侍讀真宗咸平二年以楊徽之夏竦並爲翰林侍讀

學士始建學士之職其後馮元爲翰林侍讀不帶學士又以高若訥爲侍讀不加別名但供職而已天禧三年張知白爲刑部侍郎充翰林侍讀學士知天雄軍府侍讀學士外使自知白始元豐官制廢翰林侍讀侍講學士不置但以爲兼官然必侍從以上乃得兼之其秩卑資淺則爲說書歲春二月至端午日秋八月至長至日遇雙日入侍邇英閣輪官講讀元祐七年復增學士之號元符元年省去建炎元年詔可

特差侍從官四員充講讀官遇萬機之暇令三省取旨就內殿講讀充宮觀兼侍讀元豐八年五月資政殿大學士呂公著兼侍讀提舉中太乙宮兼集禧觀公事七月韓維兼侍讀提舉中太乙宮元祐元年端明殿學士范鎮致仕提舉中太乙宮兼集禧觀公事兼侍讀不赴六年馮京兼侍讀充太乙宮使未幾乞致仕不允仍免經筵進讀中興以來如朱勝非張浚謝克家趙鼎万俟卨並以萬壽觀使兼侍讀隆興元年張燾以萬壽觀湯思退以醴泉觀並侍讀乾道五年劉章以佑神觀兼焉 臺諫兼侍讀自慶厯以來臺丞多兼侍讀諫長未有兼者紹興十二年春万俟卨以中丞羅汝楫以諫議始兼侍讀自後每除言路必兼經筵矣

翰林侍講學士 咸平二年國子祭酒邢昺爲侍講學士其後又以馬宗元爲侍講不加別名但供職而已景德四年以翰林侍講學士邢昺知曹州侍講學士外使自昺始故事自兩省臺端以上兼侍講元祐中司馬康以著作佐郎兼侍講時朝議以文正公之賢故特有是命紹興五年范冲以宗卿朱震以秩少並兼蓋殊命也乾道六年張栻始以吏部員外郎兼蓋中興後庶官兼侍講者惟此三人若紹興二十五年張扶以祭酒隆興二年王佐以檢正乾道七年林憲以宗卿入經筵亦兼侍講者蓋扶本以言路兼說書就升其秩佐時攝版曹憲嘗爲右史且有舊例故稍優之 臺諫兼侍講慶厯二年召御史中丞賈昌

朝侍講邇英閣故事臺丞無在經筵者仁宗以昌朝長於講說特召之神宗用呂正獻亦止命時赴講筵去學士職中興後王竇爲御史中丞見請復開經筵遂命兼講自後十五年間繼之者惟王唐徐俯二人皆出上意紹興十二年則万俟卨羅汝楫紹興二十五年則正言王珉殿中侍御史董德元並兼侍講非臺丞諫長而以侍講爲稱又自此始其後猶或兼說書臺官自尹穡隆興二年五月諫官自詹元宗乾道九年十二月後並以侍講爲稱不復兼說書矣 宮觀兼侍講國初自元豐以來多以宮觀兼侍讀乾道七年竇文待制胡銓除提舉祐神觀兼侍講是日以宰執進呈虞允文奏曰胡銓早歲士節甚高不宜令其遽去朝廷帝曰銓固非他人比且除在京宮觀留侍經筵故有是命

崇政殿說書 掌進讀書史講釋經義備顧問應對學士侍從有學術者爲侍講侍讀其秩卑資淺而可備講說者則爲說書仁宗景祐元年正月命賈昌朝趙希言王宗道楊安國並爲崇政殿說書日輪二員祇候初侍講學士孫奭年老乞外因薦昌朝等至是特置此職以命之慶曆二年以趙師民預講官復爲崇政殿說書不兼侍講元祐間程頤以布衣爲之然范祖禹乃以著作佐郎兼侍講司馬康又嘗以著作佐郎兼侍講前此未有也崇寧中初除說書二人皆以隱逸起蔡密呂璫仍遂其性詔以仕服隨班朝謁入侍渡江後尹焞初以祕書兼之中間王十朋范成大皆以郎官兼亦殊命也近事侍從以上兼經筵則

曰侍講庶官則曰崇政殿說書故左史兼亦曰侍講紹興十二年万俟卨羅汝楫並兼講讀蓋秦梓時已兼說書便於傳道秦熿復繼之每除言路必預經筵檜死始罷慶元後臺丞諫長暨副端正言司諫以上無不預經筵者正言兼說書自端明巫伋始副端兼說書自端明余堯弼始察官兼說書自少卿陳夔始修注兼說書自朱震始修注官多得兼侍講開禧三年十一月王簡卿知諫院爲左史仍兼崇政殿說書言者以爲不可罷之

觀文殿大學士 學士之職資望極峻無吏守無職掌惟出入侍從備顧問而已觀文殿卽舊延恩殿慶祿七年更名皇祐元年詔置觀文殿大學士寵待舊相今後須曾任宰相乃得除授時賈昌朝由使相右僕射觀文殿大學士判尙書都省觀文殿置大學士自昌朝始三年詔班在觀文殿學士之前六尙書之上自是曾任宰相者出必爲大學士熙寧中韓絳宣撫陝西河東得罪罷守本官四年用明堂赦授觀文殿學士宰相不爲大學士自絳始中興後非宰相而除者自紹興二十年蔡熿始熿知樞密院郊祀大禮使禮成以學士遷且視儀揆路非典故也乾道四年汪澈舊以樞密使爲學士遷九年王炎以樞密使爲西川安撫使除至慶元間趙彥逾自工部尙書爲端明殿學士直以序遷至焉曾爲宰相而不爲大學士者自紹興元年范宗尹始

觀文殿學士 觀文殿本隋煬帝殿名國初爲文明殿學士慶祿七年宋庠言文明殿學士稱呼正同眞宗諡號兼禁中無此殿額其學士理自當罷乞擇見今正朝或祕殿以名學士易之乃詔改爲紫宸殿學士以參知政事丁度爲之時學士多以殿名爲官稱丁遂稱曰丁紫宸八年御史何郯以爲紫宸不可爲官稱於是改延恩殿爲觀文殿卽殿名置學士仍以度爲之自後非曾任執政者弗除熙寧中王韶以熙河功元豐中王陶以宮僚雖未歷二府亦除是職蓋異恩也然詔猶兼端明殿龍圖學士云

資政殿大學士 資政殿在龍圖閣之東序景德二年王欽若罷參政眞宗特置資政殿學士以寵之在翰林學士下十二月復以欽若爲資政殿大學士班文明殿學士之下翰林學士承旨之上資政殿置大學士自欽若始自欽若班翰林承旨上一時以爲殊寵祥符初向敏中以前宰相再入爲東京留守復加此職自是訖天聖末二十餘年不以除人明道元年李迪知河陽召還始再命之景祐四年王曾罷相復除二十年間除三人皆前宰相也宋庠罷參知政事仁宗嘗之厚因加此職自欽若後非宰相而除者惟庠一人康定二年右正言梁適請遵先朝故事定以員數於是詔大學士置二員學士三員紹興十年鄭億年歸自僞齊除資政殿二年加大學士許出入如二府儀億年未嘗秉政十五年秦熺自翰林學士承旨爲資政詔立班恩數同執政十六年秦檜弟梓以端明卒于湖州進大資政仕恤典同參政是後從臣

自端明視政府而序進者遂爲常矣

端明殿學士 端明殿卽西京正衙殿也後唐天成元年明宗卽位之初四方書奏命樞密使安重誨送讀懜於文義孔循獻議始置端明殿學士命馮道趙鳳俱以翰林學士充班在翰林學士上後有轉改止於翰林學士內選任初如三館例職在官下趙鳳轉侍郎諷任園特移職在官上後遂爲故事宋太宗初以程羽爲之後隨殿名改爲文明殿學士慶厯中改爲紫宸後又改爲觀文明道二年改承明殿爲端明殿復置端明殿學士以翰林侍讀學士宋綬爲之在翰林學士之下自明道訖元豐無前執政爲之者僅以待學士之久次者元豐中以前執政爲之自曾孝寬始以見任執政爲之自王安禮始政和中嘗改爲建康殿建炎二年都省言延康殿學士舊係端明殿學士詔依舊後拜簽樞者多領焉

總閣學士直學士 宋朝庶官之外別加職名所以厲行義文學之士高以備顧問其次與論議典校讐得之爲榮選擇尤精元豐中修三省寺監之制其職並罷滿歲補外然後加恩兼職直龍圖閣省寺監掌貳補外或領監司帥臣則除之待制雜學士給諫以上補外則除之係一時恩旨非有必得之理元祐二年詔復增館職及職事官並許帶職尙待二年加直學士中丞侍郎給舍諫議通及一年加待制紹聖三年詔職事官罷帶職非職事之官仍舊中興後學士率以授中司列曹尙書翰林學士之補外者權尙書

給諫侍郎則帶直學士待制焉

龍圖閣學士 直學士 待制 大中祥符中建在會慶殿西偏北連禁中閣東曰資政殿西曰述古殿

閣上以奉太宗御書御製文集及典籍圖書寶瑞之物及宗正寺所進屬籍世譜有學士直學士待制直閣等官 學士大中祥符三年置以杜鎬爲之班在樞密直學士上六年詔結銜在本官之上 直學士景德四年置以杜鎬爲之班在樞密直學士下祥符六年詔結銜在本官之上 待制景德元年置以杜鎬戚繪爲之並依舊充職四年詔班在知制誥下並赴內殿起居自改官制爲學士初復之職或知制誥平出除之

天章閣學士 直學士 待制 天禧四年建在會慶殿之西龍圖閣之北明年仁宗卽位修天章閣畢以奉安真宗御製東曰羣玉殿西曰藥珠殿北曰壽昌殿南曰延康殿內以桃花文石爲流栒之所以在位受天書祥符改曰天章取爲章于天之義天聖八年置待制慶祿七年又置學士直學士又有侍講學士慶祿七年初置在龍圖閣學士之下學士罕以命人迄仁宗世纔王贊一人秦堪自顯謨閣進直天章閣以稱呼非便辭詔改龍圖自是天章不爲帶職 直學士慶祿七年初置天章閣直學士在龍圖閣直學士之下 待制天聖八年初置直於祕閣與龍圖遞宿命范諷鞠詠充職中興後圖籍符瑞寶玩

之物若國史宗正寺所進屬籍獨藏于天章閣祖宗御容潛邸旌節亦安奉焉

寶文閣學士 直學士 待制 閣在天章閣之東西序羣玉藻珠殿之北即舊壽昌閣慶厯改曰寶文

嘉祐八年英宗即位詔以仁宗御書御集藏于閣命王珪撰記立石治平四年神宗即位始置學士直學

士待制恩賜如龍圖英宗御書附于閣 學士治平四年初置以呂公著兼 直學士治平四年初置以

邵必為之 待制治平四年初置

顯謨閣學士 直學士 待制 元符元年曾布鄧洵仁各申請建閣詔翰林學士中書舍人撰閣名五

以聞遂建閣藏神宗御集以顯謨為名徽宗建中靖國元年詔以顯謨閣為熙明閣仍置學士直學士待

制續奉旨仍以顯謨為額崇寧元年詔顯謨閣學士直學士待制如三閣故事序位在寶文閣學士直學

士待制之下學士直學士待制並建中靖國元年置

徽猷閣學士 直學士 待制 大觀二年初建徽猷閣以藏哲宗御集置學士直學士待制等官

敷文閣學士 直學士 待制 紹興十年置藏徽宗聖製置學士等官

煥章閣學士 直學士 待制 淳熙初建藏高宗御製十五年置學士等官

華文閣學士 直學士 待制 慶元二年置藏孝御宗製置學士等官

寶謨閣學士 直學士 待制 嘉泰二年置藏光宗御製置學士等官

寶章閣學士 直學士 待制 寶慶二年置藏寧宗御製置學士等官

顯文閣學士 直學士 待制 咸淳元年置藏理宗御製置學士等官

集英殿修撰 國初有集賢殿修撰直龍圖閣直祕閣三等政和六年始置集英殿修撰右文殿修撰祕閣修撰舊制貼職無雜歷至是因增置乃定為雜歷其集英修撰中興後以寵六曹權侍郎之補外者下待制一等

右文殿修撰 元祐元年許內外官帶貼職紹聖二年詔職事官罷帶職易集賢殿學士為修撰政和六年以集賢院無此名其見任集賢院修撰並改為右文殿修撰次於集英殿修撰為貼職之高等祕閣修撰 政和六年置以待館閣之資深者仍多由直龍圖閣遷焉

直龍圖閣 祥符九年以馮元為太子中允直龍圖閣直閣之名始此凡館閣之久次者必選直龍圖閣皆為擢待制之基也中興後凡直閣為庶官任藩閫監司者貼職各隨高下而等差之

直天章閣至直顯文閣並同

直祕閣 國初以史館昭文館集賢院為三館皆寓崇文院太宗端拱元年詔就崇文院中堂建祕閣擇

三館真本書籍萬餘卷及內出古畫墨跡藏其中以右司諫直史館宋泌爲直祕閣直館直院則謂之館職以他官兼者謂之貼職元豐以前凡狀元制科一任還卽試詩賦各一而入否則用大臣薦而試謂之入館官制行廢崇文院爲祕書監建祕閣於中自監少至正字列爲職事官罷直館直院之名獨以直祕閣爲貼職皆不試而除蓋特以爲恩數而已 故事外官除館職如祕閣校理直祕閣者必先移書在省執事敘同僚之好乃卽館設盛會宴之自崇寧以來外官除館職旣多此禮寢廢

東宮官

太子太師 太傅 太保 太子少師 少傅 少保 國初師傅不常設仁宗升儲置三少各一人參政李昉兼掌賓客及升首相遂進少傅此宰相兼宮僚之始也丁謂兼少師馮拯兼少傅曹利用兼少保是時實爲東宮官餘多以前宰執爲致仕官若太子太師太保以待宰相官未至僕射者及樞密使致仕亦隨本官高下除授太子少師少傅少保以待前執政惟少師非經顧命不除若因遷轉則遞進一官至太師卽遷司空天禧末皇太子同聽政乃以首相兼少師自後神宗欽宗孝宗光宗在東宮皆不置開禧三年史彌遠自詹事入樞府乃進兼賓客已而太子侍立遂以丞相錢象祖兼太子少傅明年景憲太子立象祖兼少師彌遠以右相兼少傅未幾彌遠丁內艱象祖亦去位又明年彌遠起復遂兼進少師

景定元年度宗升儲以賈似道爲少師

太子賓客 至道元年建儲初置賓客二人以他官兼天禧四年參政任中正樞副錢惟演參政王曾並兼太子賓客執政兼東宮官始此中興後不置開禧三年景憲太子立始以執政兼賓客後復省景定元年度宗升儲以朱熠皮龍榮沈炎並兼賓客

太子詹事 仁宗升儲置詹事二人神宗欽宗升儲並置二人皆以他官兼登位後省乾道元年莊文太子立置詹事二人踰月詔太子詹事遇東宮講讀日並往陪侍七年光宗正儲位以敷文閣直學士王十朋敷文閣待制陳良翰爲太子詹事不兼他官非常制也景定元年度宗升儲以楊棟兼詹事

太子左庶子 右庶子 左諭德 右諭德 舊制不常設儲闈之建隨宜制官以備僚案多以他官兼領仁宗神宗升儲庶子諭德各置二人欽宗升儲置一人紹興三十二年孝宗以建王立爲皇太子置庶子諭德各一人除右虛左乾道元年及七年各置一人開禧三年景憲太子立初除左虛右明年左右始並置

太子侍讀 侍講 神宗升儲始置各一人乾道淳熙開禧各依故事並置乾道七年禮部太常寺言討論東宮開講并節朔賀慶壽謝禮儀宮僚講讀無已行故事當依放講筵少殺其禮每遇講讀詹事以下

至講讀官上堂並用賓禮參見依官職序坐皇太子正席講讀官迭起如延英儀講罷復位節朔不受宮僚參賀元日冬至詹事以下牋賀謝辭初如常見之禮後離位致詞復位就坐茶湯罷詹事初上參見皇太子拜皇太子答拜庶子等初上參見皇太子受拜庶子諭德及講讀官雖有坐受之禮止是五禮新儀所載兼逐日致拜之禮近例皆已不行或遇合致拜日更合參酌天禱至道故事施行按天禱二年九月五日左庶子張士遜等言臣等日詣資善堂參見皇太子得令升階列拜然後跪受望令皇太子並從之坐受參見詔不許至道元年皇太子每見太子賓客必先拜迎送常降階及門

太子中舍人 舍人 至道天禱各置一人神宗欽宗升儲並如舊置嘉定初除二人慶元以中舍人在舍人上

資善堂 翊善 贊讀 直講 說書 皇太子宮小學教授 資善堂小學教授 翊善贊讀直講皆

舊制說書而下中興以後增置 資善堂自仁宗爲皇子時爲肄業之所每皇子出就外傳選官兼領元豐八年哲宗初開講筵詔講讀官日赴資善堂以雙日講讀仍輪一員宿直又詔三省樞密院講讀修注官錫宴於資善堂政和元年定王嘉王出就資善堂聽讀詔宰執就見靖康元年詔皇太子出就外傳就資善堂過學舍令國子監供監書紹興五年孝宗封建國公出就資善堂聽講先是宰臣趙鼎得旨於宮

門內造書院至是始成以爲資善堂命儒臣爲直講翊善悉如資善故事專用趙鼎言以左史范冲充翊

善右史朱震充贊讀時稱極選帝曰朕令國公見沖震必設拜蓋尊重師傅不得不如此紹興十二年建國公出就外第及紹興三十年由普安郡王爲皇子進封建王時皇孫皆就傅以校書郎王十朋爲小學教授紹興三十二年孝宗卽位詔三皇子位各置說書官一員又置贊讀直講一員淳熙七年皇孫英國公始就傅詔置皇太子宮小學教授一員十六年光宗卽位皇子進封嘉王置王府贊讀翊善直講各一員慶元六年景獻太子爲福州觀察使詔令資善堂授書置小學教授二員開禧元年進封榮王仍開資善堂置贊讀直講說書官各一員又置翊善一員度宗升儲並置翊善贊讀等官

主管左右春坊事二人以內臣兼同主管左右春坊事二人以武臣兼承受官一人以內侍充仁宗神宗升儲並置中興後置官並同

太子左右衛 率府率 副率 左右司禦 率府率 副率 左右清道 率府率 副率 左右監門 率府率 副率 左右內 率府率 副率 官存而無職司至道元年東宮置左清道率府率副率兼左春坊謁者主贊引三年真宗卽位而省天禧二年又以左清道率郭承慶左右監門副率夏元亨兼左右春坊謁者仁宗卽位復省中興後不置惟以監門率府副率爲環衛

親王府 傅 長史 司馬 諮議參軍 友 記室參軍 王府教授 小學教授 傅及長史司馬

有其官而未嘗除太平興國八年諸王出閣楚王府置諮議參軍二員翊善一員陳王府置諮議翊善各一員韓王冀王益王置翊善各一員後又置記室及諸王府侍講一員並以常參官兼充

其後多不置諮議翊善記室或

止一大中祥符九年仁宗初封壽春郡王置友二員亦以常參官兼充天禧二年進封昇王友遷諮議仍

置記室一員又皇姪皇孫侍教南北伴讀無定數

至道初太宗以皇親子孫就講學欲置侍講之職中書言按唐太宗改諸王侍讀為奉諸王講讀今皇孫皇姪

皆環衛之職請以教授為名從之選京朝官通經者充其後又令王府記室翊善侍講分兼南北宅教授大中祥符三年又有侍教之名自是南北院或有伴讀凡諸宮皆有教授初無

定員是年英宗以宗室自率府副率已上八百餘人奉朝請者四百餘人而教官纔六員乃詔增置教授

官凡皇族年三十已上者百一十三人置講書四員年二十以上者百十三人置講書四員年十五已上

者三百九人增置教授五員年十四已下者別置小學教授十二員并舊六為二十七員以分教之其子

弟不率教俾教授官本位尊長具名申大宗正司量行戒責教授官不職大宗正司密訪以聞舊制親賢

宅置講書紹興十二年改為府教授掌教親賢宅南班宗子淳熙十二年詔建魏惠憲王府置小學教授

二員以館職兼充掌訓皇孫既長趨朝謁則不以小學名而講習如故自後皇姪皇孫皆置教授

宋史卷一百六十二考證

職官志二觀文殿學士宰相不爲大學士自絳始中興後非宰相而除者自紹興二十年蔡熿始熿知樞密院郊祀大禮使禮成以學士遷○臣開鼎按通鑑紹興十八年三月以秦熿知樞密院事四月秦熿罷爲觀文殿學士則蔡字應是秦字之譌二十年應作十八年

宋史卷一百六十二考證

元中書右丞相總裁脫脫等修

職官志第一百一十六

職官三

吏部

戶部

禮部

工部
六部監門
六部架閣

吏部掌文武官吏選試擬注資任遷敘陞補考課之政令封爵策勳賞罰殿最之法凡文階官之等二十武選官之等五十有六幕職州縣官之等七散官之等九皆以左右高下分屬於四選曰尚書左選文臣京朝官以上及職任非中書省除授者悉掌之曰尚書右選武臣升朝官以上及職任非樞密院除授者悉掌之自初任至幕職州縣官侍郎左選掌之自副尉以上至從義郎侍郎右選掌之若文武官雖不隸左右選而職任係中書省樞密院除授者其制命誥敕皆本部奉行凡應注擬升移敘復陞補及酬賞封贈者所隸審驗格法上尚書省法例可否不決應取裁者亦如之若中散大夫左右武大夫以上合命詞者列其遷敘資級歲月功過上中書省樞密院畫旨給告通書本部長貳及所隸郎官其屬有曰司封曰司勳曰考功凡官十有三尚書一人侍郎一人郎中員外郎尚書選二人侍郎選各一人司封司勳考功各一人舊制有三司尚書主其一侍郎二員各主其一分銓注擬事其後但存尚書銓餘東西銓印存而

事廢淳化中又置考課院磨勘幕府州縣功過引對黜陟至道二年以其事歸流內銓判流內銓事二人以御史知雜以上充掌節度判官以下州府判司諸縣令佐擬注對揚磨勘功過之事判部事二人以帶職京朝官或無職事朝官充凡文吏班秩品命令一出於中書而小選院既不復置本曹但掌京朝官敘服章申請攝官計吊祠祭及幕府州縣官格式闕簿辭謝拔萃舉人兼南曹甲庫之事流外銓掌考試附奏諸司人吏而已南曹掌考驗選人殿最成狀而送流內銓關試勾黃給麻之事甲庫掌受制敕黃關給籤符優牒選人改名廢置之事初淳化三年置磨勘京朝官院四年改太平興國中置差遣院至是併入審官院置知院二人以御史知雜以上充

舊以朝官充

掌考校京朝官殿最敘其爵秩而詔於朝分擬內外任

使而奏之元豐官制行大曹尚書侍郎爲長貳郎官理郡守以上資任者爲郎中通判以下資序者爲員

外郎除授皆視寄祿官高一品以上者爲行下一品者爲守下二品以下者爲試品同者不用行守試餘

職準此元祐初置權尚書奉賜依守侍郎班序在試尚書之下雜壓在左右常侍之下又置權侍郎如未

歷給事中中書舍人及待制以上者並帶權字祿賜比諫議大夫郎官雖理知州資序未曾實歷知州及

監司開封府推官者止除員外郎又詔職事官除去行字一等又以六曹職事閑劇不等減定員數事簡

者他司兼領司封司勳各減郎官一員紹聖初詔元豐法以行守試制祿三等元符元年吏部言元祐法

小使臣只降宣劄但務從簡於理未安請自借職而上依元豐法給告從之崇寧元年詔大宗正丞大理正諸寺監丞太學武學律學博士太學正錄諸宮院諸州教授堂除外其吏部闕不許占差已授未赴及初到任人二年詔十年不到部者依長定格與降一官二十年以上則除其籍靖康元年七月詔以吏部四選逐曹條例編集板行八月臣僚言祖宗時未有宗室參部之法神宗時始選擇差注一二崇寧初立法大優宗室參選之目在本部名次之上既歷年月深遠勞効顯著之人復著名州大郡優便豐厚之處議者頗欲懲革不注郡守縣令與在部人通理名次從之

尚書掌文武二選之法而奉行其制命凡序位有品寓祿有階列爵有等賜勳有給分任有職選官有格考其功過計其歲月辨其位秩而以序進之凡文臣自京朝官武臣自大使臣以上

舊內殿崇班以上

選授封爵

功賞課最之事所隸官分掌其事兼總於尚書驗實而後判成以天下職事員闕具注於籍月取其應選者揭而書之集官注擬考闕闕以定其可否若有疑不能決小事則申請大事則稟議於尚書省應論奏者與郎官同請對大祭祀則奉玉幣以授左僕射執爵以授左丞舊尚書爲所選官名班左丞上自釐正百司吏部以金紫光祿大夫戶禮兵刑工部以銀青光祿大夫換授而任六曹尚書者始實領職事左選分案八置吏三十右選分案六置吏十有六曰主事令史曰書令史曰守當官二十四司亦如之南渡初

諸曹長貳互置惟吏部備官紹興八年依元祐制六曹皆置權尚書以處未應資格之人其屬有侍郎二人分左右選尚書左右選各置郎中一人侍郎左右選各置郎中一人司封司勳考功各一人郎官分掌其事而兼總於尚書左選掌考校京朝官以上殿最敘其爵秩擬內外任使而奏授之分案十二曰六品曰七品曰八品曰九品曰注擬曰名籍曰掌闕曰催驅曰甲庫曰檢法曰知雜曰奏薦賞功司吏總主事一人令史二人書令史九人守當官一十一人正貼司一十六人私名一十二人楷書二人法司一人官告院六部監門隸焉右選掌大使臣以上差注材武人有格二十一及破格出闕較量功過奏薦諸軍賞功分案十曰大夫曰副使曰修武曰注擬掌闕曰奏薦賞功曰開拆曰名籍曰甲庫曰法司曰知雜吏額主事一人令史二人書令史九人守當官一十二人正貼司八人私名一十人法司一人紹熙三年左司諫謝源明言乾道九年詔旨兵部應承三省密院批送勘當文字並令本部郎官長貳按法裁決可否申上朝廷施行卽不得持兩端如或事有疑難及生剗無條例者令長貳據所見申明將上取旨乞明詔六曹遵守從之

侍郎分左右選左選掌文臣之未改官者凡始命而未應參部者皆試而後選若應格則具歲月歷任功罪及所舉官員數同郎官引見於便殿稟奏改官右選掌武臣之未升朝者舊自供奉官以上其職任自親民官

至部除將監官皆學其選授注擬之法凡初仕而試不中等及已入官而未應選者皆勿注正闕官制

行尚書侍郎通治曹事奏事則同班惟吏部分領四選大祭祀則舉玉幣置諸案薦饌則進搏黍進熟則

執匏爵以授右丞飲福則奉爵視朝則執文武班簿對立以待顧問左選分案十五置吏四十有三右選

分案八置吏四十有七

紹興四年吏部侍郎葉祖洽言侍郎左選準元豐朝旨類姓置簿左右選理宜一體右選亦乞置簿拘轄功過從之

建炎四年五月詔六曹

復置權侍郎如元祐故事滿二年為真

補外者除待制未滿除修撰

左選事丞直郎以下擬注州府判司諸縣令佐監

當及磨勘功過之事分案十三乾道裁減吏額共置三十五人右選掌校副尉以上較武擬官行賞換官

考其殿最分案十五乾道裁減吏額共置四十八人舊制吏部除侍郎二員分典左右選總稱吏部侍郎

間命官兼攝惟稱三選侍郎或右選而已紹興三年謝深甫張叔椿兼攝始有侍左侍郎侍右侍郎之稱

既而林大中沈揆擢貳尚書則侍左侍右徑入除因相承不改

郎中

員外郎 尙左 侍左

尙右 侍右

舊主判二人以朝官充元豐官制行置吏部郎中主管尚書左右選及侍

郎左右選各一員參掌選事而分治之凡郎官並用知府資序以上人充未及者為員外郎建炎四年詔

權攝添差郎官並罷初進擬第去吏部郎官及擬告身細銜始直書尚書吏部郎中或員外郎主管尚書

某選主管侍郎某選紹興八年呂希常以監六部門兼權侍右郎官紹興三十一年李端明正除尙右郎

官既而何備楊倓費行之除吏部郎官皆有侍左侍右尙左尙右之稱自此相承不改清熙十六年光宗卽位詔四選通差用尙書顏師魯之請也先是乾道元年詔今後非曾任監司守臣不除郎官著爲令自是館學寺監臣拘礙資格遷除不行郎曹闕員但得兼攝旋卽外補間有不次擢用者則自二著職升二史以至從列其自外召至爲郎則資級已高曾不數月必序進卿少而郎有正員者益少矣

司封郎中 員外郎 掌官封敘贈承襲之事凡三師三公以下至升朝官褒贈祖考母妻親王郡王內

外命婦以下保任宗屬封爵諸親皆因其位敘而爲之等凡宗室當賜名訓具抄擬官凡庶姓孔氏柴氏折氏之後應承襲者辨其嫡庶列爵九等曰王曰郡王曰國公曰郡公曰縣公曰侯曰伯曰子曰男分國三等大國二十七次國二十小國二百二十內命婦之品五曰貴妃淑妃德妃賢妃曰大儀貴儀淑儀淑容順儀順容婉儀婉容昭儀昭容昭媛修儀修容修媛充儀充容充媛曰婕妤曰美人曰才人貴人外內命婦之號十有四曰大長公主曰長公主曰公主曰郡主曰縣主曰國夫人曰郡夫人曰淑人曰碩人曰令人曰恭人曰宜人曰安人曰孺人敘贈之制三公宰臣執政節度使三代金紫銀青光祿大夫二代餘官一代皆辨其位序以進之加食邑實封則視其品之高下以爲戶數多寡之節凡事之可否與司勳通決於長貳分案三設吏六元祐元年中書後省言臣僚封贈父母依舊制命詞大中大夫觀察使以上用

專詞餘用海詞二年詔父及嫡母存不得請所生母封贈所生母未封亦不許先及其妻紹聖元年詔宗室換授文官身亡者通直郎以上贈三官元符元年以元祐間封贈案前制詔並依元豐法二年詔寺監官雜壓在通直郎之上

者雖係宣教郎遇大禮封贈政和二年詔封母則隨所封五等

謂如封南陽縣開國男則隨其爵稱南陽縣男令人封魏國公則稱魏國公夫人之

類應婦人不因夫子得封號

謂命官非升朝而母年九十以上或十庶人婦女年百歲并特旨若回授者

或因子孫得封贈其夫至升朝或非

升朝應封贈者並孺人宣和二年臣僚言近年有京官任校書郎正字者得封贈今則監丞未升朝者亦乞依例蓋緣監丞雜壓在校書郎之上故引以為請甚無謂也不獨此爾又有小使臣偶因薄勞或磨勘轉官遂乞回授封贈父母實為太濫望降旨今後封贈並依舊法敢有擅更陳乞紊亂典章者實之典刑庶幾僥倖者息而名分正矣從之建炎以後並同

司勳郎中

員外郎參掌勳賞之事凡勳級十有二曰上桂國正二品曰桂國從二品曰上護軍正三品

曰護軍從三品曰上輕車都尉正四品曰輕車都尉從四品曰上騎都尉正五品曰騎都尉從五品曰驍

騎尉正六品曰飛騎尉從六品曰雲騎尉正七品曰武騎尉從七品率三歲一遷必因其除授以加之凡

賞有格若事應賞從其所隸之司考實以報則必審核其狀以格覆之謂之有法酬賞非格所載參酌輕重擬定以上尚書省謂之無法酬賞若功賞未酬而賞格改易者輕從舊格重從新格錄用前代帝系及

勳臣之後則考其族系而奉行其制命分案四置吏十有九元祐元年吏部言諸色人援引徼求入流太冗應工匠伎藝之屬無法入官者雖有勞績並止比類支賜未經酬獎者亦如之紹聖二年戶部言元豐官制司勳覆有法式酬賞無法式者定之元祐中有法式者止令所屬勘驗自後應于錢穀本部指定關司勳則是戶部兼司勳之職請依舊制從之四年應川陝人任本路差遣者酬獎減半政和四年詔司勳行下所屬將一司一路條制參照酬獎格法類集參用又詔以詳定國朝勳德臣僚職位姓名送吏部用工部尙書鄭允中所編傳也隆興元年省併以司封郎官兼領濬熙元年復以司農寺丞范仲芑兼司勳未幾改除復省裁減吏額主事一人令史一人書令史四人守當官三人正貼司四人私名三人

考功郎中 員外郎掌文武官選敘磨勘資任考課之政令凡命官隨所隸選以其職事其法於麻給之於其屬州若司歲書其功過應升遷授者驗麻按法而敘進之有負殿則正其罪罰以七事考監司一曰舉官當否二曰勸課農桑增墾田疇三曰戶口增損四曰興利除害五曰事失案察六曰較正刑獄七曰盜賊多寡八曰善三最考守令德義有聞清謹明著公平可稱恪勤匪懈爲四善獄訟無冤催科不擾爲治事之最農桑墾殖水利興修爲勸課之最屏除姦盜人獲安處振恤困窮不致流移爲撫養之最通善最分三等五事爲上二事爲中餘爲下若能否尤著則別爲優劣以詔黜陟凡內外官計在官之日滿一

歲爲一考三考爲一任磨勘之法文選官之等四銀青光祿大夫至朝議大夫進士理八年非進士理十年通直郎至大中大夫充諫議大夫待制以上職任者理三年朝散大夫至承務郎理四年武選官之等六遙郡團練使刺使閤門舍人轉左武右武郎理十年武功大夫以下理七年橫行武德大夫以下至校尉理五年閤門祇候初補從義郎以下至承節郎承信郎充隨行指使理四年承信郎以功補授及宗室觀察使以下祇應校尉理三年宗室承宣使以下祇應校尉理二年幕職州縣官之等三進士第一第二第三名及第者一任回改京官自留守府判官至縣令理六考自軍巡判官至縣尉理七考率以法計其歷任歲月功過而序遷之凡改服色者以勞年計之執政官節度使銀青光祿大夫以上應謚者覆太常所定行狀報尙書省官集議以聞

紹聖四年河東提刑司徐君平奏乞凡將集議前期三日持考功狀備示當議之官使先紬繹而後集于都堂以詢之庶幾有所見者得以自

中以稱朝廷博謀盡下之意從之

凡立碑碣名額之事掌之舊制考課院其定殿最皆有考辭元豐官制行悉罷分案十

有七置吏六十有八元祐三年詔知州考課法吏部上其事于尙書省送中書省取旨賞罰劣等應罰而已衝降者仍從衝降法縣令以下本部專行六年樞密院言元豐末堂除知州軍三年爲任武任依此元祐初以成資爲任武臣未曾立法詔武臣任六等差遣川廣成資餘並三十箇月爲任建炎以後並同應文武臣磨勘升資任較考定其殿最別其優劣以詔黜陟予奪沒則謚審覆而參定之凡特恩賜謚命

詞給告除給敕分案十一曰大品曰七品曰八品曰曹掾曰令丞曰從義曰成忠曰資任曰檢法曰知雜
曰開拆裁減吏額主事二人令史四人書令史八人守當官十三人正貼司三人私名一十人

宣統十三年再共減

人三

官告院主管官一員以京朝官充舊制提舉一人以知制誥充判院一人以帶職官京朝充掌吏兵勳封官告以給姬嬪王公文武品

官內外命婦及封贈者各以本司告身印印之文臣用吏部武臣用兵部王公及命婦用司封加勳用司

勳官制行四選皆用吏部印惟蕃官則用兵部印記凡綾紙幅數標軸名色皆視其品之高下應奏鈔畫

聞者給之令史十五人元豐五年官制所重定制受敕授奏授告身式從之紹聖元年吏部言元豐法凡

八品者給告身無品者給黃牒元祐中以內外差遣并職事官本等內改易或再任者並給黃牒乃與無

品人等詔今後帥臣監司待制以上知州並給告餘依舊三年詔職事官監察御史以上因事罷並給告

元符元年吏部言元祐法小使臣只降宣劄乞自承信郎而上依舊給告宣和元年詔官告院立條凡製

造告身法物應用綾錦私輒放效織造及買取服用者立賞許告大抵官告之制自乾德四年詔定告身

綾紙標軸其制闕略咸平景德中兩加潤澤至皇祐始備神宗即位循用皇祐舊格建元豐改制名號雖

異品秩則同故亦未遑別定徽宗大觀初乃著為新格凡標帶網軸等飾始加詳矣凡文武官綾紙五種

分十二等色背銷金花綾紙二等一十八張滿粉總金花大扇軸入蒼景錦襪色帶三及三少侍

色帶左右僕射白背五色綾紙二等院兩省侍郎尚書左右丞同知簽書樞密院事副王郡王特進觀文

殿大學士太尉東宮三少冀堯青徐揚荆豫梁雍州牧御史大夫宗室節度使至率府副率之帶皇字者

用之一等一十七張暈錦襪靴玳瑁軸色帶觀文殿學士資政殿大學士六尚書金紫光祿銀青光祿光

祿大夫左右金吾衛左右衛上大綾紙四等奉大夫翰林學士資政端明殿學士龍圖天章寶文顯謨

欲閣學士左右散騎常侍御史中丞開封尹六曹侍郎樞密直學士龍圖天章寶文顯謨猷閣直學士

正議通奉大夫諸衛上將軍太子賓客詹事侯用之一等十二張法錦襪兩面撥花細牙軸色帶給事中

中書舍人通議大夫司成左右諫議大夫龍圖天章寶文顯謨猷閣待制太中大夫祕書殿中監伯用

之一等一十張法錦襪撥花常使大牙軸色帶中大夫七寺卿京畿三路轉運使發運使中奉中散大夫

通侍大夫樞密都承旨祭酒太常宗正少卿祕書殿中少監正侍中侍大夫入內侍省內侍省都知諸

州刺史中亮中衛大夫防禦團練使太子左右庶子諸衛大將軍駙馬都尉典樂子用之一等八張盤毯

錦襪大牙軸色帶七寺少卿朝議奉直大夫左右司郎中司業開封少尹少府將作軍器監都水使者拱

衛大夫太子詹事左右諭德左武右武大夫入內侍省內侍省副都知樞密承旨副都承旨諸房副承

旨起居郎舍人侍御史左右司員外郎六曹郎中朝請朝散朝奉大夫京畿三路轉運副使諸路轉運使

副使知上州提舉三路保中入內侍省內侍省押班武功至武翼大夫開封左右司錄事蕃官使臣殿

中侍御史左右司諫正言監察御史和安大夫至翰林其醫男用之內殿

中侍御史監察御史用九張蕃官使臣用大錦襪背帶此其小異者也

中綾紙二等一十七張中錦襪

員外郎朝請朝散朝奉郎少府將作軍器少監諸位將軍太子侍讀侍講中亮中衛左武右武郎中知下

州諸路提點刑獄發運判官提點鑄錢承議郎武功至武翼郎太子中允舍人親王府翊善贊讀侍讀符

寶郎太常中正祕書殿中丞六尚奉御大理正著作郎通事舍人太子諸率府率直龍圖閣開封府諸曹

事大晟府樂令直祕閣崇政殿說書和安郎至翰林醫正用之一等六張中錦襪中牙軸青帶奉議郎七

寺丞祕書郎太常博士著作佐郎國子少府將作軍器都水監丞國子博士大理司直評事修武敦武郎

通直郎內常侍轉運判官提舉學士諸州通判御史臺檢法官主簿九寺主簿親王記室閣門祇候樞密

乾隆四年校刊 宋史卷一百六十三職官志 六

用大綾紙大牙袖大錦標小綾紙一等五張黃葩錦標次等角袖青帶繡軍指凡封蠻夷酋長及蕃長綾紙兩種各一

等五色銷金花綾紙一等一十八張翠色獅子錦標法錦縞紫絲綉子銀粉縞縐粉中綾紙一等七張法

牙袖青帶繡蠻官承襲轉官用之大觀併歸尚書省政和仍歸吏部差主建炎元年詔文臣大中大大夫武臣正任觀察使

及宗室南班官以上給告以下並給敕三年詔逐等依舊給告紹興二年詔四品以下官及職事官監察

御史以上官告並用錦標外其餘官并封贈權用纈羅代充十四年始盡用錦其後又詔內外命婦郡夫

人以上乃得用網袋及銷金其餘則否至二十六年詔內外文武臣僚告敕並依大觀格式製造裁減吏

額共置二十九人淳熙十三年又減五人

戶部 國初以天下財計歸之三司本部無職掌止置判部事一人以兩制以上充以受天下上貢元會

陳于庭元豐正官名始並歸戶部掌天下人戶土地錢穀之政令貢賦征役之事以版籍考戶口之登耗

以稅賦持軍國之歲計以土貢辨郡縣之物宜以征權抑兼并而佐調度以孝義婚姻繼嗣之道和人心

以田務券責之理直民訟凡此歸於左曹以平常之法平豐凶時斂散以免役之法通貧富均財力以伍

保之法聯比閭察盜賊以義倉振濟之法救饑饉恤艱阨以農田水利之政治荒廢務稼穡以坊場河渡

之課酬勤勞省科率凡此歸於右曹尚書置都拘轄司總領內外財賦之數凡錢穀帳籍長貳選吏鈎考

其屬三曰度支曰金部曰倉部熙寧中以知樞密院陳升之參知政事王安石制置條例建官設屬取三
司條例看詳具所行事付之三年罷歸中書以常平免役農田水利新法歸司農以實案歸軍器監修造
歸將作監推勘公事歸大理寺帳司理欠司歸比部衙司歸都官坑冶歸虞部而三司之權始分矣元豐
官制行罷三司歸戶部左右曹而三司之名始泯矣凡官十有三尙書一人侍郎二人郎中員外郎左右
曹各二人度支金部倉部各二人元祐初□侍郎司馬光言天下錢穀之數五曹各得支用戶部不知出
納見在無以量入爲出乞令尙書兼領左右曹錢穀財用事有散在五曹寺監者並歸戶部使尙書周知
其數則利權歸一若選用得人則天下之財庶幾可理詔尙書省立法三年三省言大理寺右治獄並罷
依三司舊例戶部置推勘檢法官治在京官司凡錢穀事增置幹當公事二員紹聖元年罷戶部幹當公
事置提舉管幹官復行免役義倉釐正左右曹職依原定官制三年右曹令侍郎專領尙書不與建中靖
國元年復幹當公事官一員政和二年五月詔依神宗官制委右曹侍郎專主行常平自今許本部直達
奏裁又詔依熙豐舊制本部置都拘轄司總領戶度金倉四部財賦宣和六年詔戶部辟官依元豐法
尙書 侍郎掌軍國用度以周知其出入盈虛之數凡州縣廢置戶口登耗則稽其版籍若貢賦征稅斂
散移用則會其數而頒其政令焉凡四司所治之事侍郎爲之貳郎中員外郎參領之獨右曹事專隸所

掌侍郎若事屬本曹郡縣監司不能直者受其訟焉大饗祀薦饌則尙書奉俎飲福則徹之朝會則奏賈物左曹分案五置吏四十右曹分案五置吏五十有大建炎兵興嘗以知樞密院張懋提領措置戶部財用後遷中書侍郎仍兼之五年復以參知政事孟庾提領措置後罷專委戶部長貳左曹分案三曰戶口掌凡諸路州縣戶口升降民間立戶分財科差人丁典賣屋業陳告戶絕索取妻男之訟曰農田掌農田及田訟務限奏豐稔驗水旱蟲蝗勸課農桑請佃地土令佐任滿賞罰繳奏諸州雨雪檢按災傷逃絕人戶曰檢法掌凡本部檢法之事設科有三曰二稅掌受納驅磨隱匿支移折變曰房地掌諸州樓店務房廊課利僧道免丁錢及土貢獻物曰課利掌諸軍酒課比較增虧知通等職位姓名人戶買撲鹽場酒務租額酒息賣田投納牙契外有開折知雜司右曹分案六曰常平掌常平農田水利及義倉振濟戶絕田產居養鰥寡孤獨之事曰免役曰坊場曰平準各隨其名而任其事曰檢法曰知雜裁減吏額左曹四十八右曹三十人淳熙十年詔左藏南庫撥隸戶部舊制戶部侍郎二人中興初止除長貳各一員或止除尙書若侍郎一員紹興四年七月詔戶部侍郎二員通治左右曹自此相承不改

郎中

左曹右曹

員外郎掌分曹治事建炎三年詔省併郎曹惟戶部五司以職事煩劇不併仍各置一員紹

興中專置提舉帳司總天下帳狀以戶部左曹郎官兼之右曹歲具常平錢物總數每秋季具册以聞初

置主管左右曹總稱戶部郎官紹興七年閻彥昭以太府寺丞兼左曹郎官紹興三十二年徐康正除左曹郎官自是相承不改是年又詔戶部事有可疑難裁決者許長貳與衆郎官聚議文字皆令連書有定議然後付本曹行遣

度支郎中 員外郎參掌計度軍國之用量貢賦稅租之入以爲出凡軍須邊備會其盈虛而通其有無若中外祿賜及大禮賞給皆前期以辦歲終則會諸路財用出入之數奏于上而以其副申尙書省凡小事則擬畫大事諮其長貳應申請更改舉行勘審者則先檢詳供具分案六置吏五十有一凡上供有額封樁有數科買有期皆掌之有所漕運則計程而給其直凡內外支供及奉給驛券賞賜衣物錢帛先期擬度時而予之分案五曰度支曰發運曰支供曰賞賜曰知雜乾道四年置會稽都籍度支掌之裁減吏額置五十人淳熙十三年又減四人

金部郎中 員外郎參掌天下給納之泉幣計其歲之所輸歸于受藏之府以待邦國之用勾考平準市舶權易商稅香茶鹽礬之數以周知其登耗視歲額增虧而爲之賞罰凡綱運滯滯及負折者計程帳催理凡造度量權衡則頒其法式合同取案及奉給時賜審覆而供給之分案六曰左藏曰右藏曰錢帛曰權易曰請給曰知雜裁減吏額共置六十人淳熙十三年又減四人

倉部郎中 員外郎參掌國之倉庾儲積及其給受之事凡諸路收糶折納以時舉行漕運上供封樁以時催理應供輸中都而有登耗則比較以聞歲以應用芻粟前期報度支均定支移折變之數其在河北陝西河東路者書其所支歲月季一會之若內外倉場帳籍供申愆期則以法究治分案六置吏二十有四元祐元年四月省郎官一員十月復置分案六曰會場曰上供曰糶糶曰給納曰知雜曰開拆建炎三年罷司農寺歸倉部紹興四年復舊裁減吏額共置二十五人續又減二人

禮部掌國之禮樂祭祀朝會宴饗學校貢舉之政令祭之名有三天神曰祀地祇曰祭宗廟曰饗又有大祀中祀小祀之別幣玉牲牢器服各從其等凡雅樂以大律大同合陰陽之聲爲樂律金石絲竹匏土革木爲樂器宮架八佾特架六佾分文武先後之序爲樂舞其所歌爲樂章若有事於南北郊明堂藉田禘祫太廟薦享景靈宮酌獻陵園及行朝貢慶賀宴樂之禮前期飭有司辦具間所定儀注以舊章參考其當否上尙書省冊寶及封冊命禮亦如之凡禮樂制度有所損益小事則同太常寺大事則集侍從官祕書省長貳或百官議定以聞凡天下選士具注於籍三歲貢舉與夫學校試補三舍生掌后妃親王以下推恩公主以下嫁宗室冠婚喪葬之制及賜旌節章服冠帔門戟旌表孝行之法若印記圖書表疏之事皆掌焉大祥瑞則朝參官以上詣闕門表賀餘於歲終條奏舊屬禮儀院判院一人以樞密院使參知政

事充知院以諸司三品以上充主吏無定數擇三司京朝百司胥史充禮部正設判部一人掌科舉補奏
太廟郊社齋鄖室掌長坐都省集議百官謝賀章表諸州申祥瑞出入內外牌印之事兼領貢院掌受諸
州解發進士諸科名籍及其家保狀文卷考驗戶籍舉數年齒而藏之若朝廷遣官知舉則主判官罷事
畢以知舉官卑者一員主判元豐官制行悉歸禮部其屬三曰祠部曰主客曰膳部設官十尚書侍郎各
一人郎中員外郎四司各一人元祐初省祠部郎官一員以主客兼膳部紹聖改元主客膳部互置郎官
兼領建炎以後並同

尚書掌禮樂祭祀朝會宴享學校貢舉之政令侍郎爲之貳郎中員外郎參領之凡講議制度損益儀物
則審覆有司所定之式以次諮決而質於尚書省大祭祀則省牲鼎鑊視滌濯薦腥則奉籩豆簠簋及飲
福徹之裸則奉瓊醴凡天地宗廟陵園之祀后妃親王將相封冊之命皇子加封公主降嫁稽其彝章
以詔上下而舉行之朝廷慶會宴樂宗室冠婚喪祭蕃使去來宴賜與夫經筵史館賜書修書之禮例皆
同奉常請求參酌而定其儀節三歲貢舉學校試補諸生皆總其政旌節章服之頒祥瑞表奏之進凡關
於禮樂者皆掌之建炎三年詔鴻臚光祿寺併歸于禮部太常國子監亦隸焉分案五曰禮樂曰貢舉曰
宗正奉使帳曰封冊表奏曰檢法各隨其名而治其事裁減吏額四十五人

續又減
四人

侍郎奏中嚴外辦同省牲及視饌腥熟之節祿受瓊奉槃歲祀昊天上帝祭皇地祇與尙書迭爲亞獻祭太社太稷神州地祇則迭爲初獻祀九宮貴神五帝感生帝朝日夕月蜡祭東西方亦如之大朝會則尙書奏藩國貢物凡慶賀若謝則郎中員外郎分撰表文祠事與太常少卿祠部官迭爲終獻或亞獻親郊自景靈宮朝獻太廟朝享至望燎禮畢乘輿還內皆奏解嚴分案十置吏三十有五南渡諸曹長貳互置紹興七年禮部置侍郎二員隆興元年詔除尙書不常置外禮部侍郎置一員

郎中 員外郎元豐郎官員外郎參領禮樂祭祀朝會宴享學校貢舉之事有所損益則審訂以次諮決凡慶會若謝掌撰表文與祠部主客膳部並列爲四建炎三年併省郎曹禮部領主客祠部領膳部隆興元年復詔禮部祠部一員兼領自是併行四司之事矣通置吏五十四人

祠部郎中 員外郎掌天下祀典道釋祠廟醫藥之政令月奏祠祭國忌休暇之日每歲大祀忌日大忌前一日皆不坐元日冬至寒食假各七日天慶先天降聖節各五日誕聖節正七月望夏至臘各三日天祺天貺節人日中和二社上巳端午三伏七夕授衣重九四立春秋分及每旬假各一日若神祠封進爵號則覆太常所定以上尙書省凡宮觀寺院道釋籍其名額應給度牒若空名者毋越常數初補醫生令有司試藝業歲終校全失而賞罰之分案五置吏二十有一

主客郎中 員外郎掌以賓禮待四夷之朝貢凡郊勞授館宴設賜予辨其等而以式頒之至則圖其衣

冠書其山川風俗有封爵禮命則承詔頒付掌嵩慶懿陵祭享崇義公承襲之事分案四置吏七元祐六年七月

兵部言兵部格長藩夷官授官主客令蕃國進奉人陳乞轉授官職者取裁即舊應除轉官者報所屬看詳舊來無例擬有陳乞舊部職掌未久遠互失參驗自今不以曾未貢及例有無應緣進奉人陳乞授官加恩令主客關報兵部從之

膳部郎中 員外郎掌牲牢酒醴膳羞之事凡所用物前期計度以關度支若祭祀朝會宴享則同光祿

寺官視其善否酒成則嘗而後進季冬命藏冰春分啟之以待供賜分案七置吏九

兵部掌兵衛儀仗鹵簿武舉民兵廂軍土軍蕃軍四夷官封承襲之事輿馬器械之政天下地土之圖凡

儀衛大朝會用黃麾大仗文德殿視朝及冊命王公大臣用黃麾半仗紫宸殿受外國使朝用黃麾角仗

文德殿發冊用黃麾細仗鹵簿有大駕法駕小駕皆掌其數及行列先後之儀為圖以授有司凡武選之

制倣貢舉之法先聯其什伍而教之以戰為民兵材不中禁衛而足以執役為廂軍就其鄉并募以禦盜

為土軍以老疾而裁其功力之半為剩員團結以禦戎為洞丁為義軍弩手屬羌分隸邊將為蕃兵籍其

名數而頒其禁令大將出征奏捷則告于廟破賊則露布以聞凡招置廂禁軍及州郡屯營三衙遷補守

戍軍吏轉補文武官白直宣借皆掌之其屬三曰職方曰駕部曰庫部舊判部事一人以兩制充掌三駕

儀仗鹵簿圖春秋釋奠武成王廟及武舉歲終以義軍弓箭手戶數上于朝國初掌千牛備身殿中省進馬籍元豐設官十尙書侍郎各一四司郎中員外郎各一元祐初省駕部郎中一員以職方兼庫部紹興改元詔職方庫部互置郎官一員兼

尙書掌兵衛武選車輦甲械廐牧之政令以天下郡縣之圖而周知其地域凡陳鹵簿設仗衛飭官吏整肅蕃夷除授奉行其制命凡軍兵以名籍統隸者閩習按試選舉遷補及武舉校試之事皆總之侍郎爲之貳郎中員外郎參掌之大禮則尙書充鹵簿使大祀奉魚牲及俎視朝則侍郎執班簿對立小祀則郎中員外郎薦俎并徹分案九置吏四十有七凡蕃夷屬戶授官封襲之事皆掌之建炎三年併衛尉寺隸焉分案十曰賞功曰民兵衛曰廂兵曰人從看詳曰帳籍告身曰武舉曰蕃官曰開拆曰知雜曰檢法乾道裁減吏額共置三十人續詔將下班祇應并進義校尉守闕進義副尉進武校尉守闕進武副尉並隸兵部許於殿前司抽差下班祇應文字人吏六名赴部行遣

侍郎掌貳尙書之事南渡長貳互置續置侍郎二員紹興常置一員

郎中 員外郎參掌本部長貳之事建炎三年詔兵部兼職方駕部兼庫部隆興元年詔駕部兵部郎官共一員兼領自是四司合爲一矣厥後間或並置若從軍或將命于外則假以爲寵焉

職方郎中 員外郎掌天下圖籍以周知方域之廣袤及郡邑鎮砦道里之遠近凡土地所產風俗所尚具古今興廢之因州爲之籍遇閏歲造圖以進四夷歸附則分隸諸州度田屋錢糧之數以給之分案三置吏五舊判司事一人以無職事朝官充掌受閏年圖經國初令天下每閏年造圖納儀鑿司淳化四年令再閏一造咸平四年令上職方轉運畫本路諸州圖十年一上紹熙三年職方駕部吏額通入兵部庫部併作四十二人

駕部郎中 員外郎掌輿輦車馬驛置廐牧之事大禮戒有司具五輅凡奉使之官赴闕視其職治給馬如格官文書則量其遲速以附步馬急遞總內外監牧籍其租入多寡孳產登耗凡市馬於四夷者澄歲額則賞之分案六置吏十有三建炎三年併太僕寺隸焉

庫部郎中 員外郎掌國簿儀仗戎器供帳之事國之武庫隸焉凡內外甲仗器械造作繕修皆有法式若御大慶文德殿應用函簿名數前期以戒有司祭祀喪葬則給以等差總衛尉寺金吾仗司兵匠之數考其功罪歲月而以法升降之分案四置吏九

刑部掌刑法獄訟奏讞赦宥敘復之事凡斷獄本於律律所不該以敕令格式定之凡律之名十有二曰名例曰禁衛曰職制曰戶婚曰廐庫曰擅興曰盜賊曰鬪訟曰詐僞曰雜律曰捕亡曰斷獄禁於未然之

謂令施於已然之謂赦設於此而使彼至之之謂格設於此而使彼效之之謂式其一司一路海行所不該者折而爲專法若情可矜憫而法不中情者讞之皆闕其案狀傳例擬進應詔獄及案劾命官追命姦盜以程督之審覆京都辟囚在外已論決者摘案檢察凡大理開封殿前馬步司獄糾正其當否有辯訴以情法與奪赦宥降放敘雪若命官牽復則以蕃數定之其屬三曰都官曰比部曰司門設官十有一尙書一人侍郎二人郎中員外郎刑部各二人都官比部司門各一人國初以刑部覆大辟案濇化二年增置審刑院知院事一人以郎官以上至兩省充詳議官以京朝官充掌詳讞大理所斷案牘而奏之凡獄具上先經大理斷讞既定報審刑然後知院與詳議官定成文章奏記上中書中書以奏天子論決大中祥符二年置糾察刑獄司糾察官二人以兩制以上充凡在京刑禁徒以上卽時以報若理有未盡或置淹恤追覆其案詳正而駁奏之凡大辟皆錄問熙寧三年詔詳議評斷詳覆官初入以三年爲任次以三十月爲任欲出者聽前任滿半年指闕注官滿三任者堂除八年罷詳議詳斷官親書節案止合節略付吏仍減議官一斷官二元豐二年知院安燾言天下奏案益多於往時自熙寧八年減官議斷官力旣不足故事多疎謬增詳議官一刑部增詳斷官一三年八月詔省審刑院歸刑部以知院官判刑部掌詳議詳覆司事刑部主判官爲同判刑部掌詳斷司事審刑議官爲刑部詳議官官制行悉罷歸刑部元祐元

年省比部郎官一員以都官兼司門五月三省言舊制糾察在京刑獄以察違慢自罷歸刑部無復申明糾舉之制請以御史臺刑察兼領其御史臺刑獄令尚書省右司糾察從之刑部舊有詳覆案自官制行歸諸路提刑司至是復置四年併制勘量爲一案紹聖元年詔都官司門互置郎官一員崇寧二年十二月詔刑部尚書通治左右曹侍郎一治左曹一治右曹如獨員卽通治餘並依官制格令

尚書掌天下刑獄之政令凡麗于法者審其輕重平其枉直而侍郎爲之貳應定奪審覆除雪敘復移放則尚書專領之制勘體量奏讞糾察錄問則長貳治之而郎中員外郎分掌其事有司更定條法則覆議其當否凡聽訟獄或輕重失中有能駁正詔其賞罰若頒赦宥則糾官吏之稽違者大祀則尚書泄誓薦熟則奉牲大禮肆赦則侍郎授赦書付有司宣讀承旨釋囚分案十二置吏五十有二紹興後分案十三曰制勘掌凡根勘諸路公事曰體量掌凡體究之事曰定奪掌訴雪除落過名曰舉敘掌命官敘復曰糾察掌審問大辟曰檢法掌供檢條法曰頒降掌頒條法降赦曰追毀掌斷罰追毀宣敕曰會問掌批會過犯曰詳覆掌諸路大辟帳狀曰捕盜曰帳籍掌行在庫務理欠帳籍曰進擬掌進斷案刑名文書裁減吏額置三十五人

侍郎舊制應定奪審覆除雪敘復移放尚書專領之若制勘體量奏讞糾察錄問長貳通治之南渡長貳

互置隆興常置一員淳熙十六年依崇寧專法奏獄及法令事請大理寺官赴部共議之用侍郎吳博古之說也

郎中 員外郎各二人分左右廳掌詳覆敘雪之事建炎三年刑部郎官以二員爲額關掌職事初無分異紹興二十六年詔依元豐舊法分廳治事先是右司汪應辰言刑部郎官分爲左右左以詳覆右以敘雪同僚異事祖宗有深意倘初無分異則有不當于理者孰爲追改乞遵用舊制要使官各有守人各有見參而用之以稱欽恤之意從之仍令今後倣此

都官郎中

員外郎掌徒流配隸凡天下役人與在京百司吏職皆有籍以攷其役放及增損廢置之數

若定差副尉

舊爲軍大將

則計其所歷而以役之輕重均其勞逸給印紙書其功過展減磨勘歲月元祐八年

以綱運差使關歸吏部省副尉員三百紹聖間復其額及元豐押綱法歸都官崇寧二年二月復配隸案先是元豐中都官有吏籍配隸案元祐中罷之因刑部有請乃詔如舊六月侍郎劉廣奏副尉差遣有立定優重等第都官條雖特旨亦許執奏乞申嚴其禁從之分案四置吏十有八建炎三年詔比部兼司門隆興元年詔都官比部共置一員自此都官兼比部司門之事分案五曰差次曰磨勘曰吏籍曰配隸曰

知雜各因其名而治其事裁減吏額置十二人

淳熙十二年減三人

比部郎中 員外郎掌勾覆中外帳籍凡場務倉庫出納在官之物皆月計季考歲會從所隸監司檢察以上比部至則審覆其多寡登耗之數有陷失則理納鈎考百司經費有隱昧則會問同否而理其侵負舊帳案隸三司自治平中至熙寧初凡四年帳未鈎考者已踰十有二萬錢帛芻粟積虧不可勝計五年十一月曾布奏以四方財賦當有簿書文籍以鈎考其給納登耗多寡遂置提舉帳司選人吏二百人驅磨天下帳籍并選官吏審覆七年二月詔帳司每歲具天下財用日出入數以聞元豐初年詔諸路財賦出入自今三年一供著爲令官制行釐其事歸比部元祐元年七月用司馬光奏悉總於戶部三年釐正倉部勾覆理欠憑由案及印發鈔引事歸比部政和六年詔寺監先期檢舉如庫務監官所造文帳委無未備方許批書違者御史臺奏劾用郎官梅執禮之請也分案五置吏百有一建炎以後或都官兼比部司門之事

司門郎中 員外郎掌門關津梁道路之禁令及其廢置移復之事應官吏軍民輦道商販譏察其冒僞違縱者凡諸門啟閉之節及關梁餘禁以時舉行分案二置吏五

工部掌天下城郭宮室舟車器械符印錢幣山澤苑囿河渠之政凡營繕歲計所用財物關度支和市其工料則飭少府將作監檢計其所用多寡之數凡百工其役有程而善否則有賞罰兵匠有關則隨以緩

急招募籍坑冶歲入之數若改用錢寶先具模製進御請書造度量權衡則關金部印記則關禮部凡道路津梁以時修治舊制判部事一人以兩制以上充元豐並歸工部其屬三曰屯田曰虞部曰水部設官十尙書侍郎各一人工部屯田虞部水部郎中員外郎各一人元祐元年省水部郎官一員紹聖元年詔屯田虞部互置郎官一員兼領

尙書掌百工水土之政令稽其功緒以詔賞罰總四司之事侍郎爲之貳若制作營繕計置採伐所用財物按其程式以授有司郎中員外郎參掌之應官吏兵民緣本曹事有功賞罪罰則審實以上尙書省大祭祀則尙書薦俎與徹若諸監鼓鑄錢寶按年額而課其數因其登耗以詔賞罰凡車輦飭器印記之造則少府監文思院隸焉甲兵器械之制則軍器所隸焉有合支物料工價則申于朝以屬戶部建炎併將作少府軍器監並歸工部是時營繕未遑惟戎器方急紹興二年詔於行在別置作院造器甲令工部長貳提點郎官逐旬點檢少府監既歸工部文思院上下界監官並從本部辟差又詔御前軍器所隸工部自是營造稍廣宰臣議戶部以給財爲務工部以辦事爲能誠非一體欲令戶工部兼領其事卒未能合隆興以後宮室器甲之造寢稀且各分職掌部務益簡特提其綱要焉分案六曰工作曰營造曰材料曰兵匠曰檢法曰知雜又專立一案以御前軍器案爲名裁減吏額共置四十二人

侍郎掌貳尙書之事南渡初長貳互置隆興詔各置一員

郎中 員外郎舊制凡制作營繕計置採伐材物按程式以授有司則參掌之建炎三年詔工部郎官兼虞部屯田郎官兼水部隆興元年詔工部屯田共一員兼領自此四司合爲一矣淳熙九年以趙公廩爲屯田員外郎自是不復省

屯田郎中 員外郎掌屯田營田職田學田官莊之政令及其租入種刈興修給納之事凡塘濼以時增減堤堰以時修葺并有司修葺種植之事以賞罰詔其長貳而行之分案三置吏八

虞部郎中 員外郎掌山澤苑囿場冶之事辨其地產而爲之厲禁凡金銀銅鐵鉛錫鹽礬皆計其所入登耗以詔賞罰分案四置吏七

水部郎中 員外郎掌溝洫津梁舟楫漕運之事凡堤防決溢疏導壅底以時約束而計度其歲用之物修治不如法者罰之規畫措置爲民利者賞之分案六置吏十有三紹興累減吏額四司通置三十三人軍器所隸工部提點官一員紹興三十二年詔於邊臣內差提轄監造官各二員幹辦受給監門官各一員掌鳩工聚材製

造戎器之政令舊就軍器監置別差提舉官以內侍領之紹興中改隸工部罷提舉官日輪工部郎官軍器監官前去本所點驗監視後復以中人典領工部侍郎黃中以爲言請復隸屬從之孝宗卽位有旨增

置提點官以內省都知李緯爲之改稱提舉免隸工部後以御史張震力爭復隸工部後改隸步軍司等
復舊紹熙元年減省員額如上制

文思院

隸工部

提轄官一員監官三員

內置一員文臣京朝官充

監門官一員掌金銀犀玉工巧及采繪裝鈿之飾凡儀

物器仗權量輿服所以供上方給百司者於是出焉沿革附見權貨務都茶場提轄官

六部監門

六部監門官一員掌司門鑰紹興二年置選升朝文臣有才力人充仍令六部踏逐奏差序

位請給依寺監丞郎官有闕得兼之初從吏部尙書沈與求之請也主管架閣庫掌儲藏帳籍文案以備
用擇選人有時望者爲之舊有管幹架閣庫官宣和罷之紹興十五年復置吏戶部各差一員禮兵部共
差一員刑工部共差一員以主管尙書某部架閣庫爲名從大理寺丞周楙請也嘉定八年又置三省樞
密院架閣官

